

JOYCE
MEYER



OLUTALO
LWA
MUKAMA

Okuvvunuka Ebizibu by'obulamu nga tuyita mu Kusinza

Olutalo
Lwa
Mukama

Olutalo
Lwa
Mukama

*Okuvvuunuka Ebizibu by'obulamu nga
tuyita mu Kusinga*



JOYCE MEYER

WARNER FAITH
WARNER BOOKS



JOYCE MEYER
MINISTRIES

P.O. Box 5, Cape Town 8000

Bw'ogula akatabo kano nga tekaliiko ddiba olina okukimanya nti kayinza okuba nga baakabbye, nga bakalaze nti tebaakatunda oba baakasazamu, ew'omukubi w'ebitabo. Olwo kiba kitegeza nti omuwandiisi n'omukubi w'akatabo teyasasulibwa.

Mu kukyusa ekitabo kino, twakozesa ekitabo ekitukuvu eky'oluganda ekiyitibwa BAYIBULI Endagaano Enkadde n'Empya.

WARNER BOOKS EDITION

Life in the Word, Inc.
P.O. Box 655
Fenton, Missouri 63026

Obuyinza bwonna ku katabo kano bwaffe.

Warner Books, Inc 1271
Avenue of Americas,
New York, NY 10020

Warner Books, Inc 1271
Kyakubibwa mu Amerika
Kyasooka ku kubibwa
Okitoba 2002
1 0 9 8 7 6 5 4 3

ISBN
LCCN

Ebiri Mu Katabo

Ekitundu 1: Olutalo lwa Mukama

1. Omutendera 1 - Wulira Butereevu Okuva Ewa Katonda 3
2. Omutendera 2 - Kkiriza Nti Oliwo Ku Lwa Katonda 13
3. Omutendera 3 - Kwata Ekifo Kyo 21
4. Omutendera 4 - Mukama Aleeta Okusumululwa 35

Ekitundu 2 : Tukyusibwa Okuyita Mu Kusinza

5. Eriya Asigala mu Kifo Kimu 49
 6. Tommegana – Sinza 55
 7. Kyusibwa 69
 8. Okusinza n’Essaala 77
 9. Okusinza n’okukyuka 93
 10. Sinza Katonda Mu Mwoyo Omulungi 99
 11. Okukyusibwa N’okufuusibwa 109
 12. Genda Mu Maaso Okutunula Era Osinze 121
 13. Katonda Ali Ku Lwaffe 127
 14. Katonda Ajja Ku Kugabirira 133
 15. Katonda Ali Ku Luuuyi Lwange 139
 16. Sigala Mu Kifo 151
 17. Katonda Yali Naye 159
 18. Sitaani Ategeeza Bubi Naye Katonda Ategeeza Bulungi 163
- Okufundikira 177
- Essaala Eleeta Enkolagana Eya Ssekinoomu Ne Mukama 179

Ekitundu

1

Olutalo lwa Mukama

Essuula

1

Omutendera 1

Wulira Butereevu Okuva Ewa Katonda

Katonda ayagala tuleme kuba na kutya kwonna. Tayagala tubeere mu kikangabwa oba entiisa, era tayagala okutya kutulemese kukola ebyo by’atugambye tukole. Bwe tuba tulina okutegeera okukwata ku kwagala kwa Katonda gye tuli, tukitegeere nti anaafangayo ku buli kintu ekitukwatako - ekyo bwe tukimanya kitununula mu kutya oluvannyuma. Nga bwe tubadde ne Katonda okumala ebbanga ne tulaba nti atufaako buli kaseera n’atuwa n’ebyetaago byaffe, tutandika okugayaala.

Mu kwagala temuli kutya kubanga okwagala okutuukiridde kumalawo okutya. Okutya kweralikirira ekibonerezo, era oyo atya aba tannatuukirira mu kwagala.

1YOKAANA 4:18

Katonda atatambulirako bwe tumutunuulira ne nkaliriza mu kifo ky’okutya kwaffe. Okutya oba ebirowoozo eby’entiisa kibeera bubeezi mulabe waffe Sitaani nga agezaako okutujja ku Katonda n’ekisakye ku bulamu bwaffe. Twandifuna okutya mu ngeri emu oba endala mu bulamu bwaffe, naye tuyinza okusalawo okwesiga Katonda era bwe tuba twetaaze, “kikole wadde otidde.”

“Kikole wadde otidde” y’enkola Katonda gye yandaga emyaka mingi egiyise. Nakiraba bwe yagamba Yoswa nga bwe kyawandiikibwa mu Yoswa 1 obutatya, amazima yali amulabula nti okutya kujja kugezaako

okumulemesa, naye mu kifo ky'okuleka okutya kumufuge, yafuna amaanyi ag'okuba omugumu era omumalirivu okusobola okugenda mu maaso.

Omwoyo Katonda gwe yatuwa tatufuula bati, wabula atujjuza amaanyi, n'okwagala n'okwegenderezanga.

2 TIMOSEEWO 1:7

Ekizibu nga kyazze essaawa yonna, okutya kye kintu kye tusooka okufuna. Sitaani atuteekamu ebirowoozo bya “Singa” mu mitwe gyaffe, ne tutandika okulaba obubi obwenkomeredde obuyinza okulabika. Ekyo nga kyakabawo tulina okulaba ki ekigenda mu maaso. Sitaani agezaako okutulemesa okugenda mu maaso mu kwagala kwa Katonda n'enteekateeka ze ez'obulamu bwaffe.

Bwe tufuna okutya oba ne tutandika okufuna ebirowoozo ebitiisa, ekintu kye twandisookedde ddala okukola kwe kusaba. Bulijjo ngamba “sabira buli kintu era oleme kutya kintu kyonna.” Tulina okweteekeeteeka okunoonya Katonda okutuusa nga tutegedde nti tufunye obuwanguzi obw'omu mutima ne mu birowoozo ku mwoyo ogw'okutya. Nga bwe tunoonya Katonda, tutunuulira ku ye mu kifo ky'okutya kwaffe. Tumutendereza olw'ekyo kyali era ne tumulaga okusiima kwaffe olw'ebirungi by'atukoledde, by'atukolera ne by'akyakola.

Katonda alina emikisa emipya gy'atuterekedde, okubifuna tulina okutandika okutambulira mu kukkiriza. Emirundi egisinga kitegeeza okukola ebintu bye tutayagala kukola oba mu myoyo gyaffe nga tetulowooza nti binaakola, naye okukkiriza kwaffe n'okutya Katonda birina okuba nga bisinga ebyo bye tweyalaliza, bye tulowooza oba bye twewulira.

Eky'okulabirako ekisinga tukiraba mu Lukka Esuula 5, Peetero n'abamu ku bayigirizwa ba Yesu abalala baali bavuba ekiro kyonna, baali tebakwasizza kintu kyonna, baali bakoowu, mu butuufu nga amaanyi gabawedde, nga beetaaga okwebaka, nkakasa baali bayala. Baali baakamala okwoza n'okutereka obutimba bwabwe, omulimu ogwali

omunene. Yesu n'alabika ku lubalama lw'ennyanya n'abagamba nti singa baagala okukwata eby'ennyanya ebityirivu, bandizzeemu ne basuula obutimba bwabwe, kyokka mu mazzi amawanvu ku mulundi guno. Peetero n'annyonyola Mukama nti amaanyi gaali gabawedde, baali tebalina kye bakutte, naye n'agamba "okusenziira ku kigambo kyo, tujja kusuula obutimba omulundi omulala."

Eno y'endowooza Mukama gy'ayagala tubeere nayo. Twandibeera nga twetaaga okukola ekintu kimu, nga tetwagala, nga tetulowooza nti kirungi, twandiba n'okutya nti tekijja kukola, naye tulina okuba abeetegefu okugondera Katonda so si kutya kwaffe oba ebirowoozo byaffe.

Sitaani agezaako okukozesa okutya mu ngeri ennyingi ezitali zimu okutukuumira mu mazzi amampi. Naye newankubadde twandiwulira okutya muli, twetaaga okutunuulira Katonda yekka, era n'ekigambo kye era tulina okugenda mu mazzi amawanvu okufuna ebirungi Katonda by'atutegekera.

Ebyo bwe byagga, Abamowaabu n'Abamooni, n'abamu ku Bamewuni, ne balumba Yekosafaati mu lutalo.

2 EBYOMUMIREMBE 20:1

Abalabe bakuyigga? Mu katundu kano baali Bamowaabu, Abamooni, n'Abamewuni abaali bayigga Kabaka Yekosafaati n'Abayudaaya. Mu bifo ebirala, mu Ndagaano Enkadde baali ba Yebusi, Abakiiti n'Abakanaani abaali bakyankalanya abantu ba Katonda.

Naye ku lwaffe abalabe kwe kutya, endwadde, obwavu, obufumbo obutateredde, abaliraanwa ababi, obutali butebenkenvu, obukyaayi, n'ebirala.

Abalabe bameka abakuyigganya? Ne bwe baba bangi batya, tulabire ku Kabaka Yekosafaati kye yakola okukyukira Katonda mu kifo ky'okudda ku abo bonna abalabe abaali bagezaako okuyimuka n'okufuga.

NOONYA “EKIGAMBO” OKUVA EWA MUKAMA

Ne wajja abantu ne bagamba Yekosafaati nti, “eggye eddene lizze okukulumba, nga liva mu Edomu, emitala w’ennyanja. Kakaati liri Kazazonutamali, ye Engedi.”

Yekosafaati n’atya, ne yewaayo okwegayirira Mukama n’alangirira ekisiibo mu Buyudaaya bwonna.

2 EBYOMUMIREMBE 20:2,3

Yekosafaati bwe baamubuulira nti abalabe bajja okumulumba, kye yasooka okukola kwe kutya. Naye oluvannyuma n’akola ekintu ekirala. Yeteekateeka okunoonya Katonda. Nga amaliridde okuwuliriza ekiva gyali, yalangirira n’ekisiibo mu ggwanga lyonna olw’ekyo. Yamanya alina okuwuliriza ebiva eri Katonda. Yali yeetaaga entegeka y’olutalo era Katonda ye yali asobola okumuwa entegeka esobola okumuyisaamu.

Tulina okuyiga omuzze ogw’okuddukira eri Katonda nga tufunye obuzibu mu kifo ky’abantu. Twanditendereza Katonda so si emitima gyaffe oba emitima gya abantu abalala. Weebuuze, “Obuzibu bwe bujja, nzirukira ku ssimu oba eri namulondo?” Katonda ayinza okutulagirira ew’omuntu atuwe ku magezi, naye bulijjo tusaanye okusooka okugendanga gy’ali tulage nti tumugulumiza era tumwesiga.

Omutendera gwa Katonda ogusooka kwe kulwanyisa okutya nga tuwulira okuva eri Katonda. Abaruumi 10:17 lutugamba nti; “N’olwekyo, okukkiriza kuva mu ebyo ebiwulirwa, n’ebiwulirwa biva mu kutegeeza bantu ebifa ku Kristo.” Olunyiriri luno terutegeeza ekigambo kya Katonda ekyawandiikibwa, naye ekigambo kya Katonda ekyogerwa, kiyitibwa *rhema* mu lulimi olwasooka olw’endagano empya, ekiri mu Lugereki. Mu ngeri endala bwe tuwulira okuva eri Katonda, okukkiriza kujjula mu mitima gyaffe ne kugoba okutya. Yekosafaati yalina okuwulira okuva eri Katonda, era tulina ekisanyizo kye kimu.

Katonda ayinza okwogera nga atuwa emirembe munda mu ffe, ayinza okukuwa amagezi, ayinza okukukkakkanya nga oli mweraliikirivu, ayinza okutuwa obuvumu. Katonda ayogera mu ngeri nnyingi, naye

bwe tumunoonya tujja kumulaba. Ajja kutukulemba singa tumukkiriza mu byonna bye tukola. (Engero 3:5-6)

Buli omu gw'omanyi ayinza okuba ng'akugamba weesige Katonda, era oyagala, naye "engeri y'okukikolamu" ekubuze. Owulira eby'entiisa era bikuterebula. Banywanyi bo bagamba "Ojja kuba bulungi" naye ekyo tekijjaawo kutya okutuusa nga Katonda ayogedde munda mu mutima gwo n'agamba "Nneesiga, mu byonna nja kubirabirira, buli kimu kigenda kuba bulungi."

Mu 1989 nagenda ew'omusawo okunkebera. Yazuula akazimba mu bbeere lyange era n'ansaba ngenderewo mu bwangu okwongera okukeekebejja. Nagenda ndowooza tewali nnyo kya maanyi, naye bwe baagenda okukizuula nga nalina ekika kya kookolo eyali akula amangu ennyo ddala, nga nnina okulongoosebwa mbagirawo.

Nzijukira okutambulatambula mu nju yange, era nga ntidde nnyo era nga mpulira ng'agenda okugwa wansi. Nali mpulira nga amagulu aganaatera okumenyeka. Buli kiro bwe nagendanga mu kitanda, nga otulo tumbula. Ne bwe neebakanga, nga sifuna tulo tulungi, nali sirina mirembe era nga mbeera ngugumuka. Buli kaseera nasisimukanga nga obweralikirivu bumpitiriddeko nga n'omutima guntundugga.

"Kookolo" kye kigambo ekijja ne ntiisa ey'ekitalo. Yadde nga mikwano gyange mingi n'abenganda zange baali bangamba nti Katonda ajja kundabirira, nali nkyalwanagana n'okutya okutuusa ku kiro ekyo ku ssaawa mwenda ogw'ekiro Katonda bwe yayogerera munda mu mutima gwange n'agamba, "Joyisi, nneesiga." Okuva olwo, saddayo kuwulira kutya okwo okw'ekitalo. Nali mweralikirivu nga nninda ebivudde mu kukebera okulaba oba kinaaneetaagisa okwongera okujjanjabibwa naye nasigala mmanyi nti ndi mu mikono gya Katonda era kyonna ekintuukako, ajja kundabirira.

Nga bwe kyazuulibwa, nali seetaaga bujjanjabibi bulala. Amazima twalaba nti mu kulaba obulwadde amangu ddala, Katonda yali awonyezza obulamu bwange. Nnamaliriza neebaza mu kifo ky'okutya, era Sitaani n'awangulwa mu lutalo olulala.

YEKOSAFATI YALI YEETAAGA OKUWULIRA

OKUVA ERI KATONDA

Yekosafaati bwe yawulira nti eggye eddene lyali lyetegeka okulumba Buyudaaya, yamanya eky'okukola. Yali yetaaga okwetegeka okunoonya amagezi si ag'abantu, mikwano gye, ab'oluganda oba abawi b'amagezi - naye okuwulira okuva eri Katonda.

Oba oli awo Yekosafaati yali yalwanako mu ntalo endala gye buvudeko-lwaki teyakozesa ku bukodyo bwe bumu bwe yali yakozesako? Si kikulu mirundi emeka ekintu gye kikukoledde emabegako, kiyinza obutakola mu kumalawo ekizibu ekiriwo okujjako nga Katonda akirambika akizizza buggya.

Ayinja okulambika enkola enkadde, naye ky'ayinza okutuwa y'endagiriro empya gye tutabangako nayo. Tulina okutunuulira Katonda si bukodyo. Akozesa obukodyo, naye tebulina maanyi mpozzi nga abukoleramu. Tetusaana kwesiga bukodyo wadde okutya. Tulina kutuunulira Katonda okutuwa bye twetaaga era ye yekka. Obuwanguzi bwaffe tebuva ku bukodyo naye mu nkolagana yaffe ne Katonda.

Zibasanze abo abagenda e Misiri okunoonyayo obuyambi, nga beesigayo embalaasi awaamu n'amagaali, kubanga waliyo mangi era nga n'abaserikaale abeebagala embalaasi balina amaanyi mangi, ne bateesiga Mukama omutuukirivu wa Yisirayeli kumusaba abayambe, wadde okumwebuuzako!

ISAAYA 31:1

Sizuulanga ki kye nnyini “zibasanze” kye kitegeeza, naye mmanyi saagala kikikwatako. Zibasanze kiragirawo nti kintu kya kunyolwa. Bwe tunoonya Katonda tuba n'emirembe n'essanyu, kale lwaki twandironzeko okunyolwa okuva mu kunoonya eby'ensi?

EKYETAAGO KYA YEKOSAFATI EKISINGIRA DDALA

Yekosafaati yali amanyi nti okujjako nga awulidde okuva eri Katonda yali taja kusobola. Obwetaavu buno bwe buyitibwa obusingira ddala. Waliwo ebintu bye tutetaaga naye ebirala byetaagisa. Yekosafaati yamanya nti okuba n'endagiriro ya Katonda kyali kyetaagisa.

Wandiba mu mbeera efaananako nga eya Yekosafaati. Naawe wandiyetaaga ekigambo okuva ewa Katonda. Wandiwulira nga omusajja oba omukazi abbira, nga obbira omulundi ogw'okusatu. Wandiyetaaze ekigambo kyo okuva ewa Mukama bw'oba onoowona.

Katonda ayagala okwogera naawe n'okusinga ggwe bw'oyagala okumuwuliriza. Munoonye nga omuwa obudde bwo, era tojja kukyejjusa.

Yekosafaati yalangirira ekisiibo mu Buyudaaya bwonna era obuyudaaya bwonna ne bukungaana okusaba Mukama obuyambi, ne bamuyaayaanira n'emitima gyabwe gyonna.

Ab'omu Buyudaaya ne bakungaana okusaba Mukama abayambe. Ne bava mu bibuga bya Buyudaaya byonna, ne bajja okwegayirira Mukama.

Awo Yekosafaati n'ayimirira mu b'omu Buyudaaya n'abomu Yerusalemu abakunganidde ku ssinzizo mu maaso g'oluggya olupya.

N'agamba nti, "Ayi Katonda wa bajjajjaffe, osinziira waggulu n'ofuga obwakabaka bw'amawanga gonna. Olina obuyinza n'amaanyi, nga tewali ayinza kukuziyiza.

2 EBYOMUMIREMBE 20:4-6

Yekosafaati yalangirira ekisiibo okulaga obwesimbu bwe eri Katonda. Obutalya n'okozesa ekiseera ekyo okwogera ne Katonda si kibi. Osobola n'okujjako televizoni obudde obwo n'obukozesa okubeera ne Mukama nakyo si kibi. Sigalako awaka akawungeezi era Mukama omufissizeeyo

akadde okusinga okugenda n'emikwano gyo obalombojjere ebizibu byo. Ebintu bino n'ebirala biraga nti tukimanyi okuwulira okuva eri Katonda kya mugaso. Mmaze okukimanya nti okunoonya Mukama kitegeeza okumulondoola, okumuyoya, era n'okumunoonyereza n'amaanyi go gonna. Mu ngeri y'emu oba endala, tweyise nga omusajja omuyala anoonya emmere tusigale nga tuli balamu.

Njagala okwongerako nti twetaaga okunoonyereza Katonda ekiseera kyonna so si nga lwe tuli mu buzibu. Lumu Katonda yangamba nti ensonga lwaki abantu bangi balina ebizibu buli kaseera lwa kuba olwo lwokka lwe bamunoonya. Yandaga nti singa ajjawo ebizibu, yandibadde tafuna kadde konna n'abantu. Yagamba, "noonya nga ali mu buzibu buli kaseera olwo tojja kubeera mu buzibu buli kaseera nga bwe kiri." Ndowooza gano amagezi malungi, era nandikuwadde amagezi naawe ogagoberere.

BUULIRA KATONDA NGA BW'ALI

Mu kifo ky'okwanjulirawo ebizibu bye ewa Mukama, Yekosafaati yatandika na kubuulira Mukama nga bw'ali ow'obuyinza. Amaaso ge yagassa ku Mukama mu kifo ky'okwemalira ku kutya ekizibu.

N'agamba nti, ayi Mukama Katonda wa bajjajjaffe, osinziira mu ggulu n'ofuga obwakabaka bw'amawanga gonna! Olina obuyinza n'amaanyi, nga tewali ayinza kukuziyiza.

2 EBYOMUMIREMBE 20:6

Mu kifo ky'okwogera ne Katonda ku bizibu byaffe, twetaaga okumwogerako. Twetaaga okwogera naye ku ki kyali, ku maanyi g'erinnya lye n'amaanyi g'omusaayi gw'omwana we Yesu, ku bintu eby'amagero bye tumanyi by'ayinza okukola n'ebyo by'akoze. Nga tumaze okumwebaza n'okumutendereza mu ngeri eno, olwo tuyinza okutandika okumutegeeza ekizibu. Sandyagadde bannange kujja kwogera nange nga bamaze kufuna ebizibu – njagala kubeera nga mbadde nnyumya nabo.

Kaakati nyinza okulowooza ku bantu abamu abankubira essimu bwe baba bamaze okufuna ebizibu, era kinnuma. Mpulira muli nga tebanfaako, naye nga kye beetaaga kyokka ky'ekyo kye bagala mbakolere. Nkakasa kyali kibatuuseko era ne muwulira engeri y'emu. Abantu bano bayinza okweyita emikwano naye nga mu butuufu tebali. Emikwano mu buzibu, naye tegirina kuba gy'ekyo kyokka.

Nga ab'emikwano tusaanye okulaga omukwano ne tumala akaseera nga tubudaabuda be tukolagana nabo. Tulina okwewala okufaananako nga ekika ky'abantu be mpita "abatwazi". Batwala butwazi naye nga tewali kye bagaba.

Njagala kubeera mukwano gwa Katonda. Yayita Ibulayimu mukwano gwe, era nange ekyo kye njagala. Mukama tamala bumazi bizibu byange, ye buli kimu gye ndi. Era simanyi na bwe nnyinza kumwebaza.

"KATI MUKAMA LABA EKIZIBU KYAFFE"

Ayi Katonda waffe, abantu bo AbaYisirayiri bwe bajja mu nsi eno, wagigobamu abaagirimu, n'ogiwa bazzukulu ba Ibulayimu mukwano gwo, ebe yaabwe ennaku zonna. Bagibaddemu, era bakuzimbide essinzizo okusinzizangamu, nga bagamba nti,

Bwe tunaatuukibwangako akabi, ng'olutalo, oba okusalirwa omusango, oba kawumpuli, oba enjala, tunaayimiranga mu maaso g'essinzizo lino, mu maaso go kubanga mu lyo mwe tukusinziza ne tukusindira obuyinike bwaffe, n'owulira n'otuwonya.

Kale tunuulira Abamooni, n'Abamowaabu, n'abo ku lusozi Seyiri; bajjajjaffe bwe baava mu nsi y'eMisiri, tewabakkiriza ku lumba bantu abo. Baabeebalama ne batabazikiriza.

Kaakano kye batusasula, kwe kujja okutugoba mu nsi gye watuwa okuba obutaka bwaffe.

Bino bigambo bya kulwanyisa. Singa tuwuliriza Mukama by'atubuulira nga ayita mu bigambo bino, tujja kubaako kye tuyiga ekinaakyusa engeri gye tulwanamu olutalo tubeere bawanguzi lubeerera.

Nga amaze okutandika essaala ye ey'okugulumiza Katonda nga bw'ali ow'obuyinza, ow'amagero, ow'ekyewuunyo era omulungi ennyo, Yekosafaati n'alyoka atandika okulombojja ebintu ebirala ebyamaanyi Katonda bye yali yakolera abantu be gye buvudde era ne bwe yatuukiriza ebisuubizo bye. Yamaliriza nga awayo okusaba kwe nga mumativu nti Mukama ajja kumala ekizibu. Yekosafaati yayogera mu bigambo bingi, "Ebyo nga biri awo, abalabe baffe bajja okutulumba bagezeeko okututwalako eby'obuggagga bye watuwa eby'ensikirano. Mbadde ndowooza nti ne kaakano kankubuulire naye mmanyi nti oli wa maanyi era byonna ggwe obirinako obuyinza."

Bwe tusaba Katonda obuyambi, tulina okukimanya nti atuwulira omulundi ogusooka nga tumusabye ekintu kyonna. Tetulina kumala budde bwaffe obw'okusaba nga tuli mu kumusaba kintu kye kimu emirundi n'emirundi. Tuyinza okumubuulira ku byetaago byaffe okutuusa bwe tufuna obukakafu mu mitima gyaffe nti tuvvuunuse ekizibu, naye nga tetukikola ku kusindika Katonda.

Katonda alina enteekateeka ey'okununulwa kwaffe nga n'ekizibu tekinnalabika. Katonda teyewuunyo omulabe ng'alumbye. Katonda tali mu ggulu nti anyoola emikono gye okufuna eky'okutukolera. Omulimu gwaffe kwe kutunuulira Katonda n'amaanyi ge ag'ekitalo, okumusinja n'okumutendereza ku lw'okutulaga okuddamu kwe gye tuli n'okuwuliriza ekigambo oba endagiriro okuva eri ye.

Essuula

2

Omutendera 2

Kkiriza Nti Oliwo Ku Lwa Katonda

Ayi Katonda waffe, obaziyize, kubanga ffe tetulina maanyi n'akatono kulwanyisa ggye ddene lino eritulumbye. Tetumanyi kye tunaakola, wabula tutunuulidde ggye.

2 EBYOMUMIREMBE 20:12

Kaakano tuyingira mu kitundu eky'okubiri mu nteekateeka ya Katonda ey'olutalo lwa Yekosafaati, ekisangibwa mu lunyiriri 12. Ayogera kati ne Katonda nga akkiriza mu lujjudde nga bw'atalina busobozi kumala kizibu.

Twetaaga okumanya nti tetusobola kumala bizibu bitujjira mu bulamu bwaffe. Tetulina bya kuddamu eri buli kibuzo. Tetumanyi ngeri ya kukwatamu buli mbeera gye tusanga. Nga Yekosafaati, tetumanyi kya kukola.

Mu kifo ky'okumala obudde, nga tugezaako okukolawo ekintu ate kye tutasobola kukyusaako, okutuusa bwe tubeera nga tukooye nga ate era twetawanyizza, twetaaga okuleka Katonda atukolere ebyo bye tutasobola kwekolera.

Nagezaako okumala emyaka mingi okwekyusa naye ne nnemererwa. Nagezaako nnyo era okumala ebbanga okuleka emize emibi naye nga nnemesebwa emirundi n'emirundi. Nagezaako okukyusa ebintu ebimu mu bulamu bwange, nfone enkulakulana, nkuze ekkanisa yange era mponyezebwe. Nabeeranga nnwana n'abalabe buli kaseera. Nzijjukira okwagala okumala gabivaako kubanga nali nkooye okugezaako okulwana entalo zange.

Nayitanga mu bintu bino byonna buli olukedde okutuusa olunaku lumu, bwe nnasalawo okukola katemba yennyini okulaga Katonda nga bwe nnali omunakuwavu ennyo. Nayogera ekintu ekifaananako bwe kiti; “Katonda neetamidwa. Kye kyo. Mbimaze. Tewali kye nkola kigenda. Mbivuddeko. Sigenda kuddayo kubikola.”

Amangu ago, muli munda, mu mutima ne mpulira Mwoyo Mutukuvu ng’angamba, “Ddala?” Essanyu lyali lijjudde mu ddooboozi lye. Ekyo kyabeerawo kubanga lwe tukoowa ennyo ne tusalawo nti tetusobola kubikolako katubirekere Katonda, ne tubivaako lw’asobola okukola munda mu ffe.

Okugezaako okubeera Katonda kikooya mangu. Lwaki toleka eby’okwelwanako n’okola nga Yekosafaati bwe yakola mu lunyiriri olwe 12? Kkiriza ogambe Katonda nti tolina maanyi galwanyisa balabe bo era tomanyi kya kukola, naye nga otunuulidde ye okukulagirira n’okukutaasa.

EBINTU BISATU EBIKULU EBY’OKUKOLA

Ebintu ebisatu Yekosafaati bye yakola byali bya mugaso nnyo. 1) yakkiriza nti talina maanyi kwanKK’anga balabe; 2) yakkiriza nti tamanyi kya kukola, 3) yagamba nti amaaso ge gali ku Katonda.

Okwogera ebintu ebyo ebisatu, Yekosafaati yali amaze okwetegekera eky’amagero, era kirabika tekyamutwalira budde bungi. Kyamutwalira ennyiriri kkumi na bbiri zokka. Abangi ku ffe tetusobola kutuukayo mu myaka kkumi n’ebiri, kale ne bwe ziba ennyiriri kkumi na bbiri.

ENGERI Y’OKWEWEERAYO DDALA EWA KATONDA

Yesu yagamba... okujjako nze tewali kye musobola kukola (Yokaana 15:5). Omulundi gwe nnasooka okusoma essomo eryo, saalooza na ku mazima galirimu. Nali muntu kyetwala era Katonda yatandika okumbuulira ekigambo kye mangu nga ntandise okutambula naye. Etteeka erimu ku kusobola okufuna ebya Katonda, kwe kumwemalirako

ddala. Awatali kukkiriza tetuyinza kusanyusa Katonda. Gwe mukutu gwe tufuniramu okuva gy’ali. Okukkiriza kivuunulwa nga okwemalira ku Katonda nga omwesigira ddala, nga weesiga amaanyi, amagezi era n’obulungi bwe, (2 Timoseewo 1:5).

Twetaaga okumwemalirako ddala twejjeko obuzito bwonna bwe tulina era tubumuteekeko. Bwe nekkata mu kitebe, mba nkitaddeko obuzito bwange bwonna era mba manyi nti kijja kumpanirira. Nejjako obuzito bwonna ne mbuteeka ku ntebe. Kyewuunyisa nti emirundi mingi twesiga entebe okusinga Katonda.

Tugamba twesiga Katonda, era osanga olumu tukikolako, naye tufuna obuzibu okumwemalirako ddala. Bulijjo tubeerawo n’enteekateeka endala singa Katonda tatudduukirira.

Katujjukire. Abalabe bwe baalumba Yekosafaati, yakola ki okufuna engeri gy’anaalwanamu olutalo lwe? Ekintu kye yasooka okukola kwe kusitukiramu anoonye Katonda. “Oba kiba kibe, ngenda kunoonya Katonda. Embeera eno yakatyabaga, ngenda kusiiba kubanga manyi nnina okuwulira okuva eri Katonda.”

Awo n’atandika okubuulira Katonda obulungi bwe. Nga amalirizza yayogera ekizibu kye naye oluvannyuma lw’okwebaza n’okutendereza. Oluvannyuma yayatuukiriza nga bw’aliwo ku lwa Katonda. Yayogera ekigambo kye tuteera okulemwa okugamba nti, “Simanyi kya kukola.”

Bangi ku ffe okugamba nti simanyi kya kukola kituswaza. Tumanyi nti mulimu gwaffe okumanya ebintu bwe bikolebwa. Tuwulira nga tuli basiru oba tetwemala bwe tuba nga tetusobola kufuna kya kukola. Y’ensonga lwaki buli kaseera tugezaako ebintu eby’enjawulo, newankubadde nga tewabaawo kikola. Omuntu gyafa yenkana ayagala okuwaanibwa n’okutendebwa, naye Katonda agamba nti ekitiibwa kikye. Newankubadde atugulumiza, okugulumiza kwe y’akutuwa era si lwa kintu kye tuba tukoleredde.

Nkimanyi nti sitaani alagira emizimu buli ku makya gituule ku bibegabega bya buli omu ku ffe, gyogere akaama mu matu gaffe, “Ogenda kukola ki?”, “Ogenda kukola ki?”, “Ogenda kukola ki?”

Yekosafaati teyawulira nti musiru, era naffe tetusaanye kulowooza nti tuli basiru. Yagamba Katonda, “Tetumanyi kya kukola, era ne bwe twandibadde tumanyi, tetwandibadde na maanyi kukikola.” Nga ayogedde kino era nga akitegeeza, yeteeka mu kifo eky’okubererawo ddala kulwa Katonda. Yakikola mangu mu lutalo – gye tukoma okwemalira ddala ku Katonda, gye tukoma okuwangula.

Awatali buyambi bwa Katonda, tewali kye tuyinza kukyusa mu bulamu bwaffe. Tetusobola kwekyusa, abakyala n’abaami baffe, ab’enganda, ab’emikwano oba embeera zaffe. Mazima, mazima, okujjako ye tewali kye tuyinza kukola.

Tulemesa emirembe n’essanyu okubaawo kubanga tetuleka Katonda kuba Katonda. Tugezaako okuteebereza ebintu ebitatukwatako n’ebikwata ku ndowooza yaffe. Waliwo ebintu nga biwanvu nnyo bizibu ku ffe. Teri kintu kizibu nnyo oba ky’amagero nnyo eri Katonda, naye ebintu ebisinga bizibu nnyo oba by’amagero nnyo gye tuli.

Katonda taliiko kikomo, wa lubeerera, naye ffe abantu tulina ekikomo. Katonda alina amagezi ag’ekika ekya waggulu ennyo, naye agaffe galiko ekikomo.

1 Abakkolinso 13:9 egamba nti amagezi gaffe sigaawamu oba si majjuvu. Tumanyi ebintu ebimu naye tetumanyi buli kintu. Waliwo ebintu bye tulina okuleka byokka. Tetujja kumanya buli kintu, naye tuyinza okukulira mu kifo mwe tumatirira nti tumanyi oyo amanyi. Bwe tutuuka mu kifo ekyo, tuyingira mu kuwummula kwa Katonda, okutuwa essanyu mu bulamu bwaffe. Mu Zabbuli 131:1 Daudi yawandiika; ‘Ayi Mukama seekulumbaza, situnuza lwetumbu, siruubirira bya kitalo, wadde ebinsukkiridde’. Eyo y’endowooza mu mutima Katonda gy’ayagala ffena tube nayo.

Kireeta nnyo okusumululwa mu mwoyo ne mu mutima bw’ogamba nti, ‘Mukama, simanyi kya kukola era ne bwe nandibadde mmanyi, sandikikoze. Naye Mukama amaaso gange gali ku ggwe. Ngenda kulinda ndabe ky’okolawo ku mbeera eno – kubanga tewali kintu kyonna kye nnyinza kukolawo’.

Bwe tuba mu mbeera enzibu ennyo oba ezitasoboka, twandiulira akayimba ako mu matu gaffe, “ogenda kukola ki? ogenda kukola ki? ogenda kukola ki?” Mikwano gyaffe gyandigamba, “nawulidde ebikwata ku mbeera yo. Ogenda ku kola ki?”

Awo we tubagambira, “ngenda kukola ekyo Yekosafaati kye yakola mu 2 Eby’omumirembe 20. Ngenda kukizza eri Mukama – mmulinde. Ajja kukola eky’amagero era ngenda kunyumirwa okumulaba nga akikola!

LINDIRIRA MUKAMA

Abasajja bonna ab’omu Buyudaaya baali bayimiridde awo ne bakazi baabwe n’abaana baabwe, omuli n’abaana abawere.

2 EBYOMUMIREMBE 20:13

Njagala nnyo olunyiriri luno. Ndutwala nga olunyiriri olw’amaanyi. Okuyimirira kikolwa mu mbeera za Katonda. Kikolwa kya mwoyo. Tuteru okukola ebintu mu buntu ate nga mu mwoyo tewali kye tukoze. Naye mu kulindirira n’okuyimirira ewa Mukama Yekosafaati yali akoze ekikolwa eky’omwoyo. Muli yali agamba nti, “Mukama ngenda kukulindirira okutuusa bw’onoobako ky’okolawo ku mbeera yange. Ngenda kweyagalira mu bulumi nga bwe nninda obeeko ky’okola.

Sitaani tayagalira ddala ssanyu lyaffe. Kiba kikontana ne kyatwagaliza. Ayagala kulaba busungu, amaziga, okwekubagiza, okwemulugunya, okwevuma Katonda era n’ebirala ebiri mu mbeera yaffe. Ayagala okulaba buli kimu okujjako essanyu. Nekemiya 8:10 lugamba nti essanyu lya Mukama ge maanyi gaffe.

Okunyumirwa obulamu nga bwe tulindirira Mukama okutukolera ku bye twetaaga si butaba na buvunaanyizibwa. Yesu yagamba nti omubbi ajjirira kubba, na kutta, na kuzikiriza. Nze najja abantu balyoke babe n’obulamu, era babe nabwo mu bungi ddala (Yokaana 10:10).

Tukemebwa okulowooza nti tetukola ebyo bye tusaanidde singa tetweraliikirira oba okugezaako okuddamu ekibuuzo, naye tulina okulwanyisa ekikemo ekyo kubanga kiremesa obulokozi bwaffe mu kifo ky’okubusobozesa.

Bwe baalumbibwa eggye ery'amaanyi ag'ekitalo, eryali lizze okubafuula abaddu n'okusanyawo ensi yaabwe, Abayudaaya bonna bajja ne bayimirira awo mu maaso ga Mukama.

Ekiseera kyonna sitaani yali abaleekanira, “Mugenda kukola ki?”, “Mugenda kukola ki?” “Mugenda kukola ki?”

Naye ne bayimirira buyimirizi awo nga balinda Katonda. Mu Isaaya 40:31 tusoma, ...naye abo abeesiga Mukama, amaanyi gaabwe, galidda buggya. Balibuuka mu bbanga n'ebiwawaatiro ng'empungu; balidduka embiro, ne batakoowa; balitambula ne batayenjebuka.

Tujja kwetaaga amaanyi ge tunaaba tufunye nga tulinda okusobola okukola ekyo kyonna Katonda ky'anaaba atulagidde okukola bw'anaaba atuwadde endagiriro. Abo abalindirira Katonda be basobola okuddibwamu ebibuuzo era be balina amaanyi ago agasobola okugoberera endagiriro ya Katonda bwe baba bagifunye.

LINDA OKUKUDDAMU

Awo Mwoyo wa Mukama n'ajja ku Muleevi eyali we baali bakunngaanidde awo, ayitibwa Yakaziyeeri, mutabani wa Zekariya, Zekariya mutabani wa Benaaya, Benaaya mutabani wa Yayeli, Yayeli mutabani wa Mattaniya omu ku baana ba Asafu.

Yakaziyeeri n'agamba nti, 'ayi Kabaka Yekosafaati nammwe mwenna abantu b'omu Buyudaaya ne mu Yerusalemu, muwulire, Mukama abagamba mmwe nti, 'emutya, era eggye lino lireme kubaterebula, kubanga olutalo luno si mmwe munaalulwana wabula Mukama.

2 EBY'OMUMIREMBE 20:14,15

Buyudaaya yonna bwe yali eyimiriziddwa mu maaso ga Mukama, omu ku bo yatandika okulagula. Omwoyo wa Katonda yamukkako kubanga baali balinze Katonda.

Bwe tunayiga okunoonya Katonda n'okumulinda, ajja kutuddamu. Eky'okuddamu kiyinza okuba ekyangu. Mukama yagamba Abayudaaya

obutatya kubanga olutalo terwali lwabwe, naye lulwe. Ekyo sikya mwoyo nnyo naye kye baali beetaaga okuwulira.

Mawulire ki amalungi agandisinze ago Yekosafaati n’abantu abalala ge bandifunye. OLUTALO SI LWAMWE, NAYE LWA KATONDA

Ekyo tekyategeeza nti bo baasigala tebalina kya kukola, kyategeeza nti Katonda yali agenda kubalaga ekitundu kyabwe. Baali ba kukikola mu maanyi n’amagezi ga Mukama, naye olutalo lwali lukyali lulwe okuwangula.

Oluvannyuma lw’ekigambo ekyo eky’okugumya, wajja ekigambo ekiragira, nga bwe tunaalaba. Tuli ba kulinda Mukama okutuusa nga atubuulidde eky’okukola – ate era tukikole mu maanyi ge ago ge tufunye bwe tubadde tumulinda.

Essuula

3

Omutendera 3
Kwata Ekifo Kyo

Enkya mugende mubalumbe. Tebaaleme kulinnyalinnyira awambukirwa e Zizi. Mujja kubasanga awakoma ekiwonvu, era eddungu ly'e Yerweli we litandikira.

Temujja kwetaaga kulwana lutalo luno. Mwesimbe muyimirire buyimirizi, mulyoke mulabe Mukama ali nammwe by'akola. Mmwe abantu b'omu Buyadaaya ne mu Yerusaalemu, temutya era temuterebuka. Enkya mubalumbe, Mukama ali nammwe.

2 EBYOMUMIREMBE 20:16,17

Kino ekitundu kiragira abantu ba Buyadaaya mu bifo byabwe bye baali banaabeeramu mu lutalo. Bulijjo nnalowoozanga nti ebifo byabwe n'ebyaaffe kwali kuyimirira. Newankubadde ekyo kituufu, waliyo ekiragiwo ekirala ekyali ekikulu. Oluvannyuma lw'okufuna ekiragiwo kino okuva eri Mukama, Yekosafaati yafukamira ku maviivi ge nga atunudde ku takka n'atendereza. Nga kyewuunyisa!

Okutendereza kye kyali ekifo kyabwe ekituufu, era mu kutendereza baalinga abayimiridde. Ku maviivi gaffe nakyo kifo kya lutalo – ekifo ekyogerwako mu lugero eky'okuvunna nakyo kifo kya lutalo. Okufukamira nga bw'owanise emikono, nakyo kifo kya lutalo.

Dawudi yayogera ku Katonda nti, “Ayigiriza emikono gyange okulwana.” Mmanyi nti yayigirizibwa okuwanika emikono gye mu kutendereza n'okweyayo eri Mukama, era n'akiraba nga kye kifo ky'olutalo.

Mukama ankuuma era anjigiriza eby'entalo n'anteekateeka okulwana, atenderezebwe.

ZABBULLI 144:1

Osanga Dawudi bwe yakubanga ebivuga engalo ze zaalinga zirwana. Tendereza, sinza, yimba, ekigambo kya Katonda, essanyu – bino byonna bya kulwanyisa mu ntalo.

Mu kitabo ekinnyonyola amakulu g'ebigambo, kitutegeeza nti ebigambo “amatendo”, okutendereza; ennyimba ezitendereza, byonna bikolwa biweesa Mukama ekitiibwa. Mu ndagaano empya, okutendereza kivuunulwa nga olugero, naye kyongerako nti okutendereza kwongera ku kitiibwa kya Katonda nga kyogera ku matendo ge. Kwe kugamba nti okutendereza kitegeeza okwogera oba okuyimba ku kisa n'obukulu bwa Katonda.

Mu ndagaano enkadde, okusinza bagamba nti kwe kuvunna, okwetoowaza. Mu ndagaano empya okusinza kivuunulwa nga obuwulize nga mulimu n'okuwa ekitiibwa. Okuwereza Katonda nakyo kivuunulwa nga okumusinza. Katonda asinzibwa mu ngeri nyingi, naye ekikulu mu kusinza Katonda, mulimu okukkiriza nti gy'ali, ekikula kye, ebirungi bye by'akola ne bye yasuubiza okukola.

Kuno kwe kuvuunula okusingayo obwangu, naye ndowooza nti kye kyokka kye twetaaga. Katonda nga bw'atafaayo kunnyonyola kusinza mu Bayibuli, yategeera butegeezi nti kuvuunula abantu abalina akakwate ku kiki kye kiri.

Eby'okulwanyisa byaffe mu lutalo, tebiri nga ebyensi wabula birina amaanyi agava eri Katonda, okusaanyawo ebigo...

2 ABAKKOLINSO 10:4

Eby'okulwanyisa byaffe si bya butonde. Si bintu ensi by'eyinza okutegeera yadde ekiyinda okulabika mu buntu nti kikola. Naye mu bwakabaka bwa Katonda bikola. AbaYisirayiri bwe baabeeranga mu lutalo, baaweerezanga yo ab'ekika kya Yuda okusooka. Ekika kino kye kyali kitendereza, Yuda kye kitegeeza. Tulina okuyiga ennwaana ya

Katonda, so si ennwaana ey'okunsi. **Tulwanagana si na mubiri n'omusaayi, naye wabula tulwanyisa amagye g'emyooyo emibi egy'omu bbanga, egy'abakungu, egy'ab'obuyinza, n'egy'abafuzi, ab'omu nsi eno ey'ekizikiza.**" ABAEFESO 6:12

Olutalo lwaffe tetulwanyisa bantu abalina omubiri n'omusaayi, wabula sitaani, omulabe w'emyooyo gyaffe. N'olwekyo, tulina okufuna ekifo mwe tulwanira nga kya mwoyo, tusobole okuguma nga bwe tusinza Mukama waffe.

N'olwekyo, mwambalenga eby'okulwanyisa byonna ebya Katonda, musobole okuguma ku lunaku olw'akabi, era bwe mulimala okukola byonna, mulyoke musigale nga muli bagumu.

Kale muyimirire nga mwenywezezza ng'amazima lwe lukoba lwe mwesibye mu kiwato kyammwe, ate ng'okukola ebituufu, kye kyambalo kyammwe, eky'ekyuma, eky'omukifuba.

ABAEFESO 6:13,14

Neewunnya nnyo bwe nnamanya nti ekifo kyaffe mu lutalo kyali kya kutendereza. Simanyi lwaki sakirabirawo mpozzi nga sitaani yanziyiza nga ankuumidde mu bikolwa eby'omubiri, ebitakola.

Okuyimirira kitegeeza okubeera oba okuyingira mu kiwummulo kya Katonda. Si kuwummula kwa mubiri, naye mu mwoyo. Bwe mba ngaanidde mu kifo kyange mba ngaanye okukemebwa. Mba ngaanidde mu kukkiriza nti Katonda ajja kunnunula. Era nnemedde mu ye.

Abaefeso 6 era kitugamba obutava mu kifo. "Era ebyo byonna nga bikoledwa, okuyimirira, (olunyiriri 13).

Mu lutalo lwaffe olw'okulwanyisa abalabe baffe ab'omwoyo, ekifo kyaffe kiri mu Yesu. Kwe kukkiriza n'okuwummulira mu ye. Kwe kusinza n'okutendereza.

Bw'oba osanze obuzibu era nga tomanyi kya kukola, goberera ebiragiro Katonda bye yawa Yekosafaati n'abantu be. Beera mu kifo kyo,

sinza, yimirira olabe obulokozi bwa Mukama. Wewumbe, kakkana, gamba omutima gwo gulekere awo okugezaako okumala ekizibu. Kyuka otunuulire Katonda.

Yasama era oyimbe ennyimba eziri mu mutima gwo. Katonda agamba mu bigambo bye nti ajja kutuwa ennyimba ez'obulokozi. Katonda azituwa, naye tulina okuziyimba zisobole okukola mu kulwanyisa sitaani.

*Ggwe kiddukiro kyange, olimponya obuyinike n'onzijuza
essanyu olw'okulokolebwa!*

ZABBULI 32:7

Mukama yagamba Yekosafaati obutaterebuka. Abalabe baffe abaleeta okutya bwe bajja tulina okulwanyisa ebirowoozo ebyo.

...enkya mubalumbe, Mukama ali nammwe.

2 EBYOMUMIREMBE 20:17

Tusaanidde okusitukiramu, ne tulwanyisa okutya nga tutendereza Katonda. Okutendereza Katonda si kwa kw'olwo lwokka lwe tukungaana mu kusaba; kya buli lunaku mu bulamu bwaffe – tusobola okutendereza nga tuli ffeka. Ffena tusanye okutendereza bwe tuti ebbanga lyonna.

Bayibuli etubuulira engeri gye tulina okubeeramu nga tusinza. Oluvannyuma Katonda ng'amaze okwogera ne Yekosafaati n'abantu ba Yuda, nga ayita mu mutume, abantu baavunnama ne bamusinza. Tetusobola kuvunnamanga buli kaseera, twandiba mu kifo mwe kitasoboka kukolebwa oba mwe kitasaanira. Naye mu mitima gyaffe tuyinza okutendereza bulijjo essaawa yonna, mu kifo kyonna.

ENGERI GY'OBEERAMU MU KUSINZA

*Awo Yekosafaati n'avunnamira ddala ku ttaka, n'abomu
Buyudaaya bonna n'abomu Yerusaalemu ne bavunnama mu
maaso ga Mukama, ne bamusinza.*

2 EBYOMUMIREMBE 20:18

Mmanyi nti olunyiriri luno lwogera ku ngeri gye tulina okubeeramu nga tuli mu maaso ga Mukama emirundi egisinga. Nga bwe nayogeddeko, tuyinza okuba nga olumu tetusobola kubeera bwe tutyo naye tulina okugezaako okuvunnamira Mukama nga tumuwa ekitiibwa era nga tumusinza. Mmanyi nti era kiba kirungi abantu nga ffe okuvunnamira. Kitujjukiza ekifo kyaffe nga abantu mu maaso ga Katonda.

Neekebejja ekigambo “okusinza” era nkizudde nti waliwo engeri eziwerako ezitali zimu ez’okukinnyonyola. Walina okubeerawo endowooza mu mutima munda erina okusooka, naye ebigambo ebisinga okukozesebwa okwogera ku kusinza byogera ku ekyo ekirabika ebweru w’omubiri nga bwe twalabye mu 2 Ebyomumirembe 20:18.

YIMIRIRA OTENDEREZE KATONDA

ABALEEVI ABASIBUKA MU Kohati, ne mu Koora, ne bayimirira, era mu ddoobozi ery’omwanguka, ne batendereza Mukama Katonda wa Yisirayiri.

2 EBYOMUMIREMBE 20:19

Kubamu ekifaananyi ky’ekyo ekyabaawo mu mbeera eno. Okusooka buli omu yavunnamira okutendereza Mukama. Ekyaddirira, abamu ne bayimirira ne batandika okutendereza Katonda mu ddoobozi ery’omwanguka.

Tetulina kusigalira ku ngeri gye tusaanidde okubeeramu, naye twetaaga okutendereza buli olukedde. Tulina okutendereza Katonda kubanga tukimannya nti asaanidde okutenderezebwa era twetaaga okukimannya nti sitaani tayagalira ddala kusinza kwaffe era kumuwangula.

Abantu abamu bagamba nti sitaani yali Ssabamalayika akulira eby’okusinza mu ggulu okutuusa lwe yajeemera Katonda ne bamugobayo, era bagamba nti n’omubiri gwe gwali gutondeddwa na bivuga, nga buli lwe yeenyeenya muvamu luyimba. Tekikwewuunyisa okulaba nti anyooma okusinza kwaffe; alina obuggya. Yalina ekifo kino naye yakifiirwa olw’obujeemu n’okwemanya, (laba Ezekyeli 28:13,14,15).

KKIRIZA ERA OSIGALE NGA OKKIRIZA

Enkeera mu makya, ne basituka ne bagenda mu ddungu lye Tekowa; Bwe baali batandika olugendo lwabwe, Yekosafaati n'ayimirira n'agamba nti, abantu b'omu Buyudaaya, nammwe ab'omu Yerusaalemu, muwulire kye ngamba, mukkirize Mukama Katonda wammwe, mulyoke mugume. Mukkirize eby'abannabbi be, lwe munaakulakulana.

2 EBYOMUMIREMBE 20:20

Bwe baamala okusinza n'okutendereza Mukama, abantu ne bagenda okwanKK'anga omulabe. Jjukira nti bagenda okwanKK'anga omulabe nga bamaze kusinza n'okutendereza.

Bwe baali bagenda, Yekosafaati yajjukiza nti baali beetaaga okujjukira ekigambo kya Mukama kye baali bafunye eggulo limu era baleme kutandika kubuusabuusa.

Abamu ku ffe twetaaga okuddayo okulaba ekigambo kya Mukama kye yatuwa. Katonda asobola okwogera ekigambo ekibudaabuda oba ekiragirira, era kino kitusanyusa nnyo, kitujjuza okukkiriza, kitugumya era ne kitusobozesa okuwangula omulabe. Ate era tuyinza okwerabira ekigambo ekyo n'ekitwetaagisa okukiddira. Timoseewo yali yeeraliikiridde nga aweddemu amaanyi, era Pawulo n'amuzzaamu amaanyi nga amujjukiza ebigambo bya bannabbi eby'amuwebwa mu kiseera ky'okwawulibwa n'okussibwako emikono.

Yekosafaati yagamba abantu okukkiriza bannabbi, era n'okujjukira nti olutalo terwali lwabwe, wabula lwa Mukama. Mbakubiriza obutawuliriza mulabe. Mulimba era y'azaala obulimba bwonna. Y'atumalamu amaanyi, y'akulimbalimba, nti, "Kyolindirira tekiriitamumu." Genda eri ekigambo kya Katonda ekyawandiikibwa oba ekigambo kyonna kye yali akuwadde, era ojjujire nti Katonda tasobola kulimba. Ebisuubizo bye abituukiriza era byesigika.

Beera mugumu, oja kununulibwa. Tusikira ebisuubizo bya Katonda nga tuyita mu kukkiriza ne mu kugumiikiriza.

YIMBA AMATENDO

Bwe yamala okuteesa n'abantu, n'atekawo ab'okuyimbira Mukama okumutendereza, nga bambadde ebyambalo eby'emikolo emitukuvu, ne bakulemberamu eggye, ne bagenda nga bayimba nti, "Mutendereze Mukama, kubanga ekisa kye kya mirembe gyonna."

2 EBYOMUMIREMBE 20:21

Mu lunnyiriri luno we wali amakulu g'enteekateeka ya Katonda eri Yekosafaati n'abantu be. Yimbira Mukama; mutendereze era mwebaze. Abatendereza bagamba, "**Mutendereze Mukama, olw'ekisa kye n'okwagala kwe emirembe gyonna.**"

Okuyimba n'okwebaza kyandirabika nga ekintu ekitasaanidde kukolebwa mu kiseera ekya kazigizigi, naye mmanyi, kye kintu kye nnyini kye tulina okukola. Ebintu bingi bye tukola nga tetubirabamu makulu naye ekyo tekitegeza nti tetulina kubikola. Twesigama ku ndowooza zaffe okumala ebbanga nga tetulaba nti ebintu ebibi bingi bye twakwata olw'okubeera mu by'ensi. Bayibuli egamba mu Baruumi 12:2 nti emyoyo gyaffe girina okukyusibwa ddala olw'ekigambo kya Katonda tulyoke tusobole okumanya ebirungi by'atwagaliza.

Kambawe eky'okulabirako okuva mu bulamu bwange n'omu ku mikwano gyange.

Emyaka egyayita nalinga nnumwa nnyo omutwe, omusawo yampa eddagala. Eddagala lino lyampisa bubi nga mpulira nga eggaali y'omukka entambulira mu mutwe. Mu butuufu nawuliranga ekireekaana mu mutwe ekyandeetera okuwulira nga agenda okugwa eddalu.

Eddagala nali ndimiridde olunaku lumu, era ekiro ekyo bwe nnagenda mu kitanda okwebaka, nnali sisobola kwebaka. Nnawulira nga ndi bubi, nnalina ekireekana mu mutwe n'obulumu, era nga sitaani andiko animba. Endwadde z'emitwe, zaali zibaddeko mu b'enganda zange, era sitaani yakozesa akakisa kano nga angamba nti nze nzirako. Dave yali yeebakidde ddala, ssaawa zali nga munaana oba mwenda ez'ekiro, ennyumba yali esirikiridde nnyo era nnawulira ng'ali nzekka

mu nsi n’obulumi bwange. Nnawulira nga agenda okusesema, ne nsitukiramu ne ngenda mu kinaabiro.

Nnali ntudde wansi nga omutwe gwange ngutadde ku kayigo. Mu kaseera katono nnyo nnawulira eddoboosi nga liva munda, era ne mpulira mwoyo mutukuvu nga angamba nti, “Yimba.” Nnyimbe? Kye kibuuza ekyanzijira mu birowoozo.

Nnali saagala kuyimba. Nali mpulira njagala kusesema, oba si ki, mbiveeko – naye so si okusituka nnyimbe. Naye ekiragiro kyaddibwamu, “Yimba”, nawulira nga omutima gunnennyise, nga mpulira njagala kukaaba, nga mpulira ennaku, ne ntandika n’okunyigira omwami wange Dave kubanga yali yeebase nze nga mbonaabona. Tetusobola kufuna buwanguzi bwa Katonda nga tuli mu kwekubagiza kwaffe.

Oluyimba olwanzijira lwali oluyimba olukadde lwe nali mmaze emyaka nga siruwulira, oluyimba luyitibwa “Ndi mu nnimiro”. Lwanzijukiza Yesu ne bwe yabonaabona mu Lusuku lw’e Gesusemane. Mu butuufu bw’aba yavaayo, nange nkisobola. Mu kugondera Katonda, nayasamy akamwa kange ne ntandika okuyimba naye nga nyimba ng’ekikere. Nayimba bubi nnyo era sisobola kukugamba nti nnali nyimba, naye nnali ngezaako okugondera Katonda, era nnassuuka.

Eky’okulabirako, ekirala kiva ku mukwano gwange ab’omusolo gwe baali balumbye okwekebejja embalirira ye. Newankubadde yali talina nsobi gye yali akoze, omukyala eyali abala teyalina mukwano era yalabika nga anoonya akakwakkulizo konna akasobola okuleetawo obuzibu. Yali yakasisinkana nabo emirundi ebiri nga guno gwakusatu. Yali agezaako okulowooza ki ky’aba ayogera n’engeri gy’ayinza okukwatamu ensonga eno, awo we yawulirira oluyimba mu mutima gwe, oluyimba lwe yali awandiise. Yagamba nti oluyimba lwagaana okumuva mu birowoozo era ne lutandika okumubuzaako emirembe kubanga yali yeetaaga kukola nteekateeka so si kuyimba.

Omusajja ono akulira abatendereza, n’olwekyo okuwandiika n’okuyimba ennyimba kya bulijjo gyali, naye yawulira nga si kye kiseera ekituufu.

Yasigala yewala oluyimba ng'agattako n'okugamba Mukama, "Eno si ye ssaawa ey'okukola ku kuyimba." Katonda yamala n'amulaga nti luno oluyimba lwe lw'okumununula, era nga alina okuluyimba. Oluyimba luno lwali lugamba nti Katonda kye kiddukiro kyaffe era ye mununuzi mu biseera eby'ebizibu.

Yagenda olugendo lwonna okusisinkana ow'omusolo nga bw'ayimba. Yali ajjudde essanyu we yatuukira era yanyumirwa nnyo. Yagamba nti omukyala akola ku musolo byamusobera era nga tategeera kigenda mu maaso. Amangu ago n'agamba nti olwaleero luwedde nja kukukubira essimu okukubuulira lwe tunaddamu okusisinkana. Waayitawo wiiki ssatu, n'afuna ebbaluwa mu posita nga egamba nti byonna biri bulungi, era tewajja kwetaagisa kususinkana kulala. Ensonga yali ewedde.

Nsuubira nti okuva mu by'okulabirako ebyo ebibiri mufunye amaanyi agayimba okusinga okukola ebyo bye mwandikemeddwa okukola.

Yekosafaati yandiba nga yawulira nga nze bwe nnali mu kinaabiro oba nga mukwano gwange kye yawulira ng'agenda okusisinkana ow'omusolo, naye Yekosafaati yali muwulize era kyakola nga bw'onoolaba.

SINZA BUSINZA

Bwe tuba tulina ekyeetaago mu bulamu bwaffe, tusobola okusinza Katonda akituwe okusinga okulomba. Bayibuli ekirambika nti tetulina kubanga tetubisaba (Yakobo 4:2). N'olwekyo tusaanidde okusaba okulaba nga ebyetaago byaffe bimanyika naye tetusaanidde kuyingira mbeera yakusabiriza. Tuli bakkiriza, si bamasiikiini (basabirizi). Matayo 6 etutegeeza nti bwe tuba tusaba tetulina kuddingana bye twogera nga tulowooza nti olwo lwe banaatuwulira. Emirundi gye gikoma obungi, essaala si gye ye yongerera obulungi. Tuteru okuba n'endowooza nti essaala gy'ekoma obuwanvu gy'ekoma okuwulirwa, naye kino si kituufu.

Nze ku lwange mmanyi nti emirundi egimu twogera bingi ne tutuuka n'akaseera nga tetukyekakasa ebyo bye tusaba. Mu butuufu

neesanga nga njogedde bingi mu ssaala ne mbuzaabuzibwa. Emyaka mitono egiyise Katonda yali akola nange ku kintu kino. Era yansoomooza nrandike okumusaba ebyo bye njagala ne bye neetaaga mu ngeri ennyangu ennyo nga nkozesa ebigambo bitono nnyo nga bwe kisoboka. Kyantwalira ebbanga okuyiga etteeka eppya, naye natandika okukikola. Kati olwo ekiseera kyange ekisinga nakimalanga mmulindirira mu maaso ge oba okumusinja. Nalaba nga kinziza buggya ate ne kikolerawo. Oluusi neesanga nga nzizeyo mu ngeri enkadde, nga ndowooza nti essaala gye zikoma obungi gye zisinga obulungi era Mukama n'anzijjukiza omulundi omulala nti essaala ennyangu erimu amaanyi.

Kyokka kye tusaanidde okukola kwe kulabira ku ssaala ya kitaffe. Abayigirizwa baagamba, “Mukama tuyigirize okusaba essaala... era engeri Yesu gye yabawa yali nyangu nnyo naye nga ate etuukiriza omulimu. Amazima mu mutima kye kisinga obukulu eri Katonda, so si omugugu gwe bigambo mpozzi ogutalimu mazima n'akatono okuva ku mutima.

Sigamba nti tetulina kumala budde bungi na Mukama, naye obudde obwo tuyinza okubumala nga tulindiridde ate nga tusinza, n'okwogera okwo.

Nze ndaba engeri yokka gye tuyinza okulaba ebyetaago byaffe nga biddibwamu kwe kusaba bye twagala oba bye twetaaga era tusinze Katonda nti ye gwe twetaaga. Tatuwa buwi ebyo bye twetaaga, ye yennyini gwe twetaaga.

Bwe twetaaga emirembe, ye mirembe gyaffe. Ye kutukuzibwa kwaffe, okutaasibwa kwaffe era obutuukirivu bwaffe. Ye Yakuwa agabirira byonna. Essanyu lye ge maanyi gaffe. Tatuwa buwi ssanyu; ye ssanyu lyaffe, ye ssuubi lyaffe era ye kkubo.

Ekimu ku bintu bye ngenze ndaba mu bulamu bwange kwe kulaba nga bwe nsinza Katonda olw'ekimu ku birungi bye, neesanga nga ekirungi ekyo akimpa mu bulamu bwange. Bwe tuba twetaaga okusaasirwa, tulina okutandika okusinza n'okutendereza Katonda olw'okusaasira kwe. Bwe tuba twetaaga obugabirizi oba eby'enfuna, tulina okutandika okumusinja n'okumutendereza kubanga yamala dda

okutusuubiza nti tetulijula kirungi kyonna. (Ibaza Zabbuli 84:11.)
Tujaguze kubanga ye musumba waffe tetwetaagenga.

Oyinja okugezaako okugamba bw’oti:

Kitange nzize mu linnya lya Yesu, era nkusinza olw’obwakabaka bwo obw’ekitiibwa. Katonda mmanyi nti oli wa buyinza. Nzijukira emirundi gyonna gy’onyambye era n’onnunula gye buvuddeko era njagala okukwebaza olw’obulungi bwo mu bulamu bwange. Mukama gwe onnyamba, maanyi gange, gye neggama embuyaga, era gye nneekweka.

“Oli wa mazima, era nsazeewo okukuteekamu obwesige. Kitange, omanyi nti nnina ekyetaago kati. Abalabe bange bandi bubi era simanyi kya kukola. Era ne bwe nandibadde mmanyi eky’okukola era mba sirina maanyi gamala ku kikola nga siri naawe. Nkulindiridde Mukama okumpa obuwanguzi, olutalo lulwo Mukama, si lwange.”

“Ndokola ggwe nga bw’olaba, ky’oyagala kikolebwe si nga nze bwe njagala. Ebiseera byange biri mu mikono gyo. Kaakano Mukama, nkutendereza era nkusinza nti olina entegeka era tewali muntu yadde maanyi ga sitaani gasobola kukuyuuza. Nkwebaza olw’okuba nga ontegekera essaawa eno, era nja kulaba obulokozi bwo n’amaaso gange. Webale, Mukama, olw’okumpa emirembe nga bwe nninda. Weebale olw’amaanyi ne sikoowa. Nnyamba nsobole okutambulira mu bibala by’omwoyo, newankubadde kaakano nnyigirizibwa omulabe. Nkumira ku kkubo erigenda mu bulamu. Nkwagala nnyo okusinga bwe nsobola okukugamba.

Kaakati ekyetaago kyo nga kijja mu nnaku ez’omu maaso, tandika butandisi okugulumiza, okutendereza n’okwebaza nti Katonda awulidde essaala yo era akola okukuwa obuwanguzi. Okusaba okw’ekika kino, mu butuufu kujja kukuwa amaanyi kwongere n’okukkiriza kwo.

OKUTOOWOLOKOKA OKUYITA MU KUSINZA

Wabeerawo okutoowolokoka okuva mu kusinza. Olumu twetaaga okutoowolokoka mu birowoozo. Bwe tusinza Mukama tutoowolokoka

mu birowoozo ebiba bituzitoowerera. Byonna, obulungi bwa Katonda obw'ekitalo bubimira.

Keera kumakya otandike okusinza. Nteesa otandikirewo nga tonnava mu kitanda. Sinza nga weetegeka okugenda ku mulimu. Ojja kwewunnya okulaba ebintu bwe bikyuka eka ne ku mulimu. Okusinza kuleetawo embeera Katonda mwasobola okukolera.

Okwemulugunya, okulaba obusangosango – n'okusuubira nti ekijja kibi, bireeta embeera sitaani mwasobola okukolera. Naye okusinza kuleeta kirungi. Abantu abamu basalawo ne batambulira wamu mu motoka, bagenda beemulugunya okutuuka ku mulimu. Bageya abantu be bakola nabo, ne beemulugunya ku bakama baabwe, oba embeera y'okumulimu, era nkukakasa nti embeera yaabwe ku mulimu tejja kukyukako olw'okwemulugunya okujjako, yeeyongera kuba bubi.

Okusiima n'okwebaza Katonda bitandika okutukyusa. Tusaanye okwebaza Katonda olw'okuba n'omulimu; abantu abasinga tebalina. Ntera nnyo okwebaza Katonda olw'okuba sisula ku nguudo n'okugenda okusimba ennyiriri okufuna obuyambi, nga emmere ey'okulya. Tunuulira ebintu by'olina, amaaso gajje ku ebyo by'otalina.

*Muyingire mu miryango gy'ennyumba ye nga mumwebaza,
ne mu mpya ze nga mumutendereza. Mumwebaze era
mumutendereze,*

ZABBULI 100:4

Mukama nnaamwebazanga bulijjo, nnaamutenderezanga.

ZABBULI 34:1

Okusinza kutukyusa. Bwe tubeera mu kusinza Katonda olw'engeri gy'atukyusizzamu, tweesanga nga enkyukakyuka ezo zitandika okwongera okweyoleka era ne tutandika okugenda ku ddaala eppya mu kumanya ekitiibwa kya Katonda, ekiyolesa obulungi bwe bwonna. Kwe kugamba nti Katonda ajja kuteeka obulungi bwe ku bamusinza.

Teweerabira bisuubizo bya Katonda, ekigambo ky'akugamba. Ennaku zo zijjuze ebirowoozo ebirungi, okutendereza, okusinza,

n'okwebaza nga bw'olindirira Katonda okutuukiriza bye yakusuubiza.

Singa twerabira ekigambo kya Katonda gye tuli, tuggwamu amaanyi, tuwangulwa, tetuba na bugumiikiriza, tuba n'ebirowoozo ebibi era tubeera basunguwavu. Ebiri mu mitima gyaffe biyita mu kamwa, kale n'olwekyo, tutandika okwogera ebintu ebikyamu. Ekigambo kya Katonda kitugamba nti kye twogera kye tufuna. Katonda ayita ebintu ebitannabaawo nga ebiriwo. (Abaruumi 4:17). Twandigoberedde eky'okulabirako kye naffe ne tukola kye kimu.

Bwe tusinza tusigala mu kifo eky'okuweebwa.

Essuula

4

Ekitundu 4
Mukama Aleeta Okusumululwa

Bwe baatandika okutendereza, Mukama n'ateekawo abateezi okuteega Abamooni n'Abamowaabu, n'ab'oku lusozi Seyiri, abaali balumbye Buyudaaya, ne batugumbulwa.

2 EBYOMUMIREMBE 20:22

Olunyiriri luno lugamba nti Abayudaaya bwe baatendereza Mukama yalumba abalabe baabwe, bo ne beetugumbula. Okutendereza kwabuzaabuza abalabe.

Ndwooza gano amawulire ge gasingira ddala okwewuunyisa! Ggwe kirowoozeko. Baasalawo okunoonya Katonda okusinga okubeera mu kutya. Baatendereza Katonda; era ne bamunyererako, ne bamulindirira. Yabawereza nabbi n'abagamba nti olutalo si lwabwe wabula lwa Mukama. Yabagamba babeere bulindaala. Baasinza era ne batendereza. Yekosafaati yalonda abayimbi okuyimba n'okutendereza, Mukama n'awangula abalabe baabwe bwe yababuzaabuza ennyo ne batingana!

Mu ky'abalamuzi era tulaba engeri endala Mukama gye yawonya mu lutalo eyandibadde tesobola kukola mu mbeera eya bulijjo.

Awo Yerubaali, ye Gidiyooni, n'abantu bonna abaali naye, ne bazuukuka mu makya, ne basiisira ku luzzi Kalodi. Olusiisira lw'Abamidiyaani lwali mu kiwonvu, ku ludda lwabwe olw'obukiikakkono ku mabbali g'olusozi Mole. Mukama n'amugamba nti: "Abantu abali naawe bayitiridde obungi nze okubawa okuwangula Abamidiyaani. Abayisirayeli bayinza

okuneewaanirako nga bagamba nti bawangudde lw'amaanyi gaabwe". Kale nno kaakano langirira mu bantu nti: "Buli atya era akankana, addeyo ewaabwe, ave ku lusozi Gileyaadi." Awo abantu emitwalo ebiri mu enkumi bbiri ne baddayo ewaabwe, abantu omutwalo gumu ne basigala.

EKY'ABALAMUZI 7:1-3

Mu kifo ky'okugamba Gidiyooni eyali ayolekedde olutalo olw'amaanyi nti nja kukwongerayo abalwanyani, Katonda yamugamba nti yalina abaali bayitiridde obungi nga tasobola kubawa buwanguzi. Ekyewuunyisa nti emirundi mingi Mukama ayita mu bunafu bwaffe okusinga mu maanyi gaffe. Waliwo ekiseera bwe wabaawo bingi ebigenda obulungi mu mbeera zaffe ezabulijjo Mukama nga tasobola kutuwa buwanguzi. Tetusobola kufuna kya magero kyaffe nga Katonda tatuyambye. Katonda yali abuulira Gidiyooni nti baali bewulira nnyo amaanyi, kale nga ayagala babeere mu mbeera nga balina okumwesigira ddala.

Okwemanya n'okwepanka byoonera ddala abantu n'olwekyo Katonda atuyamba okubeera ab'etoowaze, nga tuli wansi w'obuyinza bwe, nga tumwesigira ddala ddala. Yisirayiri eyise mu kintu kye kimu emirundi n'emirundi okuva lwe baava e Misiri. Beesiganga Katonda, era n'abayamba. Bwe baamalanga ate ne bejja ku Katonda, ne bamujeemera, nga balowooza nti tebamwetaaga, nga embeera yaabwe eddamu eyoonoka. Bwe beesiganga Katonda, nga bawangula abalabe baabwe, bwe bataamwesiga, abalabe baabwe nga babawangula.

ABALINA OKUTYA LEKA BAGENDE EWAABWE

Mukama yalagira Gidiyooni nti agambe abasajja be nti abo abalina okutya baddeyo ewaabwe; 22,000 ku bbo ne baddayo ne balekawo 10,000 okwanKK'anga omulabe.

Ekyo kitulaga nti abaali batya baali basinga abaali tebalina kutya. Emirundi emeka Katonda nga atuteekamu eky'okukola naye okutya ne kujja ne tutandika okuwalira era ne tutasobola kusalawo[ne tubeera

n’emitima ebiri?] nga bwe nnagambye gye buvuddeko, tusobola okutya naye ne tugenda mu maaso okukola ekyo kye tutya. Katonda agamba nti, “Temutya kubanga ndi nammwe.” Eno y’ensonga esingira ddala lwaki tetulina kuvunnamira kutya ne kutusalirawo embeera yaffe yonna. Katonda ali naffe era ajja kututaasa singa tumwesiga.

Awo Mukama n’agamba Gidiyooni nti: “Abantu bakyayinze obungi. Baserengese ku mazzi, mbakulonderemu eyo. Oyo gwennaakugamba nti anaagenda naawe, oyo y’ anaagenda naawe. Era buli gwennaakugamba nti ono tagenda naawe, ye taagende naawe.” Gidiyooni naserengesa abantu ku mazzi. Mukama namugamba nti: “Buli anaakomba amazzi n’olulimi lwe ng’embwa bw’ekomba, mwawule ku buli anaafukamira ku maviivi ge okunywa amazzi.” Abaasena amazzi mu bibatu byabwe ne bagakomba n’olulimi, baali ebikumi bisatu. Abalala bonna ne bafukamira ku maviivi gaabwe okunywa amazzi: Mukama n’agamba Gidiyooni nti: “nja kubanunula mmwe nga nkozesa abasajja abo ebikumi ebisatu abakombye amazzi, nkuwe okuwangula Abamidiyaani. Abalala bonna baddeyo ewaabwe.”

EKY’ABALAMUZI 7:4-7

Bwe nasooka okusoma ekitundu kino ne ndowooza, “bino byonna eby’okukomba n’okufukamira bikwata kuki?” Nali sibitegeera bulungi ne nsaba Mukama ampe okubikkulirwa. Yandaga akawandiiko akannyonnyola akaali mu Bayibuli gye sitera kukozeza ne kanyinyonnyola ebintu bino.

Ebintu byali bwe biti: abasajja ba Gidiyooni bonna baalina enyonta. Bwe baalaba amazzi abamu ne badduka, ne bafukamira, ne bannyika emitwe gyabwe mu mazzi ne batandika okunywa. Abalala bo baasena ne bibatu byabwe ne banywa. Abo abaasena amazzi mu bibatu byabwe baali basobola okulabiriza omulabe waabwe nga eno bwe banywa amazzi. Naye bali abannyika emitwe gyabwe mu mazzi baali bafa ku kuwonya nyonta eby’omulabe ne babyerabirira ddala.

Ebikumi ebisatu abaakomba amazzi n’olulimi baalaga amagezi n’obuvunaanyizibwa. Abantu nga bano Katonda b’alonda okukoleramu.

WEEWALE EMITEGO

Katonda bw’atuwa eky’okukola, atekako okuyitibwa ku bulamu bwaffe. Ekikulu tulina okulaba nga tetwesiba ku byaffe bye twagala okukola ne tulekeraawo okukola Katonda by’atuwadde okukola.

Tutera okweteeka mu mitego. Pawulo yagamba Timosewo nti tewali muserikale yeesibira mu bintu bya bantu ba bulijjo. Tulina okwewala okwesiba mu bintu by’ensi. Tuli mu nsi naye tulina okwewala okufuuka ab’ensi, oba okwagala ennyo ebintu by’ensi.

Emitego gino gitujja ku mulamwa ogw’okumaliriza emirimu gya Katonda, gye yatuwa mu bulamu bwaffe. Olumu tuwagamira mu bizibu by’abalala. Yadde twandyagadde okuyamba abantu abalala, tetulina kubyemalirako. Waliwo enjawulo wakati w’okuyingira mu bintu nga Mukama y’akutumye ate n’okubyesibiramu ddala. Era tuyinza n’okwezingira mu byetaago byaffe. Olumu tubeera tukola nnyo okwebezaawo ate ne tusubwa okukola Katonda ky’ayagala. Kwe kugamba nti kino kye kyatuuka ku baserikale ba Gidiyooni abaakutama ne bateeka emitwe mu mazzi. Batwalirirwa okwagala okwewonya ennyonta ne basubwa Katonda kye yali abaagaliza. Tulina okwekuuma emitego.

...tweyambule buli kintu ekituzitoowerera, era n’ekibi ekitwesibako. Twetabe mu mpaka ez’okudduka ezituteereddwawo, era tudduke nga tuli bagumiikiriza,

AB’EBBULANIYA 12:1

Nze naawe bwe tunaaba ba kuweereza Katonda, tulina okwewala emitego. Kankuwe eky’okulabirako:

Olumu nga tukulaakulana mu buweereza, twali twetaaga okugula ettaka tuzimbe ekitebe ky’obuweereza bwaffe. Omulimu guno gwali

gujja kuba lusozi gaggadde era nga gwa kulwawo naye nga tetulina kya kukola. Twali twagezaako okunoonya ekizimbe ekiwedde mwe tusobola okuyingira obuyingizi naye ne tutafuna kye twagala nga kuliko ettaka we tusobola okugaziyira singa kiba kyetaagisiza.

Okusooka nnagaana okugula ettaka tuzimbe ekizimbe kubanga nali mmanyi nti gujja kuba mulimu gwa maanyi, era nga buli kaseera ngamba nti: “saagala kwenyigira mu kuzimba kizimbe.” Nali nnina eby’okukola ebirala bingi nga era saagala kuva ku mulamwa gwange, kwe kusaba, okuyiga, okubuulira enjiri, okusomesa era n’okuwandiika.

Yadde nga nze njagala okwenyigira mu buli kintu ekigenda mu maaso, ku luno nnagamba omwami wange Dave, nti “Nze sigenda kwenyigira mu kuzimba, kunoonya lukusa lwa buzimbi, okukuba pulaani, n’ebyo byonna. Ekyo si kye nnatumibwa okukola.” Dave ye yatumibwa mu bintu nga ebyo, era abinyumirwa nnyo, n’olwekyo, nnalina okwefuga, ne seenyigira mu bya kuzimba ne nsobola okukola ogwo omulimu ogwampeebwa.

Bwe wabaawo eky’okukola nga kijja kukujja ku mulamwa gwo, funa omuntu omulala akikole, bwe kiba kyetaagisa omusasule n’okumusasula.

Waliwo lwe neesanga nga njagala na kulwana olw’ebintu ebyo bwe nnalabanga ebigenda okummira. Nabeeranga neekubiriza era nga ngamba n’abantu abalala nti: “Sijja kusobola kwenyigira mu mulimu guno.” Weewaawo, waliwo bye nalinga nnina okwenyigiramumu era nga sifaayo, naye nga sibiyingiramumu nnyo kugenda wala. Omulimu gw’okuzimba gwatwala emyaka etaano okuva lwe gwatandika okutuusa lwe gwaggwa, era nsiima nnyo olw’ekizimbe kyaffe. Kirungi, era tekiriiko bbanja, ekyo kikyongera obulungi.

Kubanga nnali saagala kwenyigiramumu, olumu nalabanga ebikolebwa ne ndowooza nti: “Ekyo nga sikyagala,” naye ne nzijukira era ne Dave n’anzijukiza nti saayagala kwenyigira mu mulimu n’olwekyo era ebintu tebisobola kugenda nga nze bwe naandibikoze. Obutenyigira mu mulimu guno okumala emyaka etaano kyali kisinga obutafuna buli kimu kye njagala.

Mmaze okukizuula nti nsobola okusalawo okukola buli kimu ne mbeera mu kunyigirizibwa oba nsobola okwesiga abalala ne mbawa obuyinza. Waliwo engeri nnyingi ez'okukolamu ebintu. Ffenna tusobola okutuuka mu kifo kimu naye nga tukozezezza amakubo maawufu, naye tewali nsonga kasita ffenna tutuuka. Nkusaba owe abantu obuyinza okukuyambako, naye tobawa buvunaanyizibwa nga tobawadde buyinza. Bw'onookola bw'oty, oja kubakaluubiriza, ate naawe oleme kufuna kigendererwa.

Buli kyetaagisa okukola mu bulamu bwaffe waliwo omuntu asobola okukikola. Era bwe tutabakiriza kukola mulimu guno Katonda gwe yabawa okukola tubalemesa era naffe ne tweremesa.

Bwe lwatuuka okutimba ekizimbe, nabyenyigiramu nnyo kubanga kyali tekigenda kutwala bbanga ddene, ate nga era nnyumirwa okukola omulimu guno. Ebirala saabiyigiramu era omwami wange yakola omulimu gwa matendo.

Tulina okubalirira bye tukola ne tulaba nti bye tukola bye byo bye tusaanide okumalirako obudde bwaffe. Bwe tukizuula nga bye twemalirako tebivaamu bibala byaffe oba bya Katonda, tulina okukyusamu ne tudda ku mulamwa.

AMAASO GO GATEEKE KU MUKAMA

Gidiyooni n'asindika Abayisirayeli bonna baddeyo ewaabwe, okuggyako ebikumi ebisatu, be yasigala nabo, ne basigaza eby'okulya byonna n'amakondere gaabwe.

Ekiro ekyo, Mukama n'agamba Gidiyooni nti: "Situka, olumbe, serengetayo ne Pura omuweereza wo.

Oja kuwulira bye boogera, olyoke ofune amaanyi okulumba olusiisira." Awo Gidiyooni n'aserengeta n'omuweereza we Pura ku njegooyego yolusiisira lw'omulabe.

Abamidiyaani n'Abamaleki n'abatuuze b'omu Buvanjuba, baali babisse ekiwonvu, nga bali ng'enzige obungi, era

n'enKK'amira ze baalina butabalika, ng'omusenyu ku lubalama lw'ennyanja.

Gidiyooni bwe yatuukayo, nawulira omusajja ng'abuulira munne ekirooto, n'agamba nti: "Naloose omugaati gwa bbaale, nga gugwa mu lusiisira lw'Abamidiyaani, ne gutuuka ku weema, ne gugikuba n'egwa, ne yeevuunika, n'ebutamira ddala ku ttaka."

EKY'ABALAMUZI 7: 8-13

Wano tulaba nga Gidiyooni afuna ekigambo kye yali yetaaga okuva ewa Katonda – naye ku luno kyajjira mu kirooto. Gidiyooni yali yeetaaga okuzzibwamu amaanyi kubanga ku ggye erya abantu 32,000 yali asigazizzawo 300. Omulabe yalina olusiisira nga mulimu enkuyanja eyalabika nga omusenyu ku lubalama lw'enyanja. Ekirooto kyali kiraga Gidiyooni nti enkambi y'omulabe ejja kusanyizibwawo amaanyi ga Katonda.

Akatundu akannyonnyola ku mugaati gwa bbaale (olunyiriri 13) kalaga obutono bwa Gidiyooni n'amaka ge, oba n'amaggye ge gonna. Bbaale obutafaanana nga KK'ano, etwalibwa okuba nga si nkungute bulungi.

Kino kituzzaamu amaanyi okulaba nti tetweetaaga bingi mu buntu okuwangula entalo zaffe. Twetaaga kukunKK'anya bye tulina mu buntu. Kye tulina okukola kwe kuteeka amaaso gaffe ku Katonda.

Katonda yalaga Gidiyooni nti nga omugaati gwa bbaale bwe gusobola okubyabyaataza enkambi y'omulabe, naye era asobola okukozesebwa mu ngeri y'emu. Mukama yali tajerega Gidiyooni, naye yali ayagala okumutuusa ku kifo ffenna kye tusaanye okutuukamu - okumanya nti tewali kye tusobola kukola w'atali.

FFUNA OBUBAKA ERA OSINZE

Munne n'addamu nti: "Ekyo kitala kya Gidiyooni, mutabani wa Yowaasi, OmuYisirayiri! Tekitegeeza kirala! Katonda amuwadde okuwangula Midiyaani n'eggye lyaffe lyonna."

Gidiyooni bwe yawulira ekirooto ky'omusajja n'amakulu gaakyo, n'asinza Katonda, n'addayo mu lusiisira lw'AbaYisirayiri, n'agamba nti "Musituke! Mukama abawadde mmwe okuwangula eggye ly'Abamidiyaani."

EKY'ABALAMUZI 7:14,15

Gidiyooni olwawulira obubaka okuva ewa Katonda, yatandika okwogera ku lutalo nga lulinga oluwedde okuwangula. Yatandika okutendereza n'okusinza Katonda nga gy'obadde olutalo lwawedde dda. Teyalinda kulaba biva mu lutalo okulangirira obuwanguzi bwa Mukama.

Nkyewuunya okulaba abantu Mukama be yakozesanga emirundi gye bayimirangamu okumusinja. Kirina kye kyanjigiriza eky'amaanyi, era nsaba nti naawe kinaakuyigiriza ekintu kye kimu nga osoma ekitabokino. Tetwandibadde nga abagenge abasaba okubawonya kyokka kyenda ku kikumi ne batafuna budde bwa kuyimiramu okutendereza. Omu yekka ku kkumi ye yakomawo okwebaza. Yesu n'agamba nti, ... naye omwenda bali ludda wa? Kwe kugamba nti bwe tutamusinja akimanya.

Mu kitabo ky'okuva e Misiri Abayisirayiri baayimba oluyimba olutuufu nga bamaze okusomoka ennyanja emyufu ate nga abalabe baabwe babbidde mu nnyanja: ...Asudde mu nnyanja embalaasi n'abeebagazi baazo. (Okuva 15:1). Naye baayimbira ku ludda lukyamu olw'omugga. Baali bakyamuse nnyo. Baali balina ensaasi, ebivuga byabwe nga bwe bayimba era bwe bazina. Ne bagenda mu maaso nga battottola obuyinza bwa Katonda. Naye baasooka kulaba kwolesebwa kwa buyinza bwe. Baayimba oluyimba olutuufu naye ku ludda olukyamu.

Mu butuufu kyandibadde kikyamu obutatendereza na kusinja oluvannyuma lw'obuwanguzi, naye Gidiyooni yakola ekituufu bwe yatendereza nga tannaba kulaba buwanguzi. Yali yakawulira kigambo kyokka eky'obuwanguzi okuva eri Katonda, ye n'atandika okusinza. Empisa eno eyamba nnyo era Mukama emuleetera okuwulira.

Kati nsuubira tutegedde lwaki AbaYisirayiri baamala ebbanga eddene nga bayenjera mu ddungu, lwa ngeri gye baasinzangamu. Singa baayimba

oluyimba olusaanidde mu ddungu tebaandibadde mu ddungu kumala myaka ana. Osanga bandibadde bayita mu nnyanja emyufu ne batuuka mu nsi ensuubize mu wiiki nga bbiri. Ne mu kitabo ky'Amateeka kigamba nti olugendo olwandibadde olw'ennaku ekkumi n'olumu lwabatwalira emyaka ana.

Nsobodde okuyigira ku bantu abajjanga ewa Yesu okubawonya nga basooka kumuvunnamira, n'okumusinja nga tebannaba ku musaba kintu kyonna.

Yesu bwe java ku lusozi, ekibiina ky'abantu ne kimugoberera.

Awo omugenge n'ajja gyali n'amusinza n'agamba nti: "Ssebo, singa oyagala, oyinza okumponya."

Yesu n'agolola omukono n'amukwatako, n'agamba nti: "Njagala, wona." Amangu ago ebigenge ne bimuwonako.

MATAYO 8:1-3

Omukazi Omukanaani, munnansi w'ekitundu ekyo, n'ajja gyali, n'aleekaana n'agamba nti: "Nkwatirwa ekisa, Ssebo, Omuzzukulu wa Dawudi! Muwala wange aliko omwoyo omubi, gumubonyaabonya!"

Kyokka Yesu n'atamuddamu kigambo. Abayigirizwa be ne bajja w'ali ne bamwegayiiria nti: Mugobe, kubanga ajja atuleekaanira!"

Yesu yaddamu nti: "Saatumibwa walala okujjako eri abantu ba Yisirayeli abaabula."

Awo omukazi n'ajja n'asinza Yesu nga bw'amugamba nti: "Ssebo, nnyamba!"

Yesu n'addamu nti: "Si kirungi okuddira emmere y'abaana n'esuulirwa obubwa."

Omukazi n'agamba nti: "Weewaawo Ssebo, naye n'obubwa bulya ku bukunkumuka obuva ku mmeeza ya bakama baabwo."

Yesu n'amuddamu nti: "Mukazi wattu, olina okukiriza kunnene! Kikolebwe nga bw'oyagala." Muwala we n'awona mu kiseera ekyo.

MATAYO 15:22-28

Bwe baatuuka awali ekibiina ky'abantu, omuntu omu n'ajja eri Yesu n'amufukaamirira nga bw'agamba nti:

Ssebo, kwatirwa mutabani wange ekisa, kubanga mulwadde wa nsimbu, ali bubi nnyo. Emirundi mingi agwa mu muliro, era emirundi mingi ne mu mazzi.

Namuleetedde abayigirizwa bo, ne batayinza ku muwonya

Yesu n'addamu nti: Bantu mmwe, ab'omulembe guno ogutalina kukkiriza era omubi, ndimala nammwe kiseera kyenkana wa nga mbagumiikiriza? Omulenzi mundeetere wano.

Awo Yesu n'aboggolera omwoyo omubi ne guwa ku mulenzi, n'awona mu kaseera ako.

MATAYO 17:14 -18

Tweyongera okulaba, mu by'okulabirako byonna nti okusinza kwe kusooka obuwanguzi.

LEKA MUKAMA ALWANE OLUTALO

Basajja be ebikumi ebisatu n'abagabanyaamu ebibinja bisatu. Buli musajja n'amukwasa amakondeere n'ensuwa enkalu, nga zirimu omumuli.

N'abagamba nti: "Bwe nnaatuuka ku njegooyego y'olusiisira, muntunuulire! Kye nnaakola, nammwe kye muba mukola.

Nze ne bonna abali nange bwe tunaafuuwa ekkondeere lyaffe, olwo nammwe ne mufuuwa agammwe wonna okwetooolola olusiisira, ne muleekaana nti: "Ku lwa Mukama ne ku lwa Gidiyooni!"

Awo Gidiyooni n'abasajja kikumi abaali naye, ne batuuka ku njegooyego y'olusiisira, ng'obudde bubulako katono okutuuka ettumbi, nga kye bajje bakyuuse abakuumi. Ne bafuuwa amakondeere gaabwe, ne baasa ensuwa ze baali bakutte.

N'ab'ebibinja ebirala ebibiri ne bakola kye kimu. Bonna ne bakwata emimuli mu mikono gyabwe egya kkono, n'amakondeere mu gya ddyo, ne baleekaana nti: "Ekitala kya Mukama era kya Gidiyooni!"

EKY'ABALAMUZI 7:16-20

Kigamba nti abasajja ba Gidiyooni tebaalina bitala. Mukama bwe yasindika eggye lya Gidiyooni ettono ennyo okulumbagana eggye ly'Abamidiyaani eddene ennyo, yakikola nga akigenderedde okubateeka ebintu mu mikono gyombi, babeere nga tebasobola kweyamba – baali tebasobola kusowolayo bitala byabwe okwetaasa. Katonda yasindika abasajja bikumi bisatu abatatyera nga bamalirivu mu kye bagenda okukola, yabasindika nga balina kye bakutte mu buli mukono, osanga baleme kwerwanako – baali balina okumwesiga okubalwanira. Kye baalina okukola kyokka, kwe kwasa ensuwa, okuwanika omumuli, n'okuleekaana, **Ekitala kya Mukama era kya Gidiyooni!** Kwe kugamba nti kye baalina okukola kwe kumulisa omumuli n'okutendereza Mukama.

Ebiragiyo bye baawa Gidiyooni bya njawulo ku bye baawa Yekosafaati. Y'ensonga lwaki tulina okwewulirira obubaka obuwa ewa Katonda. Tetusaanidde kukola mulala kye yakola. Ye kiyinza okuba nga kyamukolera naye tekitegeeza nti naffe kinaatukolera.

EKYABAAWO

Buli omu n'ayimirira mu kifo kye nga beetoolodde olusiisira. Ab'eggye lyonna ery'omulabe ne badduka nga baleekaana.

Abasajja ba Gidiyooni bwe bafuuwa amakondeere gaabwe, Mukama n'aleetera ab'eggye ly'omulabe okulumbagana bokka na bokka, buli omu ng'alwanyisa munne n'ekitala. ...

EKY'AMATEEKA 7:21,22

Ekyabaawo kye kimu n'ekyabaawo ku lwa Yekosafaati. Eggye lya Mukama bwe lyakola kye yaliragira okukola era nga bwe yaliragira, abalabe baabwe ne battingana.

Era, pulaani y'olutalo lwa Katonda bwe baagiteeka mu nkola nga bayita mu kukkiriza, yatuukirira ddala.

Ekitundu

2

Tukyusibwa Okuyita Mu Kusinza

Essuula

5

Eriya Asigala mu Kifo Kimu

Eriya yali muntu n'embala nga naffe gye tulina [nga alina ebirowoozo, okwagala, era n'enkula nga eyaffe]; n'asaba mu bwesigwa enkuba ereme kutonnya, era teyattonnya ku nsi okumala emyaka esatu n'emyezi mukaaga.

Awo nate n'asaba eggulu ne lisumulula enkuba ettaka ne lireeta ebibala [nga bulijjo]

YAKOBO 5:17,18

Mu kitabo kya I Bassekabaka 17:1 Eriya nabbi wa Mukama, Myabuulira Kabaka Akabu omukambwe nti tewali nkuba eneetonnya mu myaka egyo naye nga mpozzi kiribaawo nga ekigambo kya Mukama.

Mu kyeya kino kyonna, Katonda yalabirira Eriya. Okusooka, yamukweka ku mugga Kerisi n'atuma ebinyonyi bimuleetere emmere (ennyiriri 2-6).

Ate nno akagga ne kakala, Eriya n'aba nga talina mazzi ga kunywa. Katonda n'amusindikira mu maka ga nnamwandu omwavu gye yakolera eby'amagero, n'aliisa Eriya, nnamwandu ne mutabani wa nnamwandu omuto okutuusa bwe yasalawo okuweereza enkuba ku nsi, (enyiriri 7-24).

Oluvannyuma lw'emyaka gino gyonna, Mukama n'atuma Eriya addeyo ewa kabaka Akabu, amugambe nti enkuba egenda kuddamu okutonnya. Akabu yali musajja mukambwe nnyo era awaba obubi wabeerawo ekyeya, oba enjala eyengeri emu. Abantu bwe bataweereza Katonda bajja kuba nga babulwa mu mwoyo ne mu mubiri.

OBUBAKA BWA AKABU OKUVA EWA ERIYA

Awo Eriya n'agamba Akabu nti: "Genda obye, onywe mpulira okuwuuma kw'enkuba ennyingi."

1BASSEKABAKA 18:41

Katonda yaleeta ekyeya n'enjala mu Yisirayiri okumulaga obuyinza bwe. Yali ayagala Akabu ne mukyala we ow'ettima Yezebeeri bamanye nti balina okukyusa empisa zaabwe embi, nga bwe bataakyuse embeera yaabwe tejjja kubeera nnungi.

Oluvannyuma lw'emyaka essatu yatuma nabbi we Eriya amwerage amugambe nti enkuba egenda kutonnya. Awo Eriya n'agenda n'agamba Akabu nti, "Tera wetegeke kubanga mpulira okududuma kw'enkuba ennyingi. Wandyetegese kubanga egenda kuyiika."

Akabu ne Yezebeeri baali tebaagalira ddala kulaba ku Eriya kubanga yali nabbi wa Katonda era muweereza we. Wali weesanze nga abantu ababi bakukyayira obweereere? Bajja kukukyawa kubanga baajeemera eyakutuma. Eriya yeeraga Akabu, ekyo kyokka ne kimukwasa obusungu. Yadde Akabu yali ayagala enkuba, yali tayagala kulaga nti Eriya mutuufu oba y'abiri mu mitambo.

Sirowooza nti Eriya enkuba yali agiwulidde mu buntu. Yagiwulira mu mwoyo olw'okukkiriza, naye si mu buntu. Yali awuliriza mwoyo wa Katonda, era yakkiriza ky'agamba, n'atandikirawo okukikolako nga tannaba kulaba bwe kyeyoleka.

KIRANGIRIRE ERI SITAANI

Era nga Eriya bwe yalangirira oba bwe yalagula eri kabaka ow'ettima Akabu nti enkuba egenda kutonnya, naffe twetaaga okulangirira eri sitaani ekigenda okubeerawo mu bulamu bwaffe, okusinzira ku kigambo kya Katonda.

Gamba bw'oti: "Sitaani nkubuulira kaakati ojja kunnumba mu ngeri emu, naye ojja kunziruka mu makubo musanvu. Kati oyinza okulowooza nti owangudde, naye weerimbye! Olutalo oluguddewo ku muntu mukyamu. Nze ndi mwana wa Katonda ate ye alabirira ababe."

Gye buvuddeko, omwami wange Dave, nange twafuna ebizibu bingi eby'enjawulo mu kiseera kye kimu. Lumu, Dave n'ajja n'alangirira nti: "Sitaani alowooza nti ali mu gandaalo naye ali kumpi kubuna miwabo."

Eyo ye ngeri gye tulina okubeeramu, bwe twanKK'anga omulabe nga atulumba. Mu kifo ky'okuwuliriza ebibi sitaani by'agamba ebigenda okututuukako, tutandike kulangirira ebirungi byonna Katonda by'atutegekedde, mu bulamu bwaffe, ne bibi ebigenda okumutuukako.

Mukama bwe yasalawo nti ekiseera kituuse, okuweereza enkuba ku nsi, kye yasooka okukola, kwe kuweereza nabbi we Eriya ewa Kabaka Akabu, amubuulire ebirungi bye yali agenda okukolera abantu be.

Weetaaga okulangirira eri Akabu, ye sitaani, togenda nga olangirira mu mikwano gyo gyonna sitaani kyakukoze, wabula mubuulire Katonda ky'agenda okukukolera ne ky'agenda okumukola. Sitaani mujjukize nti Katonda mwenkanya era, ajja kukwejjeereza. Era, mubuulire nti bw'anaakwesibako, agenda kuwulira kuyimba, kusanyuka, kigambo kya Katonda, kutendereza, okusinza, n'okwebaza. Yiga okuddamu omulabe. Abeera awo nga ayogera naffe, naye bwe tutandika okumuddamu, ajja kubunira.

BEERA MU KIFO KYO

...Akabu n'agenda okulya n'okunywa. Eriya n'ayambuka ku ntikko y'Olusozi Karumeeli n'avuunama ku ttaka, n'ateeka amaaso ge wakati w'amaviivi ge.

N'agamba omuweereza we nti: "Genda olengere ku ludda lw'ennyanja."

Omuweereza n'agenda, n'alengera n'agamba nti: "Tewali kantu."

Eriya n'amugamba nti: "Ddayo emirundi musanvu."

Ku mulundi ogw'omusanvu, omuweereza n'agamba nti: "Akale akatono ng'ekibatu ky'omuntu, kaakano kambuka nga kava mu nnyanja."

Eriya n'agamba omuweereza we nti: "Genda ogambe Kabaka Akabu nti: "yingira mu ggaali lyo, oddeyo eka, enkuba ereme kukuziyiza."

Mu kaseera katono, eggulu ne liddugala ebire, embuyaga n'etandika okukunta, enkuba n'eyiika nnyingi.

1 BASSEKABAKA 18:42-45

Nga amaze okubuulira Akabu namutikkwa w'enkuba agenda okujja, Eriya yalinnya ku ntikko y'olusozi Karumeeli. Eyo gye yafukamira navunnama ku ttaka.

Eriya yasigala mu kifo kino nga asinza n'atuma omuweereza we okubeera nga agenda bw'akebera oba enkuba etandise okutonnya.

Omuwerezwa we yakomawo emirundi musanvu n'amawulire amabi, naye Eriya teyavako mu kifo ekyo. Teberezaamu Eriya bwe yawuliranga omuweereza buli lwe yakomangawo n'amugamba nti tewali kiriyo. "Tewaliyo yadde akale". Naye buli kaseera Eriya yamugambanganga nti "ddayo". Yadde nga baamuleeteranga amawulire amabi agaddiringana, ye teyaterebuka, kye yakola kwe kusigala w'ali nga asinza Katonda.

Okusinza kunyweza okukkiriza kwaffe. Okubuusabuusa, kwanditerebudde Eriya n'abivaako, naye okusinza, kwamunyweza, Abaruumi 4 etugamba nti, Ibulayimu, teyalina nsonga yonna mu buntu emukkirizisa. Okubuusabuusa, n'obutakkiriza byamulumba, naye tebyamuwangula. Yanywera, bwe yatendereza, n'okuwa Katonda ekitiibwa. Ebintu bino (okutendereza n'okusinza) tulaba nga byayamba abantu be tusomako mu Bayibuli, ekitegeeza naffe mu butuufu bijja kutuyamba.

Ndwooza omuweereza wa Eriya yamugamba nti: "Kirabika Katonda tewamufunye bulungi kubanga tewali kantu konna, tewali yadde akale." Naye buli mulundi Eriya nga amugamba bugambi, "ddayo." Yagaana okubivaako!

Ku nkomerero, omuwerezwa wa Eriya yajja n'amugamba, "Kati ndabayo akale katono nga omukono." Bwe yawulira kino Eriya n'asituka

nga aleekaana, “aleluuya!, genda ogambe Akabu ayanguwe agende eka, yeggame kubanga enkuba etandise okutonnya.”

Bw’osinza Katonda, ajja kuweereza enkuba ya mwoyo mutukuvu gy’oli, ennyike ba ‘Akabu’ n’abalabe abakutawanya. Ggwe sigala mu kifo kyo otendereze Mukama, omuwe ekitiibwa, kyonna nga tonnalaba nkyukakyuka, ne bw’oba nga omaze okubiyitamu.

Bw’onookola bw’oty, n’okwata ekigambo kya Mukama ky’osomye mu kitabo kino era n’okikozesa bulungi, nkukakasa nti ojja kufuna omukisa era olabe ebirungi mu bulamu bwo. Bw’oba oyagala okubeera omuwanguzi, owangule amaanyi g’omulabe, yiga ennwaana ya Katonda ennungamu.

Essuula

6

Tomeggana – Sinza

Kubanga tetumeggana na mubiri n'omusaayi ...

ABAEFESO 6:12

Mu kulwana olutalo olw'omwoyo tulina okukijjukira nti tulwanyisa sitaani ne dayimoni be, si bantu buntu.

Njagala okwongerako nti olutalo teruli n'abantu abatwetooldde bokka, naye naffe mufte ffenyini.

Ndwooza olutalo lwe tusingira ddala okulwana lwe twerwanako bwe twegerageranya wa we tuli mu by'omwoyo ne we twandyagadde okubeera. Tuyinza okuba nga tulwooza nti tetunnaba kutuukiriza bintu mu bulamu bwaffe, oba tuyinza okuwulira nga mu by'ensimbi tulemereddwa, oba ebintu ebirala bingi. Naye amazima gali nti tewali kye tuyinza kukyusa nga tuli mu kwekyawa oba okulwana. Jjukira nti Katonda yekka y'asobola okulwana entalo zaffe n'aziwangula. Entalo zino zanjawulo naye era nazo ntalo, n'olwekyo tulina okuzirwana mu ngeri gye tulwanamu entalo zaffe endala.

Kizibu okutuuka w'etusobola okwogera amazima ku bibi byaffe n'ebitulemerera, ate ne tuba nga tukyamanyi nti tuli batukuvu eri Katonda kubanga Yesu yatutukuza bwe yatufiirira n'azuukira mu bafu. Kye tuli mu Kristo kya njawulo ku bikolwa byaffe, era tulina okubitunuulira mu ngeri e'zenjawulo bbiri.

Okulokoka kye kirabo eky'ekitalo ekisinga. Naye ate mpulira muli nti yadde Abakristaayo bangi abaligenda mu ggulu kubanga baalokoka naye nga mu butuufu tebanyumirwangako lugendo lwabwe kubanga

tebayiganga kunyumirwa bulamu bwabwe yadde okunyumirwa Katonda.

Ensonga lwaki tebanyumirwa bulamu bwabwe lwa kuba bali mu ntalo zaabwe munda yaabwe ezikwata ku bitaatuukirira mu bulamu bwabwe. Ensonga lwaki tebanyumirwa Katonda lwa kuba buli kaseera balowooza nti Katonda abanyigidde, olw’obutali butuukirivu bwabwe. Babeera buli kaseera beelwanyisa, nga bali mu lutalo era nga bakuluusana.

Bw’oba nga oli mu lutalo munda yo, buno obubaka obuvudde ewa Mukama bubwo.

WEESALIRA OMUSANGO?

Lumu nnasomesako omusomo ogw’alina omutwe ogugamba nti, “Weesalira omusango?”

Tubeera twogera ku bizibu buli kaseera, naye ebiseera ebisinga ffe tuba ekizibu. Twefuukira ekizibu emirundi egisinga n’okusinga sitaani oba omuntu omulala yenna ku nsi.

Emabega mu kitabo kino twayogeddeko ku maanyi agali mu kusinza. Kati ne wano tugenda kwogera okwetegereza ensonga y’emu nga tweekeneenya engeri gye tusobola okukyusibwamu nga tusinza Katonda era nga tutunuulira Katonda – so si nga ffe bwe twetunuulira, nga tugatta ebitatuukiridde byaffe ebingi, - naye nga bwe tumutunuulira.

TUKYUKA

N’olwekyo ffe ffenna bwe tuggyibwako ekibikka ku maaso, ekitiibwa kya Mukama kirabikira mu ffe, nga bwe kyandirabikidde mu ndabirwamu. Ekitiibw’ ekyo kiva eri Mukama, ye Mwoyo, kitufuula ne tufaanana nga ye, mu kitiibwa ekigenda nga kyeyongerera.

Nze njagala okukyuka era nsuubira naawe era oyagala. Nze njagala okulaba enkyukakyuka mu mpisa zange. Njagala kulaba nga buli kaseera neeyongera mu maaso. Eky’ okulabirako njagala obutebenkevu; njagala okutambulira mu kwagala okusingawo ku kwe nnina, era n’ebibala ebirala eby’omwoyo. Njagala mbeere wa kisa era nga ndi mulungi mu bantu yadde siwulira bulungi oba olunaku terugenze bulungi. Ebintu ne bwe biba nga biringa ebyekubye okungendera obubi, nga buli kimu tekibeera nga bwe njagala, era nsigala nga njagala kubeera mutefu era nga njoleka embeera ya Yesu Kristo.

Tetusobola kukikola ku lwaffe, naye twaweebwa omuyambi, omwoyo omutukuvu yennyini, okutuyamba mu kugezaako okufaanana nga Yesu. Jjukira nti tewali kye tusobola kukola ku lwaffe.

Mu maanyi ga Mwoyo Mutukuvu ali mu ffe, tusobola okubeera abalungi era abeekisa, ebintu ne bwe biba nga tebitugendera bulungi. Tusobola okubeera abatefu yadde nga byonna ebintu bitabuse; nga olwo byonna by’ekobaanye okutumalako obugumiikiriza ne tunyiiga era ne tusunguwala.

Emyaka mitono egiyise, mutabani waffe asinga obuto yafuna layisinsi ye ey’okuvuga emmotoka. Twamuyambako okugula emmotoka, era nga yali mu galagi erinda agivuge, n’olwekyo yali nga yeesunga nnyo okutandika okuvuga.

Mu butuufu, era nga omuvubuka yenna bwe yandibadde, yali nga yeetegese okubeerako ne gy’agenda olwafuna layisinsi. Yali ayagala kuvuga agende mu kitundu ky’ekibuga ekirala gye yali asomesa bayibuli. Waali walako era Dave n’amugamba nti teyandyagadde atwale emmotoka kubanga waaliyo omuzira.

Yasaba nti oba asobola okukomawo n’agivuga nga avudde mu kusomesa bayibuli, ne tukkiriza. Naye bwe yakomawo nga omuzira gweyongedde ne tumugamba nti era tasobola kutwala mmotoka wabweru.

Yalina mukwano gwe gwe yali asuzizza, olwo ne bateekateeka okugitwala enkeera ku makya. Dave weyamalira okuzuukuka

n'okwetegeka, abalenzi nga baamaze dda okufulumya emmotoka eri mu luggya bategeka okugenda. Kati Dave ye yali asoose okuva awaka, agenda okutuuka mu kkubo nga omuzira gweyongende nga n'enguudo ziseerera okukamala. Olwo Dave yankubira essimu n'angamba nti abavubuka tebatwala emmotoka wabweru. Nnali saagala kubeera atwala amawulire gano amabi ne ntwala essimu ne ngiwa omuvubuka ayogere ne taata we. Era Danny yawulira bubi nnyo olwo n'atandika okunyiiga. Ye yali ayagala kukola ky'ayagala yadde mmanyi muli munda yali amanyi nti tekyali kituufu.

Nkunyimiriza olugero luno kubanga emirundi mingi bwe tutyo bwe tubeera bwe tutafuna kye twagala. Ebirowoozo byaffe bitabuka ne bitandika okugenda wano ne wali.

Nnagamba Danny abeere mugumiikiriza. Nnagamba, "Luno lunaku lumu lwokka mu bulamu bwo. Ojja kufuna ennaku endala nyingi okuvuga emmotoka yo." Nnagezaako okumubuulira nga Katonda bw'atugezesa n'atuleega nga ayita mu bigezo bino, ebiseera ebisinga nga atutegekera emikisa gye bujja. Okubudaabuda kwange kirabika tekwayamba nnyo, naye mmanyi nga bwe yali awulira kubanga nange kyali kintuuseko emirundi nga kikumi era naawe nsuubira bw'otyoo.

Ekimu kubiruubirirwa byange kwe kubeera omugumiikiriza yadde nga sifunye kye njagala. Ngenze nnyo mu maaso emyaka egiyise naye nkubuulira saalina nkyukakyuka nnungi okutuusa bwe nayiga nti sisobola kwekyusa. Nnali nnina okugenda ewa Katonda ne nfuna ekifo kyange we mulindira, era we musinziza ne ndyoka njiga nti ajja kunnwanira olutalo lwange.

Nnali neetaaga okukyusibwa kw'amaanyi. Nnali nasobezebwako, nga nnayisibwa bubi nnyo nga ndi mwana, era nga nnina ebizibu bingi olw'ebizibu ebyo. Nnali mujeemu eri obuyinza bwonna naddala nga obuyinza bw'omusajja. Nnali nnina endowooza embi. Nnali seesiga bantu. Nnali neesaasira. Nnali wantondo, nga oggyeko ebirala byonna nga mpulira nti buli omu anninako ebbanja.

Tomala biseera byo nga ogezaako okubanja abantu abatasobola kukusasula. Katonda agamba nti ye ajja kubeera muwolereza waffe,

empeera yaffe n’okutuddizaawo. Era atusuubiza okutuwa emikisa nga akubisamu emirundi ebiri mu bizibu bye twafuna emabegako, naye tulina okumwesiga ne tutagezaako kubyekwatiramumu ffeffa.

Bwe nzirako emabega, nkimanyi nnalina ebizibu bingi, era nkyuse nnyo. Omwami wange Dave, era kino akiwako obujulizi. Bwe twali twakafumbiriganwa mu 1966, nga bw’annyiiza, nga nyinza okumala wiiki bbiri oba ssatu nga soogera naye. Naye kati sisobola kusigala nga ndi munyiivu yadde okumala eddakiika entono ennyo. Nakulira mu maka agaali gafugibwa mu busungu ne mu kutya, kale nange ye ngeri gye nnali mmanyi okukozesa nga sifunye kye njagala. Naye Katonda yanjigiriza engeri endala ey’okukolamu ebintu.

Nnakyuka naye nga mmaze okubonaabona n’okwekyawa – nnali neekyawa, nga mpulira nti Katonda yannyiigira era simusanyufu gye ndi. Nnali buli kaseera mpulira nti nnina omusango; nnali mu busibe. Nnali sisobola kukakkana.

Nnali nagezaako okukyuka naye ne nfuna enjawulo ntono, n’obutafunawo n’akatono, oluvannyuma ennyo nayiga ku kisa kya Katonda nti era atukyusa nga ayita mu kisa kye, naye si mu kwerwanako ffeffa.

Bwe ntunula gye nvudde, ndaba nga nvudde wala, naye nga kyajja mpola mpola. Katonda bw’atyo bwatukyusa. Abaako ky’atulaga n’alinda okutuusa bwe tusalawo okumwesiga nga tannaba kututeekamu mbeera ze mu mpisa zaffe mu ekyo ekitusobyeko.

Ekiseera ekyetaagisa okuleetawo enkyukakyuka, kisinziira ku: 1) ekiseera kye kitutwalira okukkiriziganya ne Katonda nti tulina ekizibu ekyo ky’agamba kye tulina, 2) ekiseera kye kitutwalira okulekerawo okwekwasa n’okunyenya abalala; 3) ekiseera kye kitutwalira nga tuli mu kifo kye kimu tugezaako okwekyusa; 4) ekiseera kye tumala nga tuyiga ekigambo kye, nga tumulindirira era nga tumusinza, nga twesigira ddala nti alina ky’akola mu ffe mu kiseera kye tumunoonyezamu.

Buli kaseera Katonda agezaako okutukolamu omulimu, n’ab’omumaka gaffe, era ne mu mbeera zaffe. W’ali buli kaseera. Yeeyita,

“NDI”. Si ye “NNALI”, oba “NJA KUBA” naye ye “NDI”, aliwo kati era nga mwetegefu okukola ku bulamu bwaffe. Ye, muntu mulamu, era nga taja kukaka kuyingira mu bulamu bwaffe; alina okwanirizibwa. Bwe tutandika okukakkana wansi w’omukono gwe ogw’amaanyi, nga atandika okuddamu okutubumba mu ngeri gye yali ateeddwa nga ensi tennaba kututabulatabula. Era ajja kukola omulimu mulungi singa twewaayo mu mukono gwe ogw’obuyinza.

OKUSUMULULA KATONDA

Bwe tusumulula okukkiriza kwaffe, tuba tusumulula Katonda okukola. Katonda asobola okukukyusa nga bw’osoma ekitabo kino, bw’omwesiga okukikola. Ajja kukukolako, era akole ne ku mbeera yo nga otudde mu maaso ge era nga bw’omunyumirwa.

Tufuba era ne tukola nnyo nga tugezaako okwekyusa olumu ne tunyiiga oba n’okwekyawa olw’engeri gye tulimu.

Muwala waffe omutoototo, Sandra, yakyusibwa mu ngeri ey’ekyewuunyo ate era n’akyukira ddala lwe yasooka okuwulira nga njigiriza ku bubaka “Olutalo Lwa Mukama”. Yeejuukiriza nti yali teyesiga Katonda n’akatono okumukyusa. Yali munyiivu nnyo olw’ebitatuukiridde mu bulamu bwe, era nga obusungu bwe buvaayo mu ngeri eyalowoozesa abalala nti abanyiigidde. Yali tayagalira ddala busungu, okunyiiga, n’obukambwe, naye nga alabika talina kya kukikolera okutuusa bwe yawulira obubaka.

Awa obujulizi ng’agamba nti yeesanga nga akaaba nga tasobola kwekomako lwe nnasooka okubuulira obubaka buno. Yeejuukiriza nti yali tasinza Katonda yadde okumwesiga; mu kifo ky’ebyo, yali nga ayagala ye okwekyusa asobole okwewaana. Yafuna okusumululwa okw’amaanyi ku olwo, era ebyasomesebwa n’abikwatira ddala n’afunamu ekiramu.

Abantu abamu beemalira ku kwagala okubalaba nga abatuukiridde. Beekyawa buli lwe bakola ensobi. Bino eby’okwekyawa n’obuteesonyiwa bireeta ebizibu eby’amaanyi. Empisa zino tezikoma ku kuleeta bizibu mu nkolagana ne Katonda naye zireeta ebizibu ne mu nkolagana n’abantu

abalala. Enkolagana zaffe zonna zitandikira ku musingi ogw’engeri gye twetwalamu. Bwe tuba tetusobola kwetegeera era tuba tetusobola kutegeera bantu balala.

Mmanyi nti ogumu ku mirimu gyange nga omusomesa era nga omuwandiisi si kuyamba bantu kukyuka kyokka, naye n’okubayamba okuyiga bwe basobola okweyagalira we bali nga bali mu lugendo. Era waliwo n’ekitabo kiramba kye nnawandiika ku nsonga eno. Bw’oba oyagala okufuna ekitabo kino, kebera emabega w’ekitabo kino.

Nze ndowooza ekisinga obubi mu bulamu kwe kubeera nga teweyagala. Bw’oba nga weelwanyisa buli kaseera, ekitegeeza teweyagala. Okuva Bayibuli lw’egamba nti tetulwanyisa mubiri na musaayi, olutalo terwandikubaddeko. Olutalo lwandibadde ku mizimu ne dayimooni ezayingirira obulamu bwo nga ziyita mu kulimbalimba mu myaka egyayita. Obulimba buno bugenda buzuulibwa buli kadde okuyita mu mazima g’ekigambo kya Katonda. Bayibuli egamba nti amazima galitufuula ab’eddembe singa tutambula nago. Kwatira ku nnwaana ya Katonda, ojja kwagala ebivaamu.

Katonda atukyusa okuva ku ddaala ly’ekitiibwa ekimu okudda ku kirala, naye teweerabira okweyagalira mu kitiibwa ky’olimu kati ng’ogenda ku kiddirira. Togeraageranya kitiibwa kyo ku kya mukwano gwo oba wa luganda alabika nga ye ali kukitiibwa ekisingako. Buli omu kuffe ali kinnamunigina era Katonda buli omu amukolako mu ngeri ya njawulo, okusenziira ku ye bw’amanyi kye tweetaaga, era ne kye tusobola.

Oyinja obutalaba nkyukakyuka zino buli lunaku, naye bw’odda emabega ojja kulaba ddala nti waliwo ekyukakyuka mu bulamu bwo. Njagala nsiikuule okukkiriza kwo obeere nga ne bw’oba tolaba nkyukakyuka ojja kuba osobola okukkiriza nti Katonda akola, nga bwe yasubiza. Tulina okuba nga Eriya eyagaana okubivaako okutuusa bwe yalaba nga bye yali asubira bituukiridde. Sitaani yadde emikwano gyaffe bwe bagamba nti tetukyuse, tulina kugenda bugenzi mu maaso okulindirira era n’okumusinja era ne tutafaayo ku bitumalamu maanyi.

Jjukira, tulaba nga tumaze kukkiriza. Tweriga era ne twerwanyisa ffe ffeka olw’ekyo kye turalaba, mu kifo ky’okutendereza n’okusinja

Katonda olw'ebyo byonna bye tuli. Bwe tumusinza, olw'okuba ye Katonda, tulaba ebintu ebisumululwa mu bulamu bwaffe bye tutandisobodde kukola ku lwaffe.

Bwe tusinza Katonda tusumululwa okuva mu kusoberwa. Ebyo ebintu byonna ebyesibye, ebyengeri, ebirowoozo ebyetaaga okugenda bitandika okubulawo. Bwe tusinza, embala ya Katonda esumululwa n'eyingira mu bulamu bwaffe n'etandika okweyoleka.

Olumu ku ntalo zange kwali kubeera mugonvu. Okusinga, nnali muntu mukalubo, mukambwe, era anyigiriza. Nga nyinza okuba nga nsaba muntu kutwalayo bisasiro naye ne mboggoka nga omuduumizi w'amaggye. Nnali saagala kubeera bwe ntyo, naye ne bwe nnagezangako ntya okukyuka, abantu bambuuzanga lwaki mbeera mukambwe nnyo bwe ntyo.

Bankuza bwe batyo kale nange ne nfuuka bwe ntyo. Bwe nayiga embala ya Katonda, nayiga nti tali bw'atyo, era nange nga saagala kubeera bwe ntyo, naye nga sisobola kukyuka. Ensonga lwaki nnali sikyuka, lwa kuba nnali ngezaako okukyuka nga nkikola ku lwange. Nali seesiga Katonda kukikola. Nali nfuuse naakyemalira mu kifo ky'omukkiriza.

Buli lunaku nnalinanga pulaani yange, nga bw'etayitamu (kino kyabeerangawo buli kaseera), nga neeyongera okunyiiga n'okusinga bwe nnabadde eggulo limu. Kale nze ebiseera ebimu nga okuyiga ekigambo kya Katonda mpita mu bulumi bwa maanyi. Bwe nnali sinnaba kutandika kuyiga kigambo kya Katonda nnalina ebizibu naye nga sikimanyi. Nnali mmanyi nti abalala bonna be baalina ebizibu naye nga si nze. Bwe nnamala okusoma ekigambo, nnamanya nti nnina ebizibu bingi naye era nga sirina busobozi kukyusa okutuuka bwe nnagenda mu maaso okuyiga ekigambo kya Katonda, ne nzuula pulaani y'olutalo lwe. Y'ensonga lwaki tuteekeddwa *okugenda mu maaso* mu kigambo kya Katonda bwe tuba twagala okufuulibwa ab'eddembe.

Singa nnabivaako mangu ne seeyongera mu kigambo, nnandibadde omuntu omunakuwavu ennyo. Neebaza Katonda nti ne bwe tuba nga ffe twagala kubivaako, ye tatuganya. Ye asigala mwesigwa, ne bwe tuba nga ffe tetuli beesigwa. (2 Timoseewo 2:13).

Nga bwe nagambye, bwe tusinza Katonda olw'ebirungi bye, bituddira. Ekimu ku birungi bino bwe bugonvu. Olowooza otya? Bwe nnagenda nsinza Katonda olw'ekyo ky'ali, nakyusibwa, era kati sikyaali mukambwe.

Bw'oba toli nga bwe wandiyagadde okubeera mu bimu ku mpisa zo, tandika okusinza Katonda. Gy'onaakoma okumusinza olw'ebirungi by'embala ye – nga obwesigwa, obulungi bwe, okwagala kwe, ekisa kye, obutakoowa mangu, obutasunguwala mangu, okusaasira kwe okuyitirivu, obugumiikiriza - kyonna ky'oba omusinzizza kijja kweyoleka mu neeyisa yo.

EKIRUUBIRIRWA KYAFFE: KUFAANANA KRISTO

Kubanga Katonda yamanya dda abantu be, nga tebannaba kubaawo, era yabategeka bafaanane omwana we, omwana we alyoke abe omubereberye mu b'oluganda abangi.

ABARUUMI 8:29

Ekiruubirirwa kyaffe ekisookera ddala, mu bulamu bwaffe nga Abakristaayo kyandibadde kufaanana Kristo. Yesu kye kifaananyi kya Kitaffe kyennyini, n'olwekyo tulina okumugoberera. Yajja n'atandika enzikiriza yaffe era n'atulaga bwe tulina okubeera era n'okweyisa.

Tusaanye tugezeeko okweyisa mu bantu nga Yesu bwe yali. Ekiruubirirwa kyaffe si kwe kulaba engeri gye tunaaggaggawala, oba obumanyifu. Ekikulu kwe kuba nga Kristo, so si buggagga, obumanyifu oba okuzimba obuweereza obw'amaanyi.

Ensi teyeetaaga njiri yokka, wabula yeetaaga okulaba ebikolwa nga bigendera ku nzikiriza yaffe nga Abakristaayo. Obulamu bwaffe bwandibadde busaaliza abalala, okufuna enjala n'ennyonta (okwagala) kye tufunye mu Kristo. Bayibuli etuyita munnyo, ogukwasa abantu ennyonta, era ekitangaala ekimulisa mu nzikiza.

Abakristaayo abamu balina obupande ku mmotoka oba balina bye bambala mu bulago ebiraga nti Bakristaayo. Ab'ensi tebasikirizibwa

bupande buli ku mmotoka yadde bye twambadde mu bulago, baagala kulaba bibala bya Katonda mu bulamu bwaffe.

Baagala kulaba nga abantu abeeyita Abakristaayo beeyisa nga bwe babuulira mu njiri, si kubuulira balala njiri kyokka nga mu bulamu bwaabwe tekola.

Bayibuli etubuulira ku nkyukakyuka. Bwe tumuganya, Katonda atukyusa nga tusoma ekigambo kye ne tweyongera ne mu kitiibwa. Tulaba ekifaananyi kye mu kigambo kye yawandiika era ne kitufuukira endabirwaamu. Kwe kugamba nti tweraba mu kitangaala kya Bayibuli ne tulaba nti twetaaga okukyuka.

Bwe tunaatandika okumusaba atukyuse, ajja kutukyusa mpola mpola tusobole okumufaanana.

Ntera okulaba obupande ku mmotoka obugamba, “Mwattu gumiiikiriza Katonda tannaba kummaliriza.” Naye mu butuufu yamala, omulimu gwe yagumala bwe yatufiirira ku musalaaba. Tulina kukkiriza, era olwo ne tukifuna. Mu mwoyo, omulimu gwe ye, yagumala, naye mu mbeera eza bulijjo gugenda mu maaso buli lunaku mu bulamu bwaffe.

Bayibuli egamba nti oyo eyatutandikamu omulimu omulungi, era ajja kugumaliriza.

Nkakasiza ddala nti Katonda eyatandika omulimu omulungi mu mmwe, aliyongera okugukola, okutuusa lwe gulimalirizibwa ku lunaku Kristo Yesu lw'aliddirako.

ABAFIRIPI 1:6

Bwe ngamba nti tulina okubeera nga Kristo, mba ntegeeza ekiruubirirwa. Tetulina kumala kutuukirira okusobola okubuulira abantu ku Yesu, naye era bwe tuba nga tuli nnyo mu by'ensi kiba kizibu okubasikiriza.

Bye tuyaayaanira mu bulamu bikulu nnyo, era nga olumu kineeralikiriza okulaba nga olumu ffe nga Abakristaayo twongera okuyaayaanira eby'ensi, okujjako ffe tuteekako akabonero k'obukristaayo.

Eky’okulabirako:

Nze ndi muntu ayagala ennyo okutuukiriza ekiruubirirwa era nga ndi muntu alengera ewala era nga mbituukiriza. Bwe nnali nkyasoma nnalondebwa nga balaba nti nze muntu alabika okuyitamu mu bulamu. Katonda bwe yankwatako nanzijuzza Omwoyo Omutukuvu, ne ntandika olugendo olw’amaanyi ne Mukama. Nnali nnakkiriza Yesu okuba Mukama wange nga nnina emyaka mwenda. Natandika okugenda mu kkanisa buli kaseera nga nnina emyaka abiri era nga nkola ebintu bingi mu kkanisa. Twali tuli mu buli kabiina akamanyifu: twali ku kakiiko k’abakadde b’ekkanisa, naye nga nkubuulira amazima, obulamu bwange tebwalina njawulo n’abatakkiriza be nnali mmanyi ne be nnali nkola nabo.

Bwe nnafunna okubatizibwa kw’Omwoyo Omutukuvu, era nga mpitiddwa mu buweereza, nayongera okwewaayo ewa Katonda naye ngenda okwejuukiriza nga nkyayaayaanira ebintu ebikyamu. Nali njagala mpitemu nnyo mu buweereza; nga njagala obulamu bwange bubeere bwa mukisa, naye nnali siyaayaanira kufaanana Yesu n’omutima gwange gwonna.

OMUWENDO OGW’OKUSASULA

Kale Kristo bwe yabonyaabonyezebwa mu mubiri, nammwe mubenga bamalirivu nga ye, kubanga omuntu abonaabona mu mubiri aba amaze okuleka ekibi.

Alyoke amale obulamu bwe bw’akyasigazizza ku nsi, ng’agoberera ebyo Katonda by’ayagla, sso si ebyo ebitwaliriza abantu mu bubu.

1 PEETERO 4:1,2

“Okwefiiriza”, “n’okubonaabona”, bye bigambo ebitatera kunyumira Bakristaayo, naye ebigambo biri mu Bayibuli, era Yesu n’abagoberezi be baateranga nnyo okubyogerako. Okukula mu mwoyo, oba okufaanana Kristo, tebisoboka okuggyako nga omuntu asobola obuteerowoozako.

Kitegeeza nti ojja kugondera Katonda ate weefiirize yadde nga si kye wandyagadde.

Pawulo yayogeranga ku kufa buli kaseera. Yagambanga bw’ati: “Nze sikyali mulamu, naye Yesu ali mu nze.” Yesu yagamba abagoberezi be nti bwe baba baagala okumugoberera, balina okwetikka omusalaba buli lunaku. Bayibuli ekyogerako bw’eti:

Awo Yesu n’ayita ekibiina ky’abantu, n’abayigirizwa be, ne bajja w’ali, n’abagamba nti: “Buli muntu ayagala okuba omugoberezi wange, atekwa okwefeebya, ne yetikka omusaalaba gwe, n’angoberera.

MAKKO 8:34

Okugoberera Kristo era n’okufuuka nga ye, tulina okuba abamalirivu okwerabira ebyo byonna ffe bye twagala – pulaani zaffe, okubeera nga tufuna buli kye twagala, naye ne tumwesiga ye okutulaga ky’atwagaliza.

Ali tukulembera n’atutwala mu ssanyu eritakoma era ne tumatira, naye kitwalako akabanga okukimanyira ddala. Mu kusooka bwe twefiiriza bye twagala ne tukkiriza ebya Katonda okutukyusa, tusooka ne tutawulira bulungi mu buntu. Kwe kugamba nti mu buntu kiba kizibu era kya bulumi okwewaayo. Omubiri ogw’obuntu tegwagala kwefiiriza, kutawanyizibwa, yadde okulindirira.

1Peetero 4, gwe twogeddeko waggulu, agamba nti tulina okubeera n’ebirowooza bya Kristo eyabonaabona ku lwaffe. Kwe kugamba, tulina okulowooza nti, “Waakiri mboneebone nga ndi mu Katonda okusinga bwe mbonaabona nga siri mu Katonda. Bwe twewaayo okusasulira okwagala kwa Katonda nga tubonaabona, kijja kutuleetera okweyongerera mu maaso n’obuwanguzi, era obulumi bujja kumala buggwewo. Naye bwe tutabeera mu kwagala kwa Katonda tujja kubeera mu kubonaabona n’ennaku ebitakoma.

Bwe njogera ku kubonaabona, mba sigamba bwavu, endwadde oba obutyabaga. Mba njogera ku kubonaabona mu mubiri, okwerumya, n’okwefiiriza. Omubiri gulimu omwoyo, omutima, n’ebirowooza era

n'engeri ffe gye tusalawo okukola ebintu. Yaddde bino byonna tubirina, naye tuli mwoyo okusookera ddala, era Katonda yatuyita okutambulira mu mwoyo. Kino kitegeeza okugoberera ebiragiyo by'Omwoyo Omutukuvu, abeera mu mwoyo gw'omukkiriza wa Kristo. Omwoyo Omutukuvu y'alina okutulambika mu bulamu bwaffe nga Abakristaayo, ajja kutulambika mu mazima gonna n'ebya Katonda by'ayagala.

Nkukubiriza okwewaayo okusasula omuwendo, ekirabo kijja kuba kya maanyi.

Essuula

7

Kyusibwa

Bayibuli eyogera ku kufuuka, n'okukyusibwa. Mu Lukka ssuula⁹ Yesu yafuuka. Yagenda ku lusozi okusaba; Peetero ne Yokaana baali naye. Bwe yali asaba, endabika ye n'ekyuuka. Yakyuka, ebyambalo bye ne bitukula ne byakaayaka. Musa ne Eriya baali banyumya naye, nga boogera ku lw'anaava mu bulamu, ekyali kigenda okubeerawo amangu gye bujja. Era Peetero ne Yokaana bawuniikirira nnyo kubanga baali tebalabanga ku kintu bwe kityo. Peetero yali ayagala kuzimba nsiisira basigalire ddala ku lusozi, naye Yesu n'amugamba nti balina okuddayo wansi w'olusozi babeere n'abantu abalala.

Peetero, Yokaana ne Yesu, bonna baagenda ku lusozi era bonna baalaba ekyewuunyo kino. Yesu yali ayagala baddeyo wansi okubuulirira abantu; Peetero yali ayagala kusigalayo nga yeeyagala obulamu bwe bwonna.

Okiraba nti Yesu yakyusibwa nga asaba. Wadde Bayibuli tegambira ddala nti yali asinza, mmanyi Yesu yasinzanga nga asaba. Era nsuubira essaala ze zaali zisingamu kutendereza okusinga okusaba. Kino ffenna kituyigiriza. Bwe tuba twagala okulaba enkyukakyuka ennungi mu bulamu bwaffe, tusabe, tutendereze, era tusinze mu kifo ky'okuzimba ensiisira. Ebiseera ebisinga tubeera twefulukuta mu kuzimba bintu byaffe, ne tutamanya nti Katonda alina eby'amaanyi by'ayagala okukola mu bulamu bwaffe, wadde ensonga lwaki abikola. Katonda tayagala tufaanane bufaananyi Yesu olwo tulyoke tusobole okweyagalira mu bulamu. Ayagala twongere okumala obudde naye nga tusaba, ne mu kigambo, tukyusibwe, tuddeyo abantu gye bali, era tweyongere okubayamba.

KYUSA OLUNAKU LWO BWE LUNAAGENDA

Bw'ozuukuka nga oli mu mbeera mbi, ekisinga, funayo ekifo, obeereyo ko ne Mukama. Bwe tubeera naye kitukyusa. Tusobola okukyusa olunaku bwe lunaagenda wadde sitaani aba atutegekede ebibi, singa tuyiga amangu okunoonya Katonda nga twakawulira empisa yonna etafaanana ya Yesu.

Ye w'atali tewali kye tusobola kukola (Yokaana 15:5), naye mu ye tusobola okukola byonna. (Abafiripi 4:13.) Kati nze njize nti nja kuba nga nnina bwe mpulira naye sirina kubigenderako. Sisobola kubirwanyisa nzekka, naye bwe nsaba Mukama obuyambi, ajja kumpa amaanyi ntambulire mu mwoyo sso si nga bwe mpulira.

Ate omuntu bw'atuyisa obubi oba n'atunyiiza? Bayibuli egamba nti tetulina kwenyiizanyiiza wadde okuba n'entondo; ffena tugambibwa okusonyiwa amangu abo abatuyisa obubi.

Tuyinza okwagala okukola obulungi naye ne tweesanga nga kizibu. Olwo lwe tulina okusaba, tubeereko ne Mukama, tugende mu kigambo kye, era twebuulirire mu bigambo ebimu mu Bayibuli ebikwata ku mbeera gye tubeeramu. Ekinaavaamu nze naawe tujja kufuna amaanyi okukola ekituufu.

Jjukira nti tuli mu lutalo, tuli baserikale mu maggye ga Katonda, era tulina okuba abeetegefu obudde bwonna okukozesa eby'okulwanyisa byaffe. Ebimu ku by'okulwanyisa ebyo mwe muli essaala, okusinja, okutendereza, era n'ekigambo kya Katonda.

WEEKUUME ENDABIKA YO

Mukama n'agamba Musa,

*Tegeeza Alooni ne batabani be nti bwe banaabanga basabira
Abayisirayiri omukisa, baagambanga bwe bati nti:*

Mukama akuwe omukisa akukuume,

Mukama akusanyukire, akukwatirwe ekisa;

Mukama akutunuulize amaaso ag'ekisa, akuwe emirembe,

OKUBALA 6:22-26

Endabika ya Yesu yafuuka ku lusozi bwe yali nga akyusibwa. Endabika yaffe y'engeri gye tutunula. Endabika etegeeza, bwe tufaanana mu maaso. Mu kkanisa ennaku zino, tulina okufayo ku ndabika yaffe.

Ogumu ku mikisa gye baasabira abantu ba Katonda gwali nti endabika ya Katonda ebaakire era abatunuulize amaaso ag'ekisa.

Ensi bw'etutunuulira, esaanidde okutulabamu eky'enjawulo. Tebasobola kusoma biri mu mitima gyaffe wadde mu birowoozo byaffe, n'olwekyo, endabika yaffe ye ngeri yokka gye tusobola okubalaga nti tulina kye batalina, naye nga bakyagala era bakyetaaga.

Yesu bwe yatandika okusaba, n'okunyumya ne Katonda, endabika ye yakyuka, naffe twetaaga ekyo kyennyini kitutuukeko.

Endabika yaffe nkulu nnyo. Endabika gye tulabikamu ku mulimu nkulu. Eddoboozi lye twogeramu n'abantu baffe ewaka, kkulu. Kikulu okusekera ku balala, okuba nga twogera bulungi, era nga tuli basanyufu eri bannaffe.

Mmanyi tulabika bulungi nga tusinza Katonda. Okusinza kituletera akamwenyumwenyu ku matama. Kizibu okubeera n'emitaafu mu kyennyi nga twebaza, tusinza era nga tutendereza Katonda. Bwe tunaakikolanga buli kaseera, tujja kubeera nga tulabika nga ye, era ebitutawanya munda tebijja kubeerawo.

Ndwooza tulina okusoma omusomo ku kye mpita, "omusomo gw'omumaaso g'abantu." Twetaaga okwongerera okumala ekiseera nga tusinza Katonda. Olwo amaaso gaffe ganaayolesa ekitiibwa kye.

Abakristaayo bandibadde bantu abasanyufu abatambulira mu kwagala. Tulina okwebuuzza, "Abantu bayinza okumanya nti ndi Mukristaayo bwe bantunuulira mu maaso?" Nzijukira lumu nnali mu lukungaana mu kibuga Florida, nnayingira mu kizimbe ku makya, bwe nnali ntambula mu lukuubo omukazi n'ayogera nange. Nnamuddamu nga anamusizza, n'agamba, "Nkulaba obadde ne Yesu."

Yali mutuufu, nnali mmaze ekiseera kinnene ku makya nga nsaba era nga nnyumya ne Mukama, bwe nnali nga neetegeka okusomesa ku olwo. Yamanya atya nti mbadde ne Yesu? Waliwo ekyali mu ndabika yange ekyamubuulira. Osanga nnalabika nga ndi musanyufu, nga ndi mumativu, oba nga nnina eddembe. Simanyidde ddala ki kye yalaba naye waliwo ekyali ku ndabika yange ekyamumanyisa gwe mbadde naye.

TWONGERE OKUTENDEREZA OKUSINGA OKUSABA

Yesu bwe yava ku lusozzi, ekibiina ky'abantu ne kimugoberera.

*Awo omugenge n'ajja gy'ali n'amusinza, n'amugamba nti:
"Ssebo, singa oyagala, oyinza okumponya."*

*Yesu n'agolola omukono n'amukwatako, n'agamba nti:
"Njagala, wona."*

MATAYO 8:1-3

Tetukyalaba bigenge mu Amerika nze gye nsibuka, naye waliyo ensi endala ebigenge gye biri. Wadde nga ffe tetulina bigenge birabika ku mubiri, tulina ebigenge eby'omwoyo.

Emirundi mingi tugenda ewa Katonda okutuwonya, okusumululwa, oba okutuwa obuwanguzi, era nga twagala kutuukira ku nsonga tumubuulire kye twetaaga. "Mukama neetaaga okuwonyezebwa, sikyasobola kugumiikiriza bulumi buno. Olina okubeerako ky'onkolera Mukama, olina okukyusa embeera yange."

Naye omusajja ono bwe yajja ewa Yesu okumuwonya ebigenge, yasooka kumuvunnamira era n'amusinza. N'alyoka amusaba, "Mukama, nsaba omponye."

Wano waliwo obubaka obw'amaanyi bwe tubadde tubuusa amaaso: Okusinza kwetaagisa okusooka okusaba. Mu ssaala zaffe kyetaagisa mubeere mu kutendereza okusinga okusaba.

Kirungi okusaba Katonda ebintu. Bayibuli etuyigiriza okukikola, naye sikkiriza nti wetwanditandikidde okunyumya ne Katonda. Kye tusookerako okwogerako ebiseera ebisinga kye kiba kitusingira obukulu.

Lumu Mukama yansoomooza okwekenenya essaala z'omutume Pawulo ennyingi ezisangibwa mu Bayibuli. Neewunnya nnyo bye nnazuula era n'ezimmatiza nti nze bye nnali nkulembeza mu kusaba si bwe byandibadde.

Pawulo yasabira Abaefeso, okumanya, era n'okuyiga omukwano gwa Katonda, era n'okubikkulirwa ebikwata ku maanyi ga Katonda ge balina. Abafiripi yabasabira okulondako ebintu ebisingira ddala obulungi. Mu Bakkolosaayi yasaba nti abantu bafune amaanyi aganaabayamba okugumiikiriza n'essanyu. Era yasaba ebintu ebirala ebirungi bingi, naye gye nayongera okwekenenya essaala ze, talina kya kufuna kye yasaba. Yali asinga kulumirwa bintu bya mwoyo okusinga eby'omubiri. Essaala ze era zaali zijjudde okwebaza, nga kino kika kya kutendereza na kusinza. Yagamba, nti buli lwe yasabanga, yeebazanga Katonda, olwabo, abamweyungako mu kuweereza. Tusaanye okwebaliza abantu Katonda be yatuwa okutuyamba mu bulamu bwaffe ne mu buweereza.

Nkikakasa Pawulo yasabiranga ebyetaago bye eby'omubiri naye tebyatwala budde bwe bungi. Era tulaba ebintu bye bimu mu ssaala za Yesu. Teyamala budde mu kusabira byetaago bya mubiri; yafukamira mu lusuku n'asaba okunywezebwa okukola Katonda by'ayagala. Bwe yakoowanga okubuulira abantu, yalinnyanga ku lusozi okusaba, era nkakasa yalinga mu kutendereza si mu kusabiriza Katonda.

GULUMIZA MUKAMA

Mujje tugulumize Mukama, ffenna tumutendereze.

ZABBULI 34:3

*Nnaatenderezanga Katonda nga nnyimba,
nnaamugulumizanga nga mmwebaza.*

ZABBULI 69:30

Ekigambo okugulumiza kitegeeza okugezza. Bwe tugamba Katonda nti “Nkugulumiza,” tuba tugamba, “nkugezza okusinga ekizibu kyonna wadde ekyetaago kyonna kye nnina.” Mmaze emyaka nga nnyimba

ennyimba ezikwata ku kugulumiza Katonda naye nga sitegeeranga kigambo ekyo kye kitegeeza. Kino tukikola nnyo. Tuyimba ne twogera ku bintu bye tutategeera bulungi. Bibeera bigambo bugambo bye tuyiga mu kkanisa.

Tulina okugulumiza Mukama, era ekyo kitegeeza nti tulina okumugezza okusinga ekintu kyonna mu bulamu bwaffe. Bwe tumusinza n’okumutendereza, ekyo kyennyini kye tuba tukola. Tugamba, “oli munene nnyo, oli mukulu nnyo kye nva nkusinza.” Bwe tusoosa okusinza, era tuba tugamba, “Oli munene okusinga ekyetaago kyonna kye nnina.”

AMAANYI AGALI MU KUSINZA

Kubanga kyawandiikibwa nti:

Mukama agamba nti: nga bwe ndi omulamu, buli muntu alinvunnamira na buli lulimi lwatule nti nze Mukama.

ABARUUMI 14:11

Nkakasa nti bwe tuba tusinza Katonda, ekiseera ekimu tulina okubeera mu ngeri ey’okusinza. Tusaanye tufukamire, tumuvunnamire. Kino kiraga obwetoowaze, n’okutya Katonda. Kano kabonero akalaga ekituli munda mu mitima. Sitaani tasobola kulaba mu mitima gyaffe naye asobola okulaba nga tufukamidde okusinza Katonda.

Mu Bafiripi 2:10,11 Bayibuli etugamba nti, **bonna abali mu ggulu, n’abali ku nsi, era n’abali wansi w’ensi balyoke bafukaamirirenga erinnya lya Yesu, era bonna baatulenga nti Yesu Kristo ye Mukama, Katonda Kitaffe alyoke aweebwe ekitiibwa.** Ate mu 1 Timoseewo 2:8 omutume Pawulo atugamba, **n’olwekyo njagala abasajja, buli wantu beegayirirenga Katonda, nga bayimusa emikono gyabwe emirongoofu, nga tebalina busungu wadde empaka.**

Okuyimusa emikono nako kabonero ka kusinza. Lwaki tulina okukola obubonero buno bwonna? Ekiri mu mitima gyaffe tekimala? Nga bwe nagambye sitaani tasobola kulaba kiri mu mitima gyaffe naye

asobola okulaba ebikolwa byaffe era awulira bye twogera. Bw'atulaba ebikolwa byaffe n'engeri gye tulimu nga tusinza Katonda, sitaani atandika okutya. Akimanyi tasobola kulimba na kufuga muntu asinza.

Sitaani asobola okulaba ekikolwa eky'okuwanika emikono, era amanyi ekigenda mu maaso bwe tuvunna. Kati bino bika bya kusinza era tukimanyi nti ebikolwa bino bwe bitagenderako mutima mutuufu bya bwereere. Tulina okulaba nti byonna bigendera kumu. Embeera y'omutima gwaffe erabisa eby'omu mwoyo, ate ebikolwa byaffe n'ebigambo bibirabisa mu by'ensi.

Eyo ye nsonga lwaki Bayibuli egamba okulokolebwa tulina okukkiriza mu mutima gwaffe, n'etwatula n'akamwa nti Yesu yafa n'azuukira okuva mu bafu.

Bw'oyatula n'akamwa ko nti: Yesu ye Mukama, era n'okkiriza mu mutima gwo nti Katonda yamuzuukiza, olirokolebwa.

Omuntu akkiriza na mutima gwe n'aba omutuukirivu, era ayatula na kamwa ke n'alokolebwa.

ABARUUMI 10:9,10

Eno y'emu ku mpagi gye tuyinza okusubwa ate ne tugwa mu katyabaga. Tulokolebwa lwa kukkiriza, naye Yakobo agamba nti okukkiriza nga tekuliko bikolwa kuba kufu. Nnyinza okukkiriza nti Katonda asaanidde okusiinzibwa, naye bwe sigenda mu maaso ne mmusinza tewali kye kiteegeeza. Nnyinza okugamba nti nzikkiririza mu kuwa eky'ekkumi, naye bwe mba nga sikiwa era tekijja kuyamba bya nfunu byange.

Okubatizibwa mu mazzi nakyo kyakulabirako kye kimu. Ke kabonero akalaga ebweru nti osazeewo okugoberera Kristo. Bayibuli etuyigiriza nti bwe tukkiriza Kristo okubeera omulokozi waffe, tuba tuzaaliddwa buggya. Okubatizibwa mu mazzi tekiteekawo nkolagana wakati w'omuntu ne Katonda, ekyo kijja olw'okuzaalibwa obuggya. Bayibuli engaziye egamba nti okubatizibwa n'amazzi kulaga kye tukkiriza nti kyaffe nga tuyita mu kuzuukira kwa Yesu Kristo.

Beera muvumu, - kolawo akatiisa oyatule okutendereza n'okusinza. Abantu bangi bagaana okwogera ku Katonda. Bagamba, nti eby'eddiini bya ssekinnoomu. Sirabangako muntu yenna mu Bayibuli eyasisinkana Yesu n'akikuuma nga kyama. Bw'ajjula mu mitima gyaffe, amawulire amalungi, gava mu kamwa kaffe. Bwe tukyamuka ne tumutendereza era ne tumusinza, tewasobola butabaawo kirabika mu maaso gaffe. Abantu ababeera mu kkanisa nga beewombese, bonna basibye emitaafu, nga tebaagala kwenyenya, bandisomye mu bayibuli ebikwata ku kutendereza n'okusinza balabe Dawudi n'abalala bwe baasinzanga Katonda.

Tetusinza ku lwa Katonda yekka, naye okusinza kulimu amaanyi agayuguumya eggulu, ensi, ne geyeena. Sitaani yekka si y'alaba abafukamidde nga basinza, n'eggulu liraba. Omuntu asinza akwata eriiso lya Katonda. Eggulu lijjudde okusinza n'okutundereza.

Bo abakadde amakumi abiri mu abana ne bavunnama mu maaso g'oyo atudde ku ntebe ey'obwakabaka, omulamu emirembe n'emirembe, ...

OKUBIKKULIRWA 4:10

Ekifaananyi kino eky'eggulu ekyogerwako wano, bakiddingana emirundi egiwerako mu kitabo ky'okubikkulirwa. Tusaba olutatadde ... **by'oyagala bikolebwe ku nsi, nga bwe biri mu ggulu.** N'olwekyo tukozese eby'omuggulu nga tusinza nga tukyali wano ku nsi.

Beera omukristaayo owakabenje – fuuka nga Kristo, okutendereza kwo kusinge okusabiriza, wanyisa obweralikirivu ofunemu okusinza era obeere n'ekifuba mu kwogera nga bw'owulira ku Mukama.

Essuula

8

Okusinza n'Essaala

Yesu yali akyagamba ebyo, omukungu omu n'ajja n'amufukaamirira, n'agamba nti: "Muwala wange yaakafa, naye jjangu omukwateko, anaalamuka."

MATAYO 9:18

Ekyyo kyennyini kye kyabeerawo. Yesu yagenda n'akwata ku muwala n'azuukira.

Naye laba omufuzi kye yasooka okukola – si kye yaseembyayo, naye kye yasooka. Teyasooka kulinda kulaba kwolesebwa kwa ky'amagero, n'alyoka asinza Yesu. Yamusinza nga tannaba kumusaba kukolera mwana we kintu kyonna.

Mirundi emeka gye tusabye Katonda okukyusa abantu baffe nga tetumaze kutwala budde kusooka kumusinza? "Katonda olina okukyusa abantu bange. Sikyasobola kukigumiikiriza bw'oba tobakyusizza. Olina okubakyusa era kye kyo kyokka."

Ki ekiyinda okubeerawo singa mu kifo ky'okukola bwe tutyo tufukamira ne tusinza Katonda, ne tumuwa ekitiibwa, ne tumwebaza era ne tumutendereza? Lwaki tokyongera yo n'otuukira ddala wansi, ne weeyala ku ttaka nga Eriya bwe yakola ku lusozi Kalimeeri oba Yekosafaati bwe yakola nga alindirira Katonda okumuwa obuwanguzi ku balabe be? Twetaaga okugamba ebintu nga bino, "Ayi Katonda nkunsiza. Ngulumiza erinnya lyo, Mukama. Osaanidde okutenderezebwa. Ompa amaanyi nga nnafuye. Onsobozeza okukola bye sandisobodde kukola nga siri naawe. Nkimanyi ayi Katonda, nti onjagaliza birungi byokka. Oli mulungi Kitange, era mmanyi nti obulungi bwo bujja kweyoleka

mu bulamu bwange. Nzikiriza nga kati okola mu bulamu bwange ne ku mbeera zange. Era nzikiriza nti onkyusa n’abenganda zange, n’emikwano gyange. Mmanyi nti okola ku abo abatannaba kukukkiriza nga omulokozi waabwe. Mmanyi nti bajja kukukkiriza, bajjuzibwe Omwoyo Omutukuvu era booleke embeera zo mu bulamu bwabwe. Nkusinza Katonda, olw’omulimu gw’okola kaakati era n’olwobwesigwa bwo.”

Osubira ki ekyanditandise okubeerawo? Nsubira twanditandise okulaba enkyukakyuka mu bulamu bwaffe ne mu mbeera zaffe, era n’enkyukakyuka mu bantu be twagala. Enkyukakyuka ejja luvannyuma lwa kusinza Katonda, si nga tonnaba.

OKUSINZA N’OKUKKIRIZA

Omukazi Omukanaani, munnansi w’ekitundu ekyo, n’ajja gyali, n’aleekaana ng’agamba nti: “Nkwatirwa ekisa, Ssebo, Omuzzukulu wa Dawudi! Muwala wange aliko omwoyo omubi, gumubonyaabonya!”

Kyokka Yesu n’atamuddamu kigambo. Abayigirizibwa be ne bajja wali ne bamwegayirira nti: mugobe , kubanga ajja atuleekaanira.”

MATAYO 15:22,23

Nze ndowooza ensonga lwaki Yesu yali tannaba kuddamu mukazi ono lwa kuba yali tannaba kusinza. Yatandika butandisi kumugoberera nga amubuulira kye yeetaga.

Yesu n’addamu, nti: “Saatumibwa walala okuggyako eri abantu ba Yisirayiri abaabula.”

MATAYO 15:24

Mu kifo ky’okumuyamba, yatandika kwogerera kukkiriza kwa mukazi.

Awo omukazi n'ajja n'asinza Yesu nga bw'agamba nti: "Ssebo, nnyamba!"

Yesu n'addamu nti: "Si kirungi okuddira emmere y'abaana n'esuulirwa obubwa."

MATAYO 15:25,26

Olwatandika okumusinja, yava ku kwogerera okukkiriza kwe n'atandika okumusoomooza, naye omukazi naye nga tamuvaako.

Omukazi n'agamba nti: "Weewaawo Ssebo, naye n'obubwa, bulya ku bukunkumuka obuva ku mmeza ya bakama baabwo."

Yesu n'amuddamu nti: "Mukazi wattu, olina okukkiriza kunene! Kikukolerwe nga bw'oyagala." Muwala we n'awona mu kiseera ekyo.

MATAYO 15:27,28

Eky'amagero ky'omukazi ono tekyajja okutuusa nga ebintu bibiri bimaze okusalibwawo: 1) nti yalina okukkiriza, ne 2) nti yali agenda okusinza Katonda.

OKUSINZA KISINGA KU NKOLA

Sigezaako kugunjawo mateeka ga ssaala eziddibwamu. Nga bwe nagambye, Katonda alaba omutima gwaffe, era n'amazima g'omutima gwaffe kye kimusingira obukulu. Okusinza Katonda nga tetunnaba kumusaba kye twagala si nkola yokka tugambe okukola nga omufuusa okusobola okutufunira kye twagala. Okujjako nga okusinza kwaffe kwa ddala era nga kuviira ddala mu mutima ogusiima era ogutendereza, eby'okufuna okuddibwamu tubiviireko ddala. Okuba nti buli kumakya tukeera ku maviivi gaffe ne tutendereza era ne tusinja tekitegeeza nti buli kye twagala kijja kuyitamu buyisi oba kikyuke nga bwe twagala.

Eky'okuba nga tuvunnama ne tuwanika emikono tekitegeeza nti tujja kufuna buli kye tusaba mu ssaala.

Kano si kakodyo ka kugoberera okufuna kye twagala okuva eri Katonda. Bwe tukitwala ne tukikozesa bwe tutyo tewajja kubeerawo maanyi.

Embeera y'omutima entuufu – ogw'amazima, era nga gwagala Katonda mu butuufu, nga gwagala okukola ky'ayagala, ye nsibuko y'amaanyi. Oluvannyuma lw'ekyo, akakodyo kasobola okukozesebwa okuyisamu amaanyi. Katonda okusookera ddala akwatibwako ensonga eri ku mitima gyaffe. Buli kaseera anoonya "lwaki kiri bwe kityo". Kwe kugamba, Katonda tafa ku bye tukola byokka, naye ayagala kumanya ensonga lwaki tubikola.

Bwe tuba tusinza Katonda munda ne wabweru, era nga tukkiriza nti yekka yasobola okumala ebizibu byaffe, era n'okutuukiriza ebyetaago byaffe, olwo lwokka lwe tujja okulaba ebiva mu saala zaffe nga birungi era nga n'esaala zaffe ziddibwamu.

EKYETAAGO KY'OKUSINZA OKW'AMAZIMA

Naye ekiseera kijja, era kituuse, abasinza mu ngeri entuufu, basinzenga Kitaffe mu mwoyo era mu mazima, kubanga Kitaffe abamusinza bateekwa okumusinza mu mwoyo era mu mazima.

Katonda mwoyo, n'abo abamusinza bateekwa okumusinza mu mwoyo era mu mazima.

YOKAANA 4:23,24

Olumu tuyingira mu kkanisa ne tuwulira omwoyo ogw'okusinza nga gw'amaanyi mu bantu. Tusobola okulaba nga bali mu maaso ga Katonda nga bamusinza mu mazima. Naye olumu wabeerawo abantu nga bo bageegeenya bigambo nga tebatendereza n'akusinza n'omutima gumu. Tetwandimuwadde kitiibwa na mimwa naye nga emitima gyaffe giri wala okuva gy'ali.

Omusajja lumu yambuulira okwolesebwa kwe yafuna. Yali mu kkanisa nga abantu bali mu kutendereza n'okusinza. Mu kiseera ekyo

Katonda n'ayogera naye n'amugamba nti, "Ngenda kukulaga abantu muno abansinza ddala. Waliwo ekitangaala ekiva ku buli omu."

Omusajja yagamba nti ku bantu bonna abaali mu kkanisa, abantu nga basatu oba bana abaaliko ekitangaala. Abasigadde baali bagenderako bugenzi naye nga ebirowoozo byabwe biri ku kintu kirala.

Bwe tusinziza awaka ffekka ndowooza tuyinza obutafuna bitutaataaganya., naye era olumu emyoyo gyaffe gitera okutambula ne gigenda ku bintu ebirala. Tulina okweyigiriza okubeera ku Mukama yekka nga tumusinza.

Ntera nnyo okukubiriza abantu bakuume obudde nga bajja mu kkanisa baleme kutaataaganya abalala abagezaako okuyingira mu kutendereza n'okusinza bo nga bagezaako okufuna ebifo. Bwe tuba tetusobola kukuuma budde kyandisinzeko singa tulindako emabega okutuusa nga okutendereza n'okusinza biwedde, okulaga ekitiibwa n'okutya Katonda n'abantu be. Waliwo ne kkanisa ze ngenzeemu nga baggalawo enzigi bwe bataandika okutendereza n'okusinza, kati abajja nga buyise tebasobola kuyingira okutuusa nga biwedde. Babeera nga bawulirira mu mizindaalo nga bwe balinda okufuna ebifo. Abantu abamu bayinza okugamba nti kino kikakali nnyo naye kiyinza okuwaliriza abantu okukuuma obudde.

N'ekirala ky'osobola okukola kwe kufuna ekifo emabega gy'otajja gutaataaganya balala.

Ffenna waliwo lwe tukeerewa olw'ensonga ezitali zimu, naye waliwo abalina omuze ogw'okukeerewa. Wadde okusaba kutandise ssaawa mmeka ye aba ajja kukeerewa.

Kibi nnyo okuba nga tutaataaganyizibwa mangu. Sitaani asobola okukikozesa okutulemesa okuyingira mu kutendereza okwa waggulu wadde okusinza okw'amaanyi. Waliwo enjawulo mu kuyimba ennyimba n'okugendera ddala mu maaso ga Katonda. Twagala okutendereza n'okusinza Katonda n'emitima gyaffe gyonna.

Nze ntera okuyimirizamu okutendereza mu nkugaana zaffe ne mpanjagira abantu beetegereze ebigambo bye bayimba. Mba nsobola

okulaba nga bangi ku bo baddamu buzzi bigambo nga bwe bamagamaga mu bantu, nga bwe balaba abagezaako okutereera. Ekyyo sikyagala kubanga mmanyi nti okutendereza n'okusinza Katonda tebiyamba nga abantu tebali ku kye bajjiridde. Bwe mmala okubawanjagira bwe ntyo ndabawo enjawulo ya maanyi mu mwoyo. Abantu bagezaako obutasasamala. Ekivaamu kwe kufuna omukisa ogw'amaanyi, era n'okubeerawo kw'Omwoyo Omutukuvu, kuyingira mu kifo.

Okuzingako, ekisookera ddala kwe kukakasa nti embeera y'omutima gwaffe ntuufu. Ekiddako tulina okwatula, sitaani alabire ddala nti tusinza.

EBIKOLWA EBIRANGIRIRA

Buli lwe munaalyanga ku mugaati guno, era buli lwe munaanywanga ku kikopo kino, munaategezanga abantu okufa kwa Mukama, okutuusa lw'alijja.

1 ABAKKOLINSO 11:26

Mmanyi nti okusembera ku mmeeza entukuvu y'engeri endala gye tusobola okulaga wabweru ekigenda mu maaso munda. Bayibuli egamba nti buli lwe tunaalyanga omugaati, ne bwe tunaanywanga ku kikopo, tunaajjukiranga omubiri gwa Kristo, n'omusaayi gwe era n'okulangirira okufa kwe okutuusa lw'alijja.

Twetaaga okutegeera nti bwe tusembera ku mmeeza entukuvu, tuba tulangirira okukkiriza nga tuyita mu bikolwa byaffe so si ebyo byokka bye tukkiriza mu mutima.

Abantu batera okugamba nti omutima gwange "guli bulungi", naye abantu tebasobola kusoma kiri mu mitima gyaffe, basobola kulaba bikolwa byaffe byokka. Ekyyo kya busiru nga omusajja okugamba mukyala we nti olina okumanya nti nkwagala; saakuwasa? Naye nga talimulaga kwagala oba okumuwa ensonga yonna mu birowoozo bye wadde mu mwoyo okumukkiriza. *Kikulu okulaga n'ebikolwa byaffe, kye tukkiriza mu mutima gwaffe.*

Bwe nsembera ku mmeeza entukuvu, mbeera ngamba, “Yesu Mukama, nga bwe ndya omugaati guno, ndya ggwe omugaati gwange omulamu. Kasita nkulya era n'embeera naawe, siriddamu kulumwa njala. Nga bwe nnywa eky'okunywa kino, nkinywa nga amazzi amalamu. Kasita nganywa nga ndi mu ggwe, siriddamu kulumwa nnyonta, ndi kkuta okutuusa ku ddaala nga sitawanyizibwa wadde nga wabweru waliwo mbeera ki. Nnangirira nga nsembera ku mmeeza entukuvu, Yesu Mukama, nti ggwe wekka gwe neetaaga okubeera mu bulamu obw'essanyu era obutuukiridde.

Era ngenda mu maaso ne ngamba: “waliyo ebintu ebirala bingi bye nandyagadde okuba nabyo era n'okunyumirwa. Nsobola okubyesonyiwa singa kisoboka, naye gwe sisobola kubeerawo nga toliwo. Gwe kyetaago kyange ekisookera ddala.

Bwe tutandika okukola bwe tutyo, sitaani atandika okutya. Sitaani amanyi nti bwe tuyingira mu mukwano bwe gutyo ne Mukama, aba takyasobola kutukozesa.

KIRANGIRIRE N'EBIKOLWA

*Abantu mwenna mukube mu ngalo, mutendereze Katonda
mumuyimbire n'essanyu!*

ZABBULI 47:1

Bayibuli etulagira okuzina, okukuba ebivuga, n'okukola byonna bye tusobola okusinza Mukama. Tukyetaaga, kitusumulula, kiweesa Mukama ekitiibwa era kiyamba mu kuwangula sitaani.

Tekimala kugamba bugambi nti, “Katonda amanyi bwe mmukkiriza, n'olwekyo, tekineetaagisa kubatizibwa.” Oba okugamba, “Katonda amanyi nti mpulira bubi olwe bibi byange, n'olwekyo tekyetaagisa kubikkiriza na kubyenenya.” Tulaba bulabi nti ebyo biba bya kisiru, era abantu bonna ab'enzikiriza ez'enjawulo bakkiriza nti twetaaga okubatizibwa n'okwenenya ebibi byaffe. Naye ate, si kwe kugamba nti enzikiriza zonna zisomesa abantu okwatula okutendereza n'okusinza mu lwatu.

Nagendanga mu kkanisa emanyiddwa ennyo mu nsi yonna. Twayimbanga ennyimba okuva mu katabo k'ennyimba ng'etteeka, mu kusaba, tewaliyo kikolwa nga kukuba mu ngalo, okuzina oba okuwanika emikono. Era nga omuntu bwe yakolanga ebintu bino nga awulira nga akoze ensobi ennene. Bayibuli eyogera ku bintu ebyo byonna naye ekkansa eno, n'ekansa endala nnyingi nga ziraga nti okwewombeeka kwe kulaga okusinza okutuufu. Kituufu twetaaga ebiseera eby'okwewombeeka n'okusirika naye era twetaaga okusumulukuka nga bwe tuwulira mu kusinza.

Siwagira kuyitiriza. Ffenna tumanyi nti waliwo abantu ababeera nga bayitiriza, era nga basobola okujagalaza abalala. Twetaaga obutayitiriza. Olw'okuba abantu abamu bayitiriza, enzikiriza ezimu kye zaava zibigaanira ddala. Nze mmanyi nti singa tufuna okusumulukuka nga bwe tuwulira, mu ngeri entuufu, mu kutendereza n'okusinza osanga tetwandiyitiriza. Engeri gye tuwuliramu, egendera ku mubiri, ebiwoozo, era n'omwoyo. Katonda yatuwa okuwulira munda era tulina okubiribirira nga bwe tulibirira ebitundu byaffe ebirala. Tetulina kugendera ku bye tuwulira naye ate kubanga bagamba kituleetera obutasalawo bulungi kyokka tetusobola kubikuniza.

Bwe nalinga ntudde mu kkanisa eyogewako waggulu, walingawo bwe nawuliranga nga nzijjude munda. Nga mpulira neetaaga okubako engeri gye mbiraga naye nga simanyi bwe nkikola. Ndowooza kya nnaku obutasomesa bantu nti balina eddembe okulaga bwe baagala Katonda mu ngeri ennungamu. Kikyamu okutya ennyo ebintu okuyitawo ate olwo ne tubiggirawo ddala.

Buli omu ku ffe asobola okwogera ku nzikikiriza ye, “Ffe bwe tutyo bwe tukola ebintu.” Nze ndaba eyo si ndowooza ntuufu. Ffenna tulina okubeera abetegefu okukula ekitegeeza okukyukakyuka. Yesu yagamba nti tasobola kuteeka mwenge mupya mu nsawo ezamaliba amakadde, ekitegeeza nti ebintu ebimu ebikadde birina okukyusibwa. Baali balina okuleka ebintu ebikadde ne batwala ebipya. Okumanya n'okubikkulirwa bigenda mu maaso; era ekintu bwe kiba tekitambula kiba kiri kumpi kufa.

Nkukubiriza okutandika okwatula mu kutendereza n'okusinza kwo awaka bw'oba nga ogenda mu kkanisa gye kitakkirizibwa okukikolera mu lujjudde. Era nkukubiriza okusabira enkyukakyuka buli omu asobole okusomesebwa okusinza Katonda nga bw'asaanidde okusinziyibwa.

KIRANGIRIRE N'EBIGAMBO

Kale tuweeyo eri Katonda ekitambiro eky'okumutenda, nga tukiyisa mu Yesu, nga twatula erinnya lye n'emimwa gyaffe.

ABEBBULANIYA 13:15

Kye twogera okuva mu kamwa kaffe kya kulwanyisa ky'amaanyi ku balabe baffe. Engero, 18:21 lutuyigiriza nti amaanyi g'obulamu n'okufa gali mu lulimi. Tusobola okwogera obulamu gye tuli ne twogera okufa ku ntegeka z'omulabe. Ebigambo ebyebaza, bifufuggaza omulabe, tayagalira ddala kuwulira muntu asiima obulungi bwa Katonda.

Abebbulaniya 4:12 lutosomesa nti ekigambo kya Katonda kyogi nga ekitala eky'enjuyi ebbiri. Mmanyi nti oluuyi olumu luwangula sitaani, ate olulala ne luggula eggulu. Batugamba mu Abeefeeso 6:17 nti ekitala Omwoyo Omutukuvu ky'akozesa, ekigambo kya Katonda, kye kimu ku bitundu by'ekyambalo kye bambala okusobola okulwana olutalo lw'omwoyo.

Dawudi omuwandiisi wa Zabbuli yateranga okugamba bw'ati, **nja kwogeranga ku Mukama, kye kiddukiro kyange, era mweneekweka, Katonda wange; kwe neesigama era gwe neemalirako, era gwe neesiga!** Osanga twandyebuuzizza, “Mukama mmugamba ki? Twetaaga okwatula ebintu si kubirowoozako bulowooza. Omuntu ayinza okulowooza, “nzikiriza ebintu byonna ebirungi ku Mukama,” naye olina ky'ogamba ekikuyamba? Emirundi egisinga abantu bagamba nti balina kye bakkiriza, naye ate ky'otasubira kye kiva mu kamwa kaabwe.

Twetaaga okwogera ku Katonda mu lwatu. Twetaaga okukikolera mu kifo ekituufu era mu budde obutuufu, naye nga tweetaaga okukyogera. Leka okwatula kubeere nga kimu ku bintu by'okola nga

oyogera ne Katonda. Ntera okutambulatambula ku makya. Nsaba, ne nnyimba, era ne njatula ekigambo. Buli lwe ngamba nti, “Katonda ali ku ludda lwange. Era nsobola okukola kyonna kyaba antumye.” Oba, “Katonda mulungi, era alina entegeka ennungi ez’obulamu bwange. Emikisa gijja gingoba era ne gibooga mu bulamu bwange.” Kino kyenkanankana n’okufumita sitaani ne kiso ekyogi.

Yatula okusiima kwo, okutendereza n’okusinza. Yimba ennyimba ezijjudde okutendereza n’okusinza Katonda mu ddooboozi eddene. Beerako ne ky’okola ekikanga omulabe!

AMAANYI G’OKUWANIKA EMIKONO

*Ayi Katonda, ggwe Katonda wange, nkulumirwa omwoyo,
Obulamu bwange bukwetaaga ng’ensi enkalu erakasidde, bwe
yeetaaga amazzi.*

*Bwe ntyo neegomba okukulaba mu kifo ekitukuvu, ndabe nga
bw’oli ow’obuyinza era ow’ekitiibwa.*

Ekisa kyo kikira obulamu bwennyini. Nnaakutenderezanga.

*Nnaakwebazanga obulamu bwange bwonna, nnaayimusanga
emikono gyange nga nkusinza.*

ZABBULI 63:1-4

Okuwaayo ekitambiro n’obukristaayo okuva edda nga birina akakwate. Mu ndagaano enkadde, amateeka gaalagiranga saddaaka ez’engeri ez’enjawulo. Dawudi mu Zabbuli 141:2 ayogera ku kuwanika emikono nga ekitambiro saddaaka eya kawungeezi.

Waliyo n’ebitundu ebirala ebiberako mu njiri ebikwata ku kuwanika emikono. Kirabika nga ekisuubirwa bwe tukikolera mu maaso ga Katonda. Ku nze kitegeeza kwagala okw’amaanyi, okutya era n’okwewerayo ddala ewa Katonda. Tulina okwongera okwewerayo ddala ewa Katonda ne mu by’atutegekera.

Osobola okuwanika emikono n’oyatula okutendereza okumalako olunaku lwonna. Ne bw’obeera ku mulimu, osobola okugendako ebbali,

n'ofuna akaseera n'otendereza Katonda. Bwe tweewaayo, Katonda atwala ensonga zaffe. Ye muntu mulamu era tasobola kutukakaatikako by'ayagala, atulinda ne tumugamba nti tumutaddemu obwesige bwaffe. Nkukubiriza otandike okuwanika emikono gyo era otendereze. Kijja kuweesa Katonda ekitiibwa ate era kijja kuwangula sitaani, era naawe owulire bulungi.

Abantu abatawanikangako mikono mu kutendereza n'okusinza Katonda bafuna okusumululwa okw'amaanyi. Omwoyo gwaffe gwetaaga okusinza n'amaanyi era mu lwatu; wabeerawo ekitubulako mu mwoyo okutuusa nga tukikoze. Nnali mmaze emyaka mingi nga ndi mukkiriza nga naye sikikolanga. Nnali neetaaga okusumululwa nga mpita mu kutendereza n'okusinza, naye nnali sifunanga kuyigirizibwa kumala okumanya kye nnali neetaaga.

YIMIRIRAMU OTENDEREZE

*Buli lunaku nkutendereza emirundi musanvu, olw'ennamula
yo ey'obwenkanya.*

ZABBULI 119:164

Simanyi nga waliyo ekisinga okusanyusa Katonda, ng'okulaba nga tuyimirizamu ebyo bye tukola ne tuwanika emikono okumusinja, oba ne tufunayo akaseera ne tumuvunamira ne tugamba, “Mukama nk wagala.” Mu kitundu ekyogeddwako waggulu, omuwandiisi wa Zabbuli yatenderezanga Katonda emirundi musanvu.

Lowooza ku munnabizineesi, nga eky'okulabirako, oba omukulu w'akampuni ennene. Kyandibadde kirungi singa aggalawo ofiisi ye emirundi nga ebiri oba esatu n'afukamira n'agamba nti, “Ayi Katonda, njagala kukozeza akadde kano okukusinza. Kitange ebintu bino byonna by'ompa – eby'okukola, ssente, obuwanguzi – bya matendo, naye njagala kukusinza. Nkugulumiza. Oli mulungi nnyo. Nkwagala. Era ggwe wekka gwe neetaaga. Nkusinja Yesu. Omwoyo Omutukuvu, nkusinja.”

Mmanyi nti singa omusajja oyo akola bw'aty, talibeera na

bweraliikirivu bwonna ku mirimu gye, eby'enfuna ze oba okuyitamu. Ebintu bino byonna bibeera bulungi.

Naye musooke munoonye obwakabaka bwe, n'obutuukirivu bwe n'ebyo byonna mulibyongerwako.

MATAYO 6:33

Singa omukyala owa waka afuna obudde n'akola bw'ati, afuna ennaku ezijjudde emirembe. Tewali muntu atasobola kufunamu bw'aba afunye okuyimiramu n'atendereza.

Twandifunyenga okuyimiramu ne tutendereza Katonda si lwa kumuwa kitiibwa kyokka, naye ne bwe tuba nga ebintu bitusobedde, nga tukooye nnyo, nga twekyaye, oba nga tuwulira twagala kubivaako. Kijja kutuzaamu endasi. Okukola ekikolwa kino kitegeeza nti twemalidde ku Mukama. Tulina okujjukira nti yagamba nti, ... **nze wesiri, temuliiko kye muyinza kukola** (Yokaana 15:5).

LWAKI TUVUNNAMA?

Danyeri bwe yamanya ng'ekirangiro kiteekeddwako omukono, n'addayo mu nnyumba ye. Amadirisa gaayo, mu kisenge kye ekya waggulu, gaggulwanga nga goolekedde Yerusaaalemu. N'afukamiranga ku maviivi ge emirundi esatu buli lunaku, n'asaba, era n'atendereza Katonda we, nga bwe yakolanga edda.

DANYERI 6:10

Lwaki tuvunnama? Bwe tukikola, tuba twetoowaza. Tuba twogera mu bikolwa byaffe, nti, "Mukama nkuwa ekitiibwa." Ggwe byonna era nze sirina kyendi nga toliiwo. Sirina kye nsobola kukola w'otali, ne nkikola bulungi. Bw'otanyamba, mbula kubanga tewali mulala asobola kunnyamba, okuggyako ggwe."

Ojjukira olugero lwa Danyeri mu mpuku y'empologoma? Abalabe ba Danyeri baalina obuggya olw'ekifo kye yalina mu Bwakabaka. Baali bamannyi nti Danyeri mwesimbu n'olwekyo baali tebasobola

kumufunako musango lwa mpisa nkyamu. Baayagala okufunayo kye beekwasa bayonoone omukwano gwe eri Katonda nga bamutiisa okumutuusako akabi. Baasendasenda Kabaka okuwa ekiragiro nti omuntu yenna gwe banaasanga nga asinza bakatonda abalala oba omuntu okuggyako Kabaka, ajja kusuulibwa mu mpologoma.

Abalabe ba Danyeri baali bamanyi nti yagendanga mu kisenge emirundi esatu, n'aggulawo amadirisa ag'olekedde Yerusaalemu n'afukamira n'asaba era n'asinza Katonda.

Danyeri yagaana okukyusakyusa ensinza ye. Olwaddako okusinza bw'ati, abalabe be ne bamukwata ne bamuleeta mu maaso ga Kabaka, eyali talina kya kukola ne bamusuula mu mpuku y'empologoma. Ekitundu kino mu lugero ekigamba nti yasaba nga agguddewo amadirisa, nga enkola ye bwe yali. Kwe kugamba, yali tagezaako kukikuuma nga kyama. Yali atiira ddala Katonda, era nga amutiira ddala n'okusinga bw'atya abantu.

Danyeri yalina okugenda mu mpuku y'empologoma, n'asulayo era n'avaayo enkeera nga tatuukiddwako kisago kyonna kubanga Katonda yaggalawo emimwa gy'empologoma. Mu kifo kye okuliibwa empologoma, abalabe be baasuulibwa mu mpuku, ne basanyizibwawo.

Singa naffe tusinza Katonda nga abalabe baffe beeteesa okutukolako akabenje, nga Danyeri bwe yakola, tujja kuvaayo nga tetutuukiddwako kisago.

VUNNAMA OLYOKE OYIMUSIBWE

Awo Yesu n'abayigirizwa be ne batuuka emitala w'ennyanja mu nsi y'Abagerasene.

Yesu bwe yali yaakava mu lyato, omuntu aliko omwoyo omubi n'ava mu kifo omuli empuku eziziikibwamu abafu, n'amusisinkana.

Omuntu oyo yasulanga mu mpuku ezo. Waali tewakyali muntu asobola kumukuuma nga musibe na kintu kyonna, wadde olujegere.

Emirundi mingi yasibwanga n'enjegere emikono n'amagulu, kyokka zonna n'azikutula. Era tewaali muntu wa maanyi n'omu eyali ayinza kumusobola

Bulijjo emisana n'ekiro, yasinziiranga mu kifo omuli empuku eziziikibwamu abafu, ne ku nsozi, n'awowoggana, era nga yeesala n'amayinja.

Awo bwe yalaba Yesu, n'adduka gy'ali, n'amussaamu ekitiibwa ng'amufukaamirira.

MAKKO 5:1-6

Oyinda okulowooza nti olina ebizibu, naye tebyenkana musajja wattu ono bye yalina. Naye laba kye yakola olwalaba Yesu – yadduka n'afukamira era n'amusinza. Olugero gye lwaggweera nga Yesu amuggyemu eggye ly'emizimu era n'agenda nga awonedde ddala.

Wadde olina ebizibu ebifaanana bitya, bw'onaatandika okugwa ku maviivi go buli kaseera, nga osinza era otenda Katonda, nkusuubiza ajja kukuyisamu era akutuuse ku buwanguzi.

Tetusinza Katonda nga waliwo ekirungi ekibaddewo, n'etubeera nga tukyamuka olwo ne tusinza. Bino biseera birungi okusinza, naye tusaana okusinza mu buzibu.

Lumu Mukama yagamba nti ensonga lwaki abantu basigala mu bizibu ebiseera ebisinga nga lwa kuba olwo lwokka lwe bamusinza. Yangamba, “Joyisi, singa onnoonya nga oli mu kizibu eky'amaanyi buli kaseera, tojja kuba na bizibu mu bulamu bwo.”

Abayisirayiri baamala emyaka mingi mu ddungu Katonda gye yali abayigiriza okukola ebintu obulungi. Nga bwe nagambye, baamala emyaka amakumi ana nga bagezaako okutambula olugendo olwandimaze ennaku kumi na lumu. Katonda baamunoonyanga bukubirire nga balina ebizibu naye bwe babeeranga obulungi, nga bamwerabirira ddala. Katonda yalekanga abalabe baabwe ne babafuga kubanga baali tebamunoonya, olwo ne balyooka bamunoonya. Ebintu byabeeranga birungi bwe baamunonyanga, naye nga bibeera bibi nga

tebamunoonyezza. Mu ky'Amateeka 8:2 tusoma, Era mujjukire nga Mukama Katonda wammwe bwe yabakulembera mu lugendo lwonna, emyaka gino amakumi ana mu ddungu, alyoke abatoowaze era abageze, amanye ekiri mu mitima gyammwe, oba nga munaakuumanga ebiragiro bye.

Ekitundu ku biragiro bye kyali kumusinza buli kaseera, naye abasinga tebayiga; n'olwekyo tebayingira mu nsi ensuubize. Kino kinakuwaza nnyo era kikanga. Tuyinza okulowooza, nti, "Kisoboka kitya?" Naye nga mu butuufu, abantu bameka b'omanyi ababeera mu buwanguzi buli kaseera? Okubeera n'obuwanguzi si bwe butaba na bizibu; kwe kuba n'eddembe n'essanyu mu makkati g'abyo. Obuwanguzi kwe kweyongera okubalira Obwakabaka bwa Katonda ebibala ebirungi, ne bwe tuba nga tuli mu bizibu.

Mukama agamba nti: "Zimusanze oyo anvaako ne yeesima era ne yeeyinula omuntu obuntu.

Afaanaanyirizibwa n'omuti oguli mu ddungu, ogukulira awakalu mu lunnyo awatali kirala kikulirawo. Tagenda kutuukibwako birungi.

Naye wa mukisa oyo aneesiga Nze Mukama, era asuubira mu Nze.

Afaanaanyirizibwa n'omuti ogwasimbibwa okumpi n'omugga, emirandira gyagwo ne gikula nga gidde eri amazzi. Tegulitya musana ne bwe gwaka ennyo, ebikoola byagwo bisigala byakilagala. Tegulina kye gweraliikirira mu biseera eby'ekyeya: tegulekaayo kubala bibala."

YEREMIYA 17:5-8

Ebyawandiikibwa bino bigamba nti omuntu anoonya Katonda buli kaseera n'ateesiga muntu okumumalira ebizibu bye ajja kubeera mugumu. Mu mwaka omulamba ogw'ekyeya ajja kugenda mu maaso okubala ebibala. Mmanyi kino kye kimu ku bintu bye tulina okukola okusobola okubeera abajulirwa abalungi. Singa sitaani asobola okutufuga n'obukodyo bwe, tekijja kukoma awo. Wabula singa tusigala mu kifo

Katonda ky'ayagala tubeeremu, tulaga nti kyonna omulabe ky'anaaleeta gye tuli, tulaga mu neeyisa yaffe nti okukkiriza kwaffe mu Katonda kukola okutuleetera empisa entuufu, n'eddembe era n'essanyu. Obulamu bwaffe bujja kufuuka omunnyo n'ekitangaala; abalala bajja kwagala kye tulina, era bajja kwagala okugabana naffe okukkiriza kwaffe.

Singa tunaakulembezanga Katonda buli kaseera, bwe tumusinza, ne tumuvunnamira, ajja kutusitula.

Essuula

9

Okusinza n'okukyuka

Bwe yali ng'akyayogera, laba ekire ekimasamasa ne kibasiikiriza: laba, eddoboosi ne liva mu kire, nga ligamba nti ono ye mwana wange gwe njagala, gwe nsanyukira ennyo, mumuwulire.

MATAYO 17:5

Mu ssuula ey'emabega, twasomye engeri Yesu gye yatwala basatu ku bayigiriziwa be waggulu ku lusozi okusaba era nga bwe yali asinza Katonda, n'afuusibwa mu maaso gaabwe.

Wano, mu ssuula eno, tulaba Katonda kye yagamba abayigirizwa ku Yesu mu kiseera ekyo. **Ono ye mwana wange gwe njagala, gwe nsanyukira ennyo.**

Nkimanyi buli muntu ayagala okuba ow'amaanyi mu Katonda yeetaaga okuwulira nga Katonda ayogera naye obubaka bwe bumu. Nga abaana ba Katonda abagalwa ennyo, buli omu kimugwanira okumanya nti Katonda atusanyukira kinnoomu.

Kuno kwe kwagala kwange era n'okusaba kwange nti w'onoomalira okusoma akatabo kano, oja kuba omanyi nti Katonda akusanyukira.

Mpandiika nga mmanyi nti mpozzi wakiwakanyizza dda. Ooo.. nedda, Katonda tasobola kunsanyukira, si mu ngeri gye neeyisamu.

Katonda takusanyukira kubanga okola birungi byereere. Akusanyukira kubanga okkiririza mu Yesu, oyo eyakukolera byonna ebituukiridde.

YESU KYE YATUKOLERA

Ataamanya kibi, yamufuula ekibi ku lwaffe; ffe, tulyoke tufuuke obutuukirivu bwa Katonda mu ye.

2 ABAKKOLINSO 5:21

Sirowooza nti abasinga obungi tutegeera ekya Yesu okutwala ekifo kyaffe. Kino kitegeeza nti yatwala ekifo kyaffe era n’abonaabona ebibonoobono byaffe tulyoke tutwale ekifo kye, era tunyumirwe byonna ebyali bimugwanira.

Twala eky’okulabirako eky’omusomesa w’essomero singa ayosa olunaku lw’essomero, omuntu omulala ayitibwa okutwala ekifo kye olunaku olwo. Singa ayimiridde mu kifo kye mutendeke era akola ky’agambiddwa okukola, omusomesa omutuufu talina kuddayo mabega n’addamu omulimu ogwo ogwakolebwa nga taliwo, gwamukolebwa oyo eyayimirira mu kifo kye.

Yesu ye yayimirira mu kifo kyaffe, olwe kyo kye yatukolera, tufuuliddwa abasika ba Katonda, era abasikira awamu ne Kristo. (Abaruumi 8:17)

Bayibuli egamba tufuuliddwa abawanguzi n’okukirawo era tufunye obuwanguzi obusukiridde okuyita mu oyo eyatwagala ne yewaayo ku lwaffe. (Abaruumi 8:37)

Omanyi kye kitegeeza buli omu ku ffe okubeera omuwanguzi n’okukirawo? Kitegeeza nti Yesu yawangula, ffe ne tufuna obuwanguzi.

Omanyi kye kitegeeza okuba abasika ba Katonda era abasikira awamu ne Kristo? Kitegeeza nti Yesu yakola buli kyetaagisa mu nkolagana okufuuka omusika era nnanyini buli kintu Katonda kitaffe ky’alina, olwo n’akyukira ffe n’agamba nti, “Kati bwe muteeka okukkiriza kwammwe mu nze, muli basika wamu nange.” Olw’okukkiriza tufuna buli kintu Yesu kye yafuna era ekimugwanira.

Singa nsikira ssente abaana bange bafuuka basika wamu nange mu busika bwange, ekyo kye kyatutuukako, Yesu yafuulibwa musika wa

buli kintu kyonna ekya kitaffe, era bwe yatwala ekifo kyaffe, atufudde basika wamu naye mu byonna.

Singa tutegeerera ddala ekitukoledwa okuyita mu Yesu, okutwala ekifo kyaffe, tujja kutandika okubeera mu bulamu obujjudde essanyu n'emirembe Katonda bye yatutegekera. Twandisanyuse nnyo okulokoka, singa tutegeerera ddala amakulu g'okulokolebwa.

AMAKULU G'OBULOKOZI

Mu Lukka 10:20, Yesu yagamba abayigirizwa be, “naye ekyo temukisanyukira, kubanga badayimooni babawulira: Naye musanyuke kubanga amannya gammwe gawandiikiddwa mu ggulu.”

Nkimanyi essanyu lyaffe mu Yesu Kristo likwatagana n'obuziba bw'okumanya bwe tulina ku bikwatagana n'okulokoka kye kitegeeza.

Kitegeeza nti kubanga tutadde okukkiriza mu mwana wa Katonda Yesu Kristo, tulokoleddwa okuva mu geyeena, ekibi, okusingibwa omusango; naye era kitegeeza nti kubanga ekikula kya Katonda ow'amaanyi kiteereddwa munda mu ffe, era kubanga tulina mu mwoyo gwaffe ensigo etavunda eya Katonda omukulu, tukakasibwa nti tugenda kukyuka.

Buli muntu yenna eyazaalibwa Katonda takola bibi, kubanga ensigo ye ebeera mu ye, so tayinza kukola kibi kubanga yazaalibwa Katonda. (1Yokaana 3:9)

Bayibuli egamba olw'ekyo Yesu kye yatukolera ku musalaba, okufa kumiriddwa mu bulamu. Buli kintu ekiri munda mu ffe, ekirina akakwate ku kufa, tekirina maanyi kwanKK'anga Katonda ali munda mu ffe obulamu bw'atuwa.

Kubanga gwe nange tulina obulamu bwa Katonda munda mu ffe, tweyongera okukyusibwa buli lukedde, era omulabe talina ky'ayinza kukikolako, Katonda akolera mu ffe nga amaliriza kye yatandika.

Sitaani bw'atandika okutulyolyoma olwo tulyoke tuwulire ng'abalina omusango, tuteekeddwa okumugamba, “sitaani oli mulimba – nze nkula

mu mwoyo buli lunaku. Nnyongera kulungiwa buli lunaku, nnyongera kwagala bantu nnyo nnyo, nnyongera kufa ku bantu era n’okugaba, nnyongera okubawa mangu ebintu Katonda by’angamba, nnyongera kufuuka musanyufu, ow’ekisa era omusaasizi, omwetoowaze era ow’emirembe buli lunaku oluyitawo, era tolina ky’oyinza kukikolera; Sitaani, Katonda wange ankyusa, oyinza okungamba nga bwe ndi omuvundu, nange nnyinza okukubuulira kye ndi mu Kristo.

Mu makkati g’okulyolyoma kwa Sitaani tuteekwa okugamba, “Nkwebaza Katonda kubanga onkyusa. Nkusinza. Ngulumiza erinnya lyo. Tewali n’omu akwenkana. Nkwagala, Mukama. Nkwagala; nkwagala; nkwagala.”

AMAANYI AGALI MU KUSINZA OKW’EKYAMA

Naye ggwe bw’osabanga, yingiranga mu kisenge munda, omalenga okuggalawo oluggi, olyoke osabe, kitaawo ali mu kyama alikuwa empeera.

MATAYO 6:6

Mazima ddala nzikkiriza nti singa onaavunnama n’osinza Katonda mu ngeri Kabaka Dawudi bwe yakola, ojja kutandika okulaba ebintu ebisuufu nga bitandika okubaawo mu bulamu bwo. Ojja kufuna okusumululwa mu bikoligo.

Nga Yesu bw’atugambye, waliwo ebintu byo nga toteekeddwa kubikolera mu kyama. Waliwo ebiseera bwe neesibira mu kisenge kyange ne nzina nga bwe nsinza mu maaso ga Katonda, oluusi nseka oba oluusi nkaaba nga ndi nzekka. Singa omuntu yenna andaba, yandirowoozezza nti neetaaga kuggalibwa.

Mu kyama nsobola okweyabya nga sirina kinziyiza, sitekeddwa kweraliikirira kunyiiza oba kusobya muntu yenna.

Bw’onookola ebintu bino mulujjudde, ensi eyinza okugamba nti ogudde eddalu. Tebamanyi bw’owulira kubanga tebalina nkolagana na Katonda nga gy’olina; wabula osobola okubikola mu kyama, wakati wo

ne Katonda mwekka era ojja kulaba ebibala ebirungi nga birabika mu bulamu bwo ebibala biva mwekyo Katonda ky'alaba, so si bantu kye balaba.

Nkimanyi nti ffenna tuteekeddwa okufunayo ekifo eky'ekyama ne tusanyuka mu maaso ga Mukama, vunnama mu maaso ge, yimusa emikono wagulu gy'ali mu kusinza, era bwe kiba kyetaagisa, kaabira mu maaso ge. Okusinza n'okutendereza tekuteekeddwa kukoma mu kkanisa.

Nsinza Katonda mu lujjudde bwe nkungaana n'abantu abalala abasinza Katonda, era nsinza eka nga ndi bw'omu. Okusinza mu kyama ne mu lujjudde kwa mugaso nnyo. Nkukubiriza okwenyigira mu kusinza kwombiriri.

NTEEKEDDWA KUKOLA KI OKUSANYUSA KATONDA?

Awo ne bamugamba nti tugire tutya okukola emirimu gya Katonda? Yesu n'addamu n'abagamba nti guno gwe mulimu gwa Katonda, okukkiriza oyo gwe yatuma.

YOKAANA 6:28,29

Katonda ankyusa, era akukyusa, tumusanyusa tetuli awo we tuteekeddwa okubeera naye twebaza Katonda tetuli we twali. Katonda atunuulira nkyukakyuka zaffe so si wa gye tulaga.

Mu Yokaana essuula 6 abantu abamu babuuzza Yesu, "Tuteekeddwa kukola ki okusobola okukola emirimu gya Katonda?" Kye baali bamubuuliza ddala kyali nti, "Tukole ki okusanyusa Katonda?" Yesu yabaddamu ng'abagamba nti, "Mukkirize."

Yesu kye yali ategeeza bwe yabagamba nti "Mukkirize" kyali nti baalina okukkiriza ebyawandiikibwa bye byali bimwogerako.

Ebyawandiikibwa bitugamba ki ku Yesu? Bitugamba nti ataamanya kibi, yamufuula ekibi ku lwaffe ffe tulyoke tufuuke obutuukirivu bwa Katonda mu ye, (2 Abakkolinso 5:21) nga bwe tulabye, ebyawandiikibwa bitugamba nti atukyusa, era tulaba ebigeri ebya waggulu eby'ekitiibwa

(2 Abakkolinso 3:18). Mpola mpola abalabe baffe bawangulwa (Ekyamateeka olw'okubiri 7:22). Enkyukakyuka mutendera ogutwalako ekiseera.

Bwe kiba nga kino kituufu, olwo lwaki tukisanga nga kizibu okukkiriza nti buli lunaku tukyusibwa, nti wadde okuyita mu maanyi g'omwoyo ali munda mu ffe tukyusibwa ne tuwanyisibwa?

Tuteekeddwa okukkiriza nga tetunnalaba, ebintu bwe bikola mu nkola ya Katonda. Mu nsi tuyigirizibwa okukkiriza bye tulabako, naye Katonda atusomesa okukkiriza bye yayogera, olwo ne tulyoka tubiraba.

Mu magezi gaffe ag'obuntu tubuuzza, "tuteekeddwa kukola ki? Tuteekeddwa okuyiga nti omulimu ogwatuweebwa gwa mwoyo – tulina kukkiriza. Tuli bakkiriza, si bafunyi. Tukkiriza olwo Omwoyo Omutukuvu n'akolera mu ffe.

Tulina okuyingira mu kiwummulo kya Katonda era ne tukkiriza nti akola ku lwaffe (Abebbulaniya 4:3,10,11). Atudde mu bifo eby'omuggulu, era naffe tutudde wamu naye. (Abaefeso 2:6). Okutuula kitegeeza kuwummula. Yesu alindirira Katonda kitaffe okufuula abalabe be bonna entebe y'ebigere bye (Abebbulaniya 1:13). Tulindirira ekintu kye kimu mu bulamu bwaffe.

Buli lunaku lutusembeza ku buwanguzi obujjuvu, Halleluya.

Bwe tusinza Katonda nga tetunnalaba nkyukakyuka, tuba twogera ne bikolwa byaffe nti tukkiriza. Tuyingidde ekiwummulo kye, tutudde tumulinda afuule abalabe baffe entebe z'ebigere byaffe. Nga bwe tusinza Katonda mu biseera by'okulinda, twasanguza nti tulina obuwanguzi mu ngalo zaffe, era tulinze bulinzi ekyo okulabika. Tuba tuwa obukakafu nti olutalo lwa Mukama.

Essuula

10

Sinza Katonda mu Mwoyo Omulungi

Nneebaza Katonda gwe mpeereza okuva ku bajjajjange mu mwoyo omulungi, bwe nzijukira amaziga go, ndyoke nzijule essanyu.

2 TIMOSEEWO 1:3

Okusinza okw'amazima kuteekwa okuva mu mutima gw'asinza, so si era tekiriba mpisa enjige obuyizi. Katonda asinga kwagala mutima gwa muntu okukira ebirala. Singa omutima si mulongoofu, tewali kiva mu muntu ekikkirizibwa Katonda.

Emirimu gyonna egikolebwa n'ebigendererwa ebikyamu, tebikkirizibwa era n'okusinza okw'obukuusa okutava mu mutima mulongoofu era n'omwoyo omulungi tebikkirizibwa.

Omwoyo omulungi ye mukwano gw'omuntu asinga kubanga lubeerera ayamba omukkiriza okumanya ekisanyusa Katonda era n'ekitamusanyusa. Ye mubuulirizi asingayo mu bulamu era yakolebwa okutuyigiriza okwagala kwa Katonda.

Omwoyo omulungi gumulisibwa kigambo kya Katonda, n'olwekyo obungi bw'ekigambo oli ky'asoma kiyamba nnyo omwoyo omulungi okubeera omulamu. Waliwo ebintu kati bye mpulira nga binnumiriza nti bikyamu mu bulamu bwange nti n'emyaka mitono egiyise saabirimirizibwanga. Newankubadde mbadde Mukristaayo okuva nga nnina emyaka mwenda, nafuuka Omukristaayo eyewaddeyo mu 1976. Ndowooza nali nkula mu mwoyo mu myaka egyasooka, naye kwali kukula okutono ennyo bw'ogeraageranya kw'ebyo bye mpiseemu, okuva ku olwo.

Ensonga esinga obukulu eyaleteera enkyukakyuka yali nti, natandika okusoma ekigambo kya Katonda mu 1976 oluvannyuma lw’okujjuzibwa omwoyo omutukuvu mu ngeri empya. Newankubadde nali nazaalibwa omulundi ogw’okubiri emyaka egyasooka, naye nali sijjuzibwanga mwoyo mutukuvu mu bulamu bwange, naye ntera okugamba, “Omwoyo Omutukuvu ye teya nnina.”

Nekkiriraganyanga nnyo, nalina ekigere ekimu mu nsi ekirala mu bwakabaka bwa Katonda. Nnali omukkiriza abuguma nga tabuguma. Nnalina Yesu ammala obutagenda mu geyeena, naye nga tammala kutambulira mu buwanguzi. Yesu taja mu bitundutundu, nnamulina yenna naye ye teyannina nzenna. Nnali wa mubiri nga siri mujulizi wa Yesu mulungi.

OMWOYO OMUTEGEEVU

Njogera amazima ku Kristo, sirimba, omwoyo gwange nga guntegeereza mu mwoyo omutukuvu.

ABARUUMI 9:1

Tulaba nti Pawulo yayogera ku mwoyo gwe okuba nga guntegeerezebwa Omwoyo Omutukuvu.

Pawulo yategezebwa omwoyo gwe nti empisa ze zasiimibwanga Katonda era nzikkiriza nti yasobolanga okumanya nti kati tezisiimibwa. Ogwo gwe mulimu gw’omwoyo gwaffe.

Pawulo yayogera ku makulu g’okukuuma omwoyo nga muyonjo, ogumu ku migaso gy’Omwoyo Omutukuvu kwe kutusomesa amazima gonna, okutulimiriza ekibi n’obutuukirivu. (Yokaana 16:8,13)

Era nnyikira mu kigambo ekyo okubeeranga n’omwoyo ogutalina musango eri Katonda n’eri abantu ennaku zonna.

EBIKOLWA BY’ABATUME 24:16

Okusenziira Pawulo bwe yafuga ennyo okuba n’omwoyo omulungi,

kitegeeza nti kiteekeddwa okuba ekikulu ennyo. Nga bwe twalabye mu 2Timoseewo 1:3 Pawulo yasinza Katonda n'omwoyo omulongoogu era omulungi. Eyo nno ye ngeri yokka gye tuyinza okuwaayo okusinza okukkirizibwa.

Kikulu nnyo gye ndi okulambika ensonga eno bulungi nnyo, saagala kukuwa nkola eziyitibwa, “kusinza” nga engeri y'okufuna obuwanguzi oba emikisa okuva eri Mukama.

Kikakafu nti aleeta obuwanguzi mu bulamu bw'oyo asinza naye nga bwe nagambye emabega nti, omuntu tayinza kusinza okujjako nga okusinza kuva mu mutima omulongoofu era omulungi.

Mu ngeri enyangu tetusobola kusinza Katonda nga tulina ekibi kye tumanyi mu bulamu bwaffe. Okwenenya kw'ebibi kwe kukulemba. Okusinza okutuufu, tulina okutuukirira Katonda n'omwoyo omulongoofu. Omuntu alumirizibwa ekibi taba na mirembe. Okukkiriza kwe tekujja kukola, n'olwekyo essaala ze tezija kuddibwamu. Ebyawandiikibwa ebibiri wansi bikinnyonnyola.

Ngonyweza okukkiriza n'omwoyo omulungi, abalala gwe basindika eri ne bamenyekerwa okukkiriza kwabwe.

1TIMOSEEWO 1:19

Nga bakuuma ekyama eky'okukkiriza mu mwoyo omulungi.

1TIMOSEEWO 3:9

MUBE BATUUKIRIVU

Kale mmwe mubeerenga abatuukirivu nga kitammwe ali mu ggulu bwali omutuukirivu.

MATAYO 5:48

Bayibuli etulagira okuba abatuukirivu nga kitaffe bwali omutuukirivu ali mu ggulu. Okuggyako nga tukitegedde bulungi tuwulira nga abawanguddwa era ne tutya n'okutya. Enzivuunula ya

Bayibuli enzimbulukufu ekozesebwa waggulu ekirambika bulungi, “Batuukirivu” mbeera ey’omwoyo gye tukulamu. Tuteekeddwa okufuba okweyongera mu maaso okutuuka ku kabonero k’okutuukirizibwa okuva mu mutima ogw’amazima ogwagala okusanyusa Katonda; buli lunaku nga tuleka ensobi eziri emabega.

Mu bigambo ebirala, emitima gyaffe gisobola okutuukirira naye eneeyisa yaffe tesobola. Tulongoosa buli kiseera era ne twebaza Katonda olw’ekyo naye tetunnatuuka. Bayibuli egamba mu kutemya kikowe tujja kukyusibwa. Nkimanyi nti buli ekisigadde okukyusibwa mu ffe, Yesu nga azze, kijja kukolebwa mu kutemya kikowe. Naye kati tugenda mu maaso nga tukola era nga tunyigiriza okutuuka ku kabonero.

EKKUBO ERITUTUUSA KU MWOYO OMULUNGI

Okubeera n’omwoyo omulungi, omuntu tateekeddwa kwonoona, oba yenenye ebibi bye buli lw’akola ensobi. Tukula era tukizuula nti tukendeeza ku kwonoona nga obudde bwe buyitawo; naye Bayibuli etuyigiriza nti ekizimbulukusa kitono kikola mu nKK’ano yonna. N’ekibi ekitono kitwetaagisa okulongoosa.

Kisuffu okuba nga buli lunaku oghenda mu maaso, naye neebaza olw’ekirabo eky’okwenenya. 1Yokaana 1:9 lugamba nti tusobola okukkiriza ebibi byaffe, ne tubyenya nti era Katonda wa mazima era mutuukirivu okutusonyiwa ebibi byaffe, n’okutunaazako byonna ebitali bya butuukirivu. Nga mawulire malungi, tusobola okubeera mu maaso ga Katonda n’omwoyo omulungi.

Pawulo teyabeera n’omwoyo omulungi ogutuukiridde ddala mu maaso ga Katonda ne mu maaso g’abantu kubanga teyakolanga nsobi. Tumanyi olulala kituufu yakolanga ensobi. Yeyita omukulu w’aboonoonyi era n’agamba nti yali tannatuuka mu kifo eky’okutuukirira.

Nga ayita mu bwetoowaze obw’omu mutima n’okukozesanga ekirabo eky’okwenenya, Pawulo bwe yalemererwanga, yabeera mu maaso ga Katonda n’abantu n’omwoyo omulungi, n’olwensonga eyo yasobola

okusinza Katonda obulungi era n'okusumulula okukkiriza kwe, okutuuka nga ebyetaago bye bikoleddwako.

Lwaki njogera ku kwenenya nga ekirabo? Ndabye abantu abatawulira bubu olw'ebibi bya bwe, ate nga kintu kibi nnyo. Omwoyo omulungi kasita gukakanyazibwa, omuntu tasobola kuwulira buzito bwa nsobi ye. Olwa kino ffenna tuteekeddwa okusaba okuba n'omwoyo omulungi eri Katonda.

OKOLA KI NG'OMWOYO AKULUMIRIZA?

Okulumirizibwa tekuteekeddwa kusalira musango naye kuteekebwawo okutuleeta eri okwenenya. Kugenderera okutuyamba okuwulira obulungi so si kuwulira bubu. Okumala emyaka mingi nga simanyi mazima gano. Buli mulundi omwoyo omutukuvu bwe yannumirizanga ekibi, mangu ago nga mpulira omusango gunsinze, kyambeerera kibi nnyo gyendi nnali nfuuse omusomi w'ekigambo kya Katonda ow'amaanyi n'olwekyo gye nnakoma okukisoma gye nnakoma okulumirizibwa ekibi, kati kirabika nnawuliranga omusango gunsinze buli ssaawa.

Lwali lunaku lwa ssanyu n'okusumululwa nze bwe nnalaba amazima. Amazima gatufuula ab'eddembe, Yokaana 8:32 bw'agamba. Kati mpulira essanyu nga nnumirizibwa ekibi mu bulamu bwange. Siri musanyufu nti nnyonoona, naye ndi musanyufu nti kati nsobola okwenenya ekibi ne nsaba Katonda okunyamba okukula okusukka ekibi. Nsobola n'okumanya nti sitaani agezaako mpulire nti nnina emisango era n'okumanya nti kati omwoyo omulungi gwe gunnumiriza nga Omwoyo Omutukuvu amulisiza.

Olina okumanya nti sitaani ye mulyolyomi w'ab'oluganda. Waliwo enjawulo wakati w'okulyolyoma okukyamu n'okulumirizibwa okutuufu okwa Katonda.

Njagala okukuzzaamu amaanyi obutakola kintu ky'otawuliriramu mirembe, leka omwoyo omulungi abeere mukwano gwo, so si nsibuko yakukutulugunya. Abakkolosaayi 3:15 lugamba nti emirembe ye

mulamuzi ateesa ensonga zonna ezireeta ebibuuzo mu birowoozo byaffe. Buli kintu kyonna ekireeta emirembe tukyanirize ekitubuza emirembe tukikasuke ebweru.

Okukemebwa ekibi si kye kimu n'okwonoona. Okukemebwa, si kwonoona. Ffenna tukemebwa okukola obubi, sitaani ekyo akikakasa. Bwe tukemebwa tuyitenga Omwoyo Omutukuvu atuyambe okukiwakanya. Togezaako kuziyiza oba kuwakanya kibi mu maanyi go, saba Omwoyo Omutukuvu okukuyamba.

Abeera ayimiridde awo okukuyamba ku buli kintu kye weetaaga mu bulamu

EKY'OKULABIRAKO OKUVA MU BULAMU

BWA KABAKA DAWUDI

Aweereddwa omukisa asonyiyiddwa ekyonoono kye n'ekibi kye kikwekeddwa.

Aweereddwa omukisa Mukama gwatabalira mu butali butuukirivu, ne mu mwoyo gwe temuli bukuusa.

Bwe nnasirikanga amagumba gange gaakadiwanga, olw'okukaaba kwange obudde okuziba.

Kubanga emisana n'ekiro omukono gwo gwanzitowereranga.

Amazzi gange ne gakaliranga, ng'olwomusana ogw'ekyeya.

Ne nkwatulira ekibi kyange n'obutali butuukirivu bwange ne sibukweka.

Nnayogera nti, Mukama nnaamwatulira ebyonoono byange;

Naawe n'onsonyiwa obutali butuukirivu obw'ekibi kyange.

Ku lwekyo buli atya Katonda akusabenga mu biro by'oyinza okulabikiramu; Mazima mu ntaba ez'amazzi amangi tebalituuka gy'ali.

Oli bwekweko bwange; onoonkuumanga mu kulaba ennaku,

Onooneetoolozanga ennyimba ez'obulokozi.

ZABBULI 32:1-7

Kabaka Dawudi yali munakuwavu paka bw'eyenya ekibi kye. Ennyiriri waggulu ziraga nti essanyu lye lyakomawo nga yeenyeyizza ebibi bye.

Dawudi yali ayenze ne Basuseba era n'atta bba omwaka gwayitawo ye nga ensonga tagifaako. Yali akola ffenna kye tintera okukola nga twonoonye. Yateekawo ebyekwaso era ngalimbibwa amagezi ge.

Ffenna tuyinza obutanKK'anga kibi mu ngeri nga Dawudi bwe yakola naye ekibi kye kibi era kitutuusako obuvune bwe bumu si nsonga kibi ki. Ensonga eri nti, paka nga tukikirizza ne twatula era n'okwenya (ekitegeeza okukyukira ddala n'otunula mu kkubo eddala), tetujja kusobola kusinza Katonda okuva mu mutima omulongoofu, n'omwoyo omulungi.

Weteegereze olunyiriri 7 kati Dawudi Katonda amwetoolooza ennyimba ez'obulokozi. Ng'amaze okwatula ekibi kye ayimba era awogana. Ekyo gye ndi kiwulikika nga okutendereza n'okusinza Katonda.

OKUGONDA KWE KUSINGA

Obujeemu obuli mu Bakristaayo bwewuunyisa. Nga bw'omanyi, tuyita mu mbeera y'empisa envundu mu nsi leero. Nga Abakristaayo, tuli mu nsi naye tetuli ba nsi okusenziira ku Yesu kye yatugamba. Enjawulo wakati w'ensi n'abo abakkiriza Yesu esobolera ddala okulagibwa. Abo ab'ensi bakola byabwe, bakola buli kye bagala okukola oba nga bwe bawulira okukola nga tebefuddeyo bwe kikosa abalala era oba kisiimibwa oba tekisiimibwa Katonda.

Abakristaayo bo balina kunoonya kutambulira mu kwagala kwa Katonda. Balina kukulemberwa, kulungamizibwa era n'okufugibwa awatali buwaze Omwoyo Omutukuvu kubanga lubeerera ajja kutulunganya mu kwagala kwa Katonda.

Waliwo ensonga nnyingi mu bulamu ezetaaga okusalawo buli lunaku. Omwoyo gwaffe gutuyamba okusalawo. Ekigambo kya Katonda n'okukubiriza kw'Omwoyo Mutukuvu bituyamba nabyo okusalawo. Naye ensonga enkulu esigala nti *ffe* tusalawo. Katonda ayagala tulonde okwagala kwe, naye taja kutukaka.

Yesu yagamba mu Yokaana 14:15, oba nga [ddala] munjagala, munaakwatanga ebiragiyo byange. Bambi weetegereze, teyagamba nti bwe munaagondera ebiragiyo byange, nja kubaagala. Okwagala kwa Katonda tekuliiko bukwakkulizo. Atwagala kubanga ye kwagala, si olw'ebintu bye tukola oba bye tutakola. Wabula tulaga okwagala kwaffe okuyita mu kumugondera. Okugonda oluusi kuluma.

Buli bwe tutafuna kye twagala, oba bwe tukola kye tutayagala kukola, kiruma.

Bwe tuba nga engeri gye twewulira tekwatagana na bye tukola, kiba kizibu okukola ekintu kyonna. Tulina bwe twewulira naye ate tulina n'okwagala kwaffe. Okwagala kwo ye mukama wo. Y'asalawo ekinaakolebwa n'ekitaakolebwe. Okwagala kwaffe kwa maanyi nnyo okusinga ebirowoozo byaffe n'engeri gye tuwulira. Bwe tusalawo okukola Katonda ky'atugambye awatali buwaze, newankubadde ebirowoozo byaffe ne ngeri gye tuwulira tebituwagira, kiraga okwagala kwaffe eri Mukama.

Okugonda ngeri ya kusinza, lubeerera bwe nsanga ekizibu nsalawo kukyaKK'anga mu ngeri ya Katonda so si mu yange, mba nsinza era nga nzisaamu Katonda ekitiibwa. Mba ndaga okutya Katonda era nga ngamba okuyita mu bikolwa byange nti nteeka Katonda waggulu wange oba ne ngeri gye neewulira.

Nzikkiriza waliwo abantu bangi abagezaako okuwa kye balowooza nti kwe kusinza, naye nga si kwe kusinza Katonda kw'ayagala kubanga kukolebwa oli nga amanyi nti ali mu bujeemu oba alumirizibwa ekibi. Jjukira, Yokaana 4:24 lugamba nti Katonda anoonya abamusinza mu mwoyo ne mu mazima. Okussaawo ensonga lwaki okola ekibi, oba okwerimba si mazima.

WEEBAZE KATONDA OLW'OKUSONYIWA

Nagambye okugonda kwe kusinga naye era, nga bwe ngambye, ffenna tukola ensobi.

Waliwo ebiro nga n'Omukristaayo asinga okwewaayo bw'akola okusalawo okukyamu, olwo tuba tuteekeddwa okwenenya mangu era ne tufuna okusonyiyibwa kwa Katonda. Siteeka tteeka naye lubeerera kirungi okutandika essaala zaffe n'okwenenya ebibi. Saba Katonda okukusonyiwa ensobi yo yonna. Bw'oba nga omanyidde ddala ekibi, kyatule, bwe kiba nti tewali kintu kizze mu birowoozo, musabe asonyiwe ebibi byo byonna mu bulamu bwo, n'ebyo by'otannaba kulaba. Saba Katonda okukulumiriza ebibi omugambe nti oyagala buli kintu okukikola mu butuufu bwa kyo. Musabe ekisa nga ge maanyi ge agakulaga ki kye weetaaga okutereeza.

Bwe tumala okukola ebyo waggulu ggwe nange tusobola okusinza n'omwoyo omulungi.

Essuula

11

Okukyusibwa n'Okufuusibwa

So temufaananyizibwanga ng'emirembe gino naye mukyusibwenga...

ABARUUMI 12:2

Nga bwe tulabye, Bayibuli eyogera ku kukyusibwa era n'okufuusibwa. Bwe tusoma ebigambo bino, tuyiga nti byombi biva mu kigambo ky'oluyonaani, *Metamorphoo* ekitegeeza “okukyuka okudda mu ngeri endala”.

Tulina eky'okulabirako kino mu bukulwe obufuuka ebikere, ebisaanyi ebifuuka ebiwojjolo.

Nga ntegeka okuwandiika essuula eno, nnakola okunoonyereza nga nsoma; Ekisaanyi okufuuka ekiwojjolo kye ky'okulabirako ekisinga eky'okukyusibwa. Ekisaanyi kirya okutuuka awantu we kigejjera. Awo kyesaanikira mu kisawo kye kiruka. Kiyinza okuyingira mu ttaka oba okwekweka emabega w'ekintu ekigonvu. Oyinza okugamba kika kya kuziika.

Nsobola okukikwanaganya n'okuziika kubanga Bayibuli etugamba nti tulina okufa okusobola okuba abalamu ku lwa Yesu. Omutume Pawulo yagamba mu Baggalatiya 2:20 **Nnakomererwa wamu ne Kristo naye ndi mulamu mu ye: era obulamu bwe nnina kaakano mu mubiri, mbulina lwa kukkiriza omwana wa Katonda eyanjagala ne yeewaayo ku lwange.**

Ngezezaako ku kufa kuno, era nkyafa, Katonda bw'aba nga alina ky'akolako mu bulamu bwange kye njagala naye ate nga si kwe kwagala kwe gye ndi. Waliwo ebintu nga tulina okufa gye biri, endowooza, engeri

gye tulwoozaamu, engeri gye tweyisa oba gye twogera, bye twagala oba entegeka zaffe.

Kyanguwa nnyo okukyogerako okusinga okukiyitamu. Ka kibe mu nsi ey'omwoyo oba mu bulamu obwa bulijjo, okufa kuluma, tewali musaalaba gutaliiko bulumi. Yesu yatugamba okwetikka omusaalaba gwaffe tumugoberere.

N'ayita ebibiina n'abayigirizwa be n'abagamba nti omuntu bw'ayagala okungoberera, yeefirize yekka, yeetikke omusaalaba gwe angoberere.

MAKKO 8:34

Nga ekisaanyi bwe kiteekeddwa okuyita mu kukyusibwa okufuuka ekiwojjolo, naffe tulina okuyita mu nkyukakyuka ezitweetaagisa okufa. Enkyukakyuka zino Katonda z'ayagala mu bulamu bwaffe zitandike okulabika, ziruma. Nga ekisaanyi bwe kinoonya ekifo okweekwekamu mu kasirise, ne Katonda akituwa.

Okufa mulimu si mwangu, si ky'ekintu kye tusobola okugabana na buli muntu gwe tumanyi.

Nzikiriza Katonda buli muntu amuwa gye tuyita emyaka egy'akasiriikiriro. Gino gy'emyaka Katonda w'atukwekera n'alyoka atukolamu emirimu eminene, aba atukyusa mu kifaananyi kye tulyoke tubeerewo olw'ekitiibwa kye.

EMYAKA EGY'OKUSIRIKA

Nga bwe nsomye Bayibuli, njize nti abasajja n'abakazi Katonda be yakozesa ennyo baalina okuyita mu myaka egy'okusirika kino kiseera mu bulamu bwabwe Katonda bwe yalabika nga abakwese nga abakolako era nga akola enkyukakyuka mu mbala yaabwe ezineetaagisa olw'omulimu gwabwe ogw'omumaaso.

Baayingira mu biseera bino mu ngeri emu ne bafulumu nga bakyusibbwa. Eky'okulabirako, Musa ye musajja eyamanya okuyitibwa

kwa Katonda ku bulamu bwe, naye yali ensonga azitwalira mu ngalo ze. Yalaba omu kubaganda be omwebbulaniya ng'ayiganyizibwa n'atta omumisiri eyali amubonyaabonya.

Katonda si kye yalungamya Musa okukola bw'atyo. Yakola nga bwe yawulira mu ye, okuwulira kw'omutima gwe kuyinza okuba nga kwali kutuufu, yali tayagala kulaba bantu batalina musango nga batulugunyizibwa, naye ekiseera kye kyali kikyamu. Okubeera wabweru w'ebiseera bya Katonda kiri nga kubeera wabweru wa kwagala kwe.

Musa nga tannakozesebwa Katonda yalina amasomo amagumu ag'okuyiga. Ebikolwa bye bwe byazuulibwa era ne bamutuukirira, Musa yadduka okuva mu Misiri mu kutya, ekikolwa ekirala Katonda ky'ataamugamba kukola.

Tulaba okuva mu ky'okulabirako kino nti Musa teyagumiikiriza era yali mutiitiizi, embala eyali yeetaaga okukyusibwa nga Katonda tannaba kukola bintu ebya maanyi ne Musa bye yali ategese.

Musa yaddukira mu ddungu, era eyo yamalayo emyaka ana. Yawasa n'afuna n'abaana, naye nzikkiriza yalina ebbanga erimala okuba ne Katonda mu myaka gino egy'akasiriikiriro.

Okwolekeza kwe kwali kukulemba abaana ba Yisirayiri okuva mu buddu okubatwala mu nsi ensuubize, laba kati ali wano mu ddungu alunda ndiga. Nkakasa nti bino byali tebikyalimu makulu mu bulamu bwa Musa nga oluusi ebifo mwe twesanga bwe bikola amakulu gye tuli.

Bayibuli tetubuulira mu bujjuvu myaka egyo, gyali myaka wakati wa Musa ne Katonda egy'ekyama era egy'obulumi.

Musa yali alese buli kintu kye yali amanyidde, ab'ennyumba ye ne mikwano gye.

Nzikkiriza yawulira nga ajjibwako ekyo kye yayitibwa okukola. Kye yali tamanyi nti yali ateekebwaterkebwa lw'ekyo.

Musa bwe yagendera mu ddungu tuyinza okugamba nti yali yewulira, yematira, nga yemanyi nga yeetwala yekka. Katonda bw'alabikira Musa mu kisaka ekyaka n'omuliro, n'amugamba

yalondebwa okutwala abaana ba Yisirayiri okuva mu buddu, tulaba omusajja omwawufu. Kati mwetoowaze nnyo, amenyese, olaba nti Katonda yamala kunyiiga ye okutambulira mu kukkiriza. (Ibala Okuva essuula 2-4) Bayibuli egamba mu Kubala 12:3 era omusajja Musa yali muwombeefu nnyo, okusinga bonna abaali ku nsi yonna. Teeberezamu yagenda mu ddungu nga yemanyi era nga alina entegeka ze, yafulumu ye musajja asinga obuwombeefu mu nsi yonna. Obuwombeefu si bunafu, maanyi agafugibwa. Yalina amaanyi mu kusooka naye gaali si mafuge. Yeetwalanga bwe yawuliranga naye kati tulaba omusajja omwawufu. Yali w'amaanyi naye teyatambula okujjako nga akakasiza nti Katonda y'amulagidde.

Oyinja okugamba nti yali akyusibbwa, okuva mu kisaanyi n'afuulibwa ekiwojjolo oba akakulwe ng'afuuse ekikere. Mazima ddala, yali akyusibbwa ddala.

IBULAYIMU, YUSUUFU, YOKAANA OMUBATIZA NE YESU

Tulaba ennono y'emu mu bulamu bwa Ibulayimu. Olubereberye 12, etusomesa nti omusajja ayitibwa Ibulaamu yayitibwa Katonda okuva mu nsi ya nnyo, era awali ekika kye, n'ennyumba ya kitaawe ne byonna bye yali amanyidde agende mu nsi Katonda gy'alimulaga.

Tebeerezamu, yaleka buli kintu nga tamanyi gy'alaga; era ekyava mu buwombeefu bwe Katonda yakola ebisuubizo eby'ekyewuunyo, ebisuubizo eby'obuggagga, ttutumu, bukulembeze, abazzukulu, n'ebirala bingi. Katonda yakola endagaano ne Ibulayimu nga amugamba nti singa akkiriza kijja kumubalibwa nga ayimiridde nga ateredde ne Katonda era nti ajja kumulabirira mu byonna.

Ibulayimu n'akkiriza Katonda. Nga kigambo ky'amaanyi! Ekyo Katonda ky'asaba ffenna okukola. Katonda ky'asaba kkiriza si lwa bintu byokka naye n'okuyita mu bintu. Ibulayimu yali akkiriza Katonda okufuna omwana eyali agenda okuba omusika we, naye yalina okukkiriza Katonda, "okuyita" mu bintu ebimu ebizibu era ebyatwala akaseera akawanvu nga tannalaba kutuukirizibwa kw'ekisuubizo eky'omwana.

Oyinza okugamba nti emyaka egyo egy'okulinda gye gyali egy'akasirikiriro.

Mu myaka egyo, era tulaba Ibulaamu (erinnya lya Ibulayimu nga Katonda tannalikyusa, nga bwe tulaba mu Lubereberye 17:5 okutegeeza **taata w'enkuyanja** kubanga Katonda yali amufudde **taata wa mawanga mangi**) ng'atwala omuzaana we nga mukazi we ow'okubiri nga asendebwa mukyala we Salai okutaali kuteesa kwa Katonda. Baali bakooye okulinda olwo ensonga ne bagitwalira mu mikono gyabwe. Yafuna olubuto n'azaala Isimayiri. Newankubadde Ibulayimu yali ayagala nnyo Isimayiri, si ye yali omwana ow'ekisuubizo era oluvannyuma yaleetera Ibulayimu obulumi n'obuzibu bungi mu bulamu bwe.

Waliwo ebiseera Katonda bw'atuleka ne tukola ebintu nga bwe twagala tulyoke tuyige nti engeri yaffe tekola. Tubonaabona mu myaka egyo. Tusoberwa, tuyiibwa, era ne tulaba ennaku eyabuli kika.

Oluvannyuma tuva mu mpuku y'okubonaabona kwaffe nga tukyusibbwa, olwo nno tuba bamalirivu okukola ekintu mu ngeri ya Katonda. (Olubereberye mu ssuula 12-17, eyogera ku lugero lwa Ibulayimu lwe njogeddeko).

Ate Yusuufu?

Yali mulenzi muto eyafuna ekirooto okuva eri Katonda. Mbagirawo yabuulirako baganda be ekirooto kye ne bamukwatirwa obuggya ne bamukyawa. Baamutunda mu buddu, ne bagamba kitaawe nti ensolo enkambwe yamusse.

Yusuufu yatwalibwa e Misiri gye yamala emyaka emizibu. Baamulimba ne bamuwayiriza, ne bamutwala mu kkomera olw'omusango gw'ataakola, naye mu bino byonna Katonda yalina entegeka. Bayibuli etubuulira bye yayitamu kungulu naye tetumanyi ate tetusobola kutebeereza bye yayitamu munda. Obulumi bwe tuba nabwo munda businga nnyo obulumi bwe mbeera zaffe.

Buyinza okuba mu myaka emingi egy'obutategeera kiki ekigenda mu maaso oba lwaki okuva mu bantu abatatutegeera era ne batusalira emisango. Tutandika okulowooza nti, “njagala okwagala abantu

n’okwagala kwa Katonda, lwaki kizibu nnyo?” Tetulowooza era tetumanyi nti mu mitendera gy’okukyukakyuka tuli bukulwe na bisaanyi. Tuyinza okugamba nti twagala kukola ekituufu, naye embala yaffe tetuganya.

Katonda alina okutukyusa, tewali ngeri ndala. Kiruma naye nga y’engeri mwetufuna oba ereeta emirembe n’essanyu. Nga Yesu, tulina okugumiikiriza omusalaba olw’empeera etuli mu maaso.

Tufuna ebigezo bingi bye tulina okuyitamu mu kiseera kino ekya kasiriikiriro. Lowooza abantu bameka Yusuufu be yalina okusonyiwa. Engeri gye yali nga omwetegefu aleme okujjula ekiruyi n’okukyawa abantu nga emyaka bwe gyayitawo nga alinga eyeerabira. Ebintu byatandika okukyuka.

Yusuufu yalina ettutumu ery’okumanya okulootolola ebirooto. Falaawo yafuna ekirooto ekyamutawanya ennyo n’ayita Yusuufu. Katonda yawa Yusuufu amagezi. Yavvuunula ekirooto nga kituufu, era Kabaka n’amukuza okuba omulabirizi ow’ebintu bye byonna.

Enjala yali ejja era Katonda yali amaze okutendeka Yusuufu era nga yali mu kifo okusobola okukuuma abantu bangi nnyo nga balamu mu kiseera kino mu byafaayo. Yusuufu yagumiikiriza emyaka egy’akasirikiriro, n’ayita ebigezo ebizibu, naye mu nkomerero yakuzibwa era bwe kiri eri buli muntu agaana okuwanika.

Yokaana Omubatiza yalina emyaka egy’akasiriikiriro. Mu Lukka essuula 1 tusoma ku kuzaalibwa kwa Yokaana Omubatiza. Olunyiriri 80 mu ssuula eyo lutuyamba.

Omwana n’akula, n’ayongerwako amaanyi mu mwoyo, n’abeeranga mu malungu okutuusa ku lunaku lwe yayolesebwa eri Yisirayiri.

Tetumanyidde ddala bifa ku Yokaana Omubatiza okuva ku kuzaalibwa kwe okutuuka ku kutandika kw’okuweereza kwe okunyonnyolwa mu Lukka 3:2 okuggyako nti yamala emyaka mingi nga abeera mu ddungu. Nzikkiriza gino gye myaka Omwoyo Omutukuvu mwe yatendekera Yokaana Omubatiza olw’obulamu bwe obw’omu maaso. Obuweereza bwe bwali bumpi naye nga bw’amaanyi.

Kyali kiseera kya njawulo mu byafaayo, buli kintu kyali kiteekeddwa okubeera nga kitereevu. Nkimanyi obugumu, obunene bw'okutendekebwa bwenkanankana n'obunene bw'enkomerero yaffe.

Ekyo kyaliwo ne Yesu yennyini oluvanyuma lw'okuzaalibwa kwe, okuggyako okukomolebwa kwe n'okuweebwayo mu Yekaalu mu Yersaalemi bwe yali nga wa nnaku munaana zokka (Lukka 2:7-39). Tetumusomako kintu kyonna okutuuka nga awezezza emyaka 12 Lukka 2:41-51.

Okuva nga alina emyaka 12 okutuusa nga awezezza emyaka nga asatu tewali kimuwandiikibwako. Bayibuli ky'emwoogerako mu myaka egy'akasiriikiriro kiri nti yeeyongerangako amagezi, n'okukula, ne mu kisa okuva eri Katonda n'eri abantu, (olunyiriri 40, 52)

Ekigambo “Omwana yakula” kitegeeza ebintu bingi.

Ekitundu mu Abebulaniya 5:8-9 kitulaga nti yayiga okugonda olw'ebyo bye yabonaabona, era ekyo kye yayitamamu nga kiwedde, kyamusanyiza okufuuka omutandisi era ensibuko y'obulokozi obw'olubeerera.

Mu buntu bwe Yesu yalina okuyiga okukula, okubonaabona, era okufuna by'ayitamamu nga naffe bwe tukola. Teyayonoona nga bwe tukola, naye atukulembedde nga omutandisi waffe, y'asooka ffe ne tugoberera. Y'atulaga ekkubo ery'obuwanguzi. **EKKUBO LYOKKA KWE KUYITAMU!** Tetusobola kudduka bizibu, tuteekeddwa okubyaKK'anga n'obuvumu nga tumanyi nti Katonda waffe ali naffe era tagenda kutulekerera newankubadde okutwabulira. Ne bwe tuba nga tetuwulira kubeerawo kwe tumanyi nti abeera naffe.

Mu myaka gino, mmanyi abasajja bano bonna wamu ne Yesu, baamala ekiseera kinene mu kusinza. Baasinzanga mu ddungu era kyabayamba okutuuka mu nsi ensuubize. Mu ngeri endala singa tusinza Katonda nga obulamu tebulabika bulungi, tujja kulaba ekisuubizo kya Katonda nga kirabisibwa mu bulamu bwaffe. Nzikiriza nti engeri gye tweyisa nga tuli mu ddungu esalawo nnyo bbanga ki lye tunaamalayo.

EMYAKA EGY'AKASIRIIKIRIRO MU BULAMU BWANGE

Siri wa njawulo okuva ku ggwe oba abantu be twakasomako. Katonda yalina okunkolako naye byali bya bulumi. Tekyali kya mangu, kyatwala ebbanga ddene ko, si nga bwe nnali nsubira oba bwe nnali ntegeese era kyali kya bulumi nnyo okusinga bwe nnali ndowooza era okusinga bwe nnandigumiikirizza.

Kyali kya ssanyu Katonda bwe yampita okuyingira obuweereza naye saamanya ki kye nteekeddwa kuyitamu okusobola okuteekebwateekebwa olw'obuweereza. Singa nnali mbitegeddeko saandikkirizza. Ndowooza y'ensonga lwaki Katonda ebintu abitukweka n'atuwa buwi kisa nga bwe tuyitamu, kimu ku kimu. Waliwo ebintu nga tetuteekeddwa kubimanyira wo ng'obudde tebunnaba. Tulina kumanya bumanya nti Katonda agambye nti tajja kuleka bye tutasobola kujja gye tuli.

Nnyinza okuba nga bwe nzija mu maaso g'abantu okuweereza mu nkungaana mbalabikira bulungi, naye wandirabyeko bwe nnali nfaanana mu myaka egy'akasiriikiro, bwe nnali nga nteekebwaterkebwa olw'obuweereza buno. Nsobola okukugamba nti kyali tekisanyusa maaso.

Saali nga mukyala wa kukkiriza, navanga mu mbeera, obusungu obungi. Kasita ebintu byagendanga nga bwe sibyangala, kyali kizibu nnyo okuyiga okugondera abaali mu buyinza.

Saatandikirawo n'ebirabo by'omwoyo kati ebikolera mu bulamu bwange. Ensigo yali mu mwoyo gwange naye yali eteekeddwa okukula. Tulina lubeerera okumanya nti ebirabo bituweebwa naye tubale ebibala.

Tusobola okubeera n'ekirabo ekisobola okututwala awantu naye nga tewali mbala okutukuumira wo singa tetugondera ttendekero lya Katonda.

Nga sinnaba kubeera ku leediyo ne televizoni, erabibwa ensi yonna, bantu bangi nga tebannamanya kiki kye ndi, nayita mu myaka "egy'akasiriikiro.." Emyaka mwe nafunira okwolesebwa n'ekirooto kyange okuva eri Mukama naye nga tewali nzigi nnene ziggulwawo, nnalina obukisa butono naye saalina kwolesebwa kutono n'olwekyo ebiseera ebisinga nagwangamu amaanyi era nga seebaza olw'ekyo ekyampeebwanga okukola.

Ooo., nnali neetaga okukyusibwa okunene era nkyetaaga naye kati ntegeera ekigenda mu maaso. Nsaasira abantu abalwanyisa oba abalwana ne Katonda obulamu bwabwe bwona, nga tebategeera ki kyagezaako okukola.

Tulina okumwesiga mu biseera ebizibu, tuteekeddwa okusinziza mu ddungu so si mu nsi ensuubize yokka.

Abayisirayiri basinza Katonda nga basomose ennyanja emyufu era nga bali bulungi. Baayimba, era ne bazina. Baayimba oluyimba olutuufu naye ku ludda lw'omugga olukyamu. Katonda ayagala okuwulira oluyimba lwaffe nga tetunnalaba buwanguzi singa taluwulira tuyinza obutalega ku buwanguzi.

Nnalina emyaka sitaani mwe yangambiranga nti ndi mulalu, nti saayitibwa Katonda era ngenda kwesiriwaza ndyoke nswale. Yankakasa nti tewali kye ngenda kukola ekinaaba n'ekibala. Yangamba okubonaabona tekujja kukoma, obulumi si bwakulekerawo. Yantegeeza nti ndi musiru nnyo okukkiriza bye sirabako.

Katonda yambeera ne ngenda mu maaso era ne nva mu kitiibwa kimu ne neeyongera mu kirala mpola mpola. Nakyuka n'ebintu mu bulamu bwange ne bikyuka mu ngeri y'emu.

Nkizudde Katonda atusumululira kye tusobola okukwata obulungi. Ntuuse ekiseera mu bulamu bwange nga saagala kintu kyonna ky'atanjagaliza. Singa nsaba ekintu ky'amanyi nti sijja ku kikozeza bulungi, nsaba aleme kukimpa. Embeera esinga obubi omuntu gy'asobola okubeeramu, kwe kubeera n'ekintu nga Katonda tamutendese kubeera nakyoko.

Nkyuse oluusi sijjukira ddala ki kye nnali, mmanyi nti tekyali kirungi. Leero oyo omuntu gwe nnali alinga omuntu gwe nnali mmanyi ebbanga eddene emabega. Emyaka egy'akasiriikiro bwe gyagwako nasanyuka olw'omulimu Katonda gwe yali ankozemu, olw'ekisa kye. Bwe nnali nkyabiyitamu nnali sibyagala, ate era nnali sibitegeera, naye saandibadde kino ndi singa tebyaliwo.

EKIWUMMULO KYA KATONDA

Kale wasigaddeyo ekiwummulo kya ssabiiti eri abantu ba Katonda.

Kubanga ayingidde mu kiwummulo kye, era naye nga awumudde mu mirimu gye nga Katonda bwe yawummula mu gigye.

ABEBBULANIYA 4:9,10

Bye nnasoma ku kukyuka byannyinyonnyola emitendera egiddirira nga ekisaanyi ekivudde mu kisawo n'emabega w'ekintu ekigonda oba ekirala kyonna kye kikozezza okwekweka.

Kigenda mu kiseera eky'okuwummula era enkyukakyuka ey'amaanyi etandika okubeerawo. Ekisaanyi kikula era n'ekivaamu nga ekikula ekirala.

Bw'oba nga otawanyizibwa era nga weeralikiridde enkyukakyuka zonna ezeetaagisa okukolebwa mu ggwe, lwaki toyingira mu kiwummulo kya Katonda. Okulafubana tekujja kukukyusa, newankubadde okuggwamu amaanyi oba okweraliikirira. Gy'okoma okuwummulira mu Katonda gy'ojja okwanguwa okulaba enkyukakyuka. Singa olugoye olusiigibwa lwenyenya ng'omusiizi asiiga, ekifaananyi tekisobola kuggwa. Naye olugoye bwe luteengenya, luba lugondedde amagezi n'obulungi bw'omusiizi. Bwe tutyo bwe tuteekeddwa okuba ne Katonda waffe. Amanyidde ddala ky'akola era n'engeri y'okukikola, tulina okumukkiririzamu ne tusingira ekiwummulo kye.

Lekerawo okweraliikirira n'omubiri gwo obudde bwonna. Yingingira ekiwummulo kya Katonda ogambe, "Mukama, siyinja kwekyusa. Bwoba nga tosobola kunkyusa tewali asobola. Nteeka mu mikono gyo era nkulindiridde okukola enkyukakyuka mu bulamu bwange z'olaba nga zeetagisa okukolebwa, taata Katonda wange, seesiga ngeri zo zokka naye n'ebiro byo." Olwo nno osobola okussa ekimu ne Katonda. Osobola okuwummulira mu mikono gye egirina okwagala.

Emitendera gy'okukyuka giruma, gireke gikulume. Gy'okoma okukirwanyisa gye kikoma okutwala ebbanga eddene ate n'obulumi bweyongera.

Omukazi ow'olubuto azaala bamugamba wummula era osse. Obulumi bwonna obujja bwongera kusobozesa kuzaala, naye na buli bulumi, bamujukiza nti wummula era osse. Newankubadde nga enkyukakyuka ziruma, kisingako okubeera mu kubonaabona okw'olubeerera ne kukubuzaako emirembe. Leka Katonda akole buli ky'ayagala okukola mu bulamu bwo.

Mugambe, "Ayi Mukama bwoba nga omalirizza nange, saagala na kumanya kintu kyonna kyenzijukira mu biseera ebyayita. Saagala kweyisa nga nze owedda, njagala okwolesa ekitone ekiggya ekijja okuyita mu kuzaalibwa okuggya."

OSINZA OBA WEERALIIKIRIRA?

*Nga tutunuulira Yesu yekka omukulu w'okukkiriza kwaffe,
era omutuukiriza waakwo...*

ABEBBULANIYA 12:2

Oluusi tufuna obuzibu okukola ekintu ekirungi mu bulamu bwaffe, ensonga eri nti tutunuulira ekintu kikyamu, tutunuulira nnyo ekikyamu ekituliko. Bayibuli tetugamba kwetunuulira, etugamba kutunuulira Kristo, obubaka buli nti tunula obe mulamu.

Mu Kubala 21 tulaba AbaYisirayiri bwe bali mu ddungu, baali bafa bangi olw'emisota egyali gibaluma olw'ebibi byabwe, Musa yagenda n'agwa mu maaso ga katonda so si eri ye oba eri omuntu omulala yenna okugonjoola ekizibu.

Nkizudde okuyita mu Bayibuli yonna abantu bwe baabanga n'ekizibu baasinzanga. Wakiri abawanguzi baasinzanga. Teberaliikiriranga – baasinzanga.

Nkubuuza olwaleero: osinza oba weeralikirira?

Musa yabuuza Katonda akole atya emisota. Teyakola ntegeka ye n'asaba Katonda agiwe omukisa; teyagezaako kunoonya kya kuddamu newankubadde okweraliikirira – yasinza. Ekikolwa kye kyaleeta eky'okuddibwamu okuva eri Katonda.

Mukama n'agamba Musa nti weekolere omusota ogw'omuliro, oguteeke ku mulongooti, awo olunaatuuka, buli alumiddwa bwanaagulaba anaba mulamu.

OKUBALA 21:8

Tumanyi nti omulongooti ogwaliko omusota ogw'omuliro gwali guyimirirawo okulaga omusaalaba ne Yesu ku gwo okutwala ebibi byaffe ku ye. Obubaka bukyali bwe bumu ne leero: “Tunula obe mulamu.” Tunnuulira Yesu ne ky'akoze, so si ggwe ne ky'okoze oba ky'oyinza okukola.

Eky'okuddamu eri ebizibu byo si nsonga kizibu ki, si kweraliikirira naye kusinza. Tandika okusinza n'obulungi bwa Mukama bunaasumululwa mu bulamu bwo. Jjukira olutalo lwa Mukama.

Essuula

12

Genda mu maaso Okutunula era Osinze

Naye ffe ffenna bwe tumasamasa ng'endabirwamu ekitiibwa kya Mukama waffe amaaso gaffe nga gaggiddwako eky'okubikkako, tufaananyizibwa engeri eri okuva mu kitiibwa okutuuka mu kitiibwa, nga ku bwa Mukama waffe omwoyo.

2 ABAKKOLINSO 3:18

Olunyiriri luno lutulaga nti tukyusibwa lubeerera mu kifaananyi kya Mukama waffe. Tuty? Nga tugenda mu maaso nga tutunuulira ye.

Ekigambo “okutunuulira” kitegeeza “okwekaliriza”, “okusimba amaaso ku kintu.” Kye tulina okukola kwe kutunuulira Yesu ne tuziimuula ebizibu byaffe; so si okutunuulira ebizibu byaffe ate ne tuziimuula Yesu.

Njagala kukugamba nti abantu bangi bamala ebiseera bingi nnyo nga balowooza ku ebyo bye basobezza okusinga bwe balowooza ku biki Yesu by'aterreezza. Jjukira Yesu bwe yakola, yakolera ffe, yatwala ekibonerezo ekyali ekyaffe, yafuuka omutango gwaffe, bino by'ebintu bye tuteekeddwa okulowoozako.

WEEYONGERE OKUTUNUULIRA

Awo Yesu n'agamba Abayudaaya bali abaamukkiriza nti bwe munnywera mu kigambo kyange, nga muli bayigirizwa bange ddala.

Era mulitegeera amazima n'amazima gali bafuula ab'eddembe.

YOKAANA 8:31,32

2 ABAKKOLINSO 3:18 lugamba nti tufuulibwe nga bwe tweyongera okutunuulira Yesu mu kigambo. Bwe tuba nga tusuubira okufuulibwa mu kifaananyi kya Mukama waffe tulina okumanya ennono y'okweyongera.

Okweyongera kwetaagisa okwewaayo okujja okutwala ebbanga eddene. Kitegeeza tuli mu kulinda kuwanvu. Tetugezaako bugeza kintu okumala wiiki okulaba oba nga tunaafuna ekirungi, olwo bwe tutafuna nga tuddayo mu ngeri zaffe enkadde. Tulina okusoma ekigambo kya Katonda okutuusa nga amazima ga Katonda gafuuse okubikkulirwa gye tuli. Bwe kifuuka ekiramu era ekyo mazima mu bulamu bwaffe, kitandika okukola enjawulo mu bulamu bwaffe obwa bulijjo.

Waliwo ebituzzaamu amaanyi bingi nnyo mu byawandiikibwa nti tetuwanika. Abaggalatiya 6:9 lutusomesa obutakoowa okukola obulungi, tujja kukungula bwe tutazirika.

Tuteekeddwa okugenda mu maaso, tulina okusigala nga tweyongerayo era nga tunywedde. Tulina okweyongera mu maaso nga tuyita mu biseera ebizibu. Era tuteekeddwa okugumira obuzibu tukitegeere nti tukulira mu biseera ebizibu. Tufuna ebisuubizo bya Katonda okuva mu kukkiriza n'okugumiikiriza, so si kukkiriza kwokka. Tulina okuba abagumiikiriza okuyita mu nkyukakyuka mu bulamu bwaffe. Ekigambo ekirala *eky'okugumiikiriza kwe kubonaabona okumala akaseera*. Ekigambo kitegeeza ekyo kyennyini nga bwe kiri. Kitegeeza okubonaabona okumala akaseera. Okukangavvulwa tteeka.

Bwe tuba nga twagalira ddala okukyusibwa, okufuulibwa, okukyusibwa mu kifaananyi kya Katonda, tuteekeddwa okugenda mu maaso okusoma ekigambo kye n'okumusinza.

Kankuwe eby'okulabirako ebiwerako.

WEYONGERE OKUSINZA

Mu katabo ke, *Okusinza - okusumulula amaanyi ga Katonda mu bulamu bwo*, Norvel Hayes ayogera olugero olunyuma olw'omusajja mu Hawaii eyajja gy'ali okumuwa ku magezi.

Omusajja ono yagamba Norvel nti alina abaana basatu naye okumala emyaka ebiri tabeerangako na mulimu. Baali bamubanja Doola 15,000 era yali agezezzaako buli kintu okukola sente.

Omusajja ono yalina ebintu eby'amaanyi bye yali akozesa okutema ebikajjo. Naye kampuni ennene zaali zizze ne zitwala omulimu gw'ebikajjo kati ebyuma by'omusajja ono byali bitudde awo okumala emyaka ebiri.

Omusajja yagamba talina ssente kugulira baana be mmere, kati yali akozesa sitampu z'okusaba obuyambi mu gavumenti okufuna emmere. Agamba yali yewoze ssente zonna z'asobola okuva mu mikwano gye, kati yali takyasobola kwewola. Kati yali asaba Norvel amuyambe.

Norvel yagamba omusajja ono. Olina okutandika okusinza Mukama buli kumakya. Yiga okumusinzanga n'omumwa gwo.

Nga tonnaba kukkiriza Katonda okutandika okukukolera olina okutandika okumusinza olwekyo kyali. Twala akabanga ng'omusinza buli lunaku. Mutunuulire mu kutendereza n'okusinza. Mwebaze olw'ebyo byonna by'akukoledde.

Oluvannyuma Norvel yasisinkana omusajja oyo, n'agamba Norvel nti ye ne mukazi we baali basinzizza Katonda mu ngeri gye yali amugambye okukola okumala emyezi etaano, naye tewali kyabaawo.

Naye amakya gamu mu mwezi ogw'okutaano, omusajja ono aba ava ku maviivi ge nga amaze okusinza Katonda, n'afuna essimu. Yali eva wa kampuni ennene ezaali zaamuggya ku bizinesi. Kati baali bamusaba okukozesa ebyuma bye okumala wiiki mukaaga. Baagamba bajja kumusasula Doola 80,000. Wiiki mukaaga zaali tezinaggwako n'afuna omulimu omulala okuva ku kampuni eyo yennyini nga bamuwa Doola 80,000.

Omusajja agamba nti okusinza Katonda kwamujja mu bbanja era ng'alina Doola 40,000 mu banka ate ng'alina Doola 80,000 endala olw'omulimu omulala.

Oluvannyuma Norvel yategeezebwa omusumba we kkanisa omusajja mwe yali asabira nti omwaka gumu n'ekitundu bukya atandika

kusinza Katonda kati ekimu ekye kkumi kye mu kkanisa ziri Doola 65,000!

Kino kyabaawo, Norvel agamba kubanga omusajja ono yali awulidde amazima ate n'agakolerako nga atwala ekiseera mu kunoonya Katonda, okuvunnama okusinzanga n'okumutendereza.

Tulina n'okwetegereza kino nti omusajja yamala emyezi etaano nga tewali kyabaddewo, naye nga agenda mu maaso. Obuwanguzi ne bulabika. Teebereza singa omusajja ono yali abivuddeko ku mwezi ogw'okuna? Abantu abasinga kye bakola babivaako mangu nnyo olwo ne batasobola kulaba ebintu ebirungi Katonda bye yali abategekede.

TUSINZA OKUYITA MU KIMU EKYEKKUMI

N'EBIWEEBWAYO

Mu myaka gyange egyasooka mu nkolagana yange ne Katonda, yatugamba, nze n'omwami wange okuwaayo mu ngeri ennene.

Kye twalina tekyeyongerako okumala akaseera wabula okukendeera. Twayita mu bbanga lya myaka mukaaga nga tufuna ebizibu mu by'ensimbi byaffe.

Nz jijukira bwe nnavo kukugezaako bugeza ne nsalirawo ddala okugenda mu maaso si nsonga bbanga ki lye kinaatwala.

Olunaku lumu mukwano gwange yajja era nga bwe twali tunyumya, n'atandika okumbuulira engeri ez'enjawulo Katonda ze yali awamu omukisa ennyumba ye. Nnali njagala kubasanyukirako naye ate nga neebuuza lwaki ffe tukyafubana, nawulira nga okuggwamu amaanyi kunzikako ng'ekire. Nnagenda ku buliri bwa muwala waffe ne ntandika okukaaba mpola olw'embeera y'eby'ensimbi gye twali tuyitamu, mangu ago ekintu ne kiyimuka munda yange, ne nsalawo, ne ngamba, "Katonda, tugenda kugaba era n'okukola ekigambo kyo kye kigamba okutuusa bw'onojja gye tuli. Ne bwe tutaalabe kuddibwamu kwonna, tujja kugenda mu maaso okukikola okukuwa ekitiibwa kubanga wagamba mu kigambo kyo tukikole. Ebiva mu ekyo si bizibu byaffe ebyo bibyo."

Kasita Dave nange twasalawo bwe tutyo, okusalawo kwaffe kwaggalawo oluggi olwali lugguliddwawo sitaani olwamuwanga etteeka okututulugunya. Twatandika okukulaakulana okuva ku olwo okutuuka ne leero.

Twali tusinza Katonda n'okuwayo kwaffe, okusinza mu ngeri yonna si nkola ndala bulala gye tugoberera okufuna emikisa ewa Katonda. Katonda amanyi emitima gyaffe, era ebiruubirirwa byaffe biteekeddwa okuba nga birungi.

Tetusobola kukola bintu bituufu tufuna bufunyi bivaamu nga bituufu.

Tuteekeddwa okuyiga okukola ekintu ekituufu kubanga kituufu. Omusajja omutuukirivu akola bituufu oba bituukiridde kubanga talina kirala kya kukola. Ebivaamu abirekera Katonda era lubeerera bitera okuvaamu bulungi.

Wajja kujja ebiseera eby'okugezesebwa naye abanaagenda mu maaso bajja kukungula.

Nkukubiriza okusinza okusinga okweraliikirira. Salawo okugenda mu maaso si nsonga kitutte banga ki, ojja kulaba enkyukakyuka ennungi nga zibaawo mu bulamu bwo ne muggwe wennyini.

KINO KIVA ERI KATONDA

Ggwe nange tuyinza okwesaasira, ne tuddukira eri buli gwe tumanyi okutuwa amagezi, okunenya sitaani, okusaba okusabirwa, era ne tukola bingi bye tulowooza, naye bwe tutasinza Katonda, tuba tuleseeyo ekisinga obukulu.

Bayibuli etugamba nti tuteekeddwa okwongera okutunuulira mu kigambo kya Katonda nga endabirwamu ekitiibwa kya Mukama. Bwe tunaagenda mu maaso tujja kukyusibwa era tufuulibwe lubeerera okutuuka mu kifaananyi kye yennyini okuva mu kitiibwa ekimu okutuuka mu kirala.

Kino kyonna kiva wa? Eky'okuddamu kisangibwa ku nkomerero ya 2Abakkolinso 3:18: ...nga kubwa Mukama waffe omwoyo.

Okukyusibwa kuno si kye kintu kye tukola; ...kino kyava eri Mukama era kya kitalo mu maaso gaffe (Matayo 21:42)

Essuula

13

Katonda Ali ku Lwaffe

Kale tunaayogera tutya ebyo? Katonda bw'abeera ku lwaffe omulabe waffe y'ani?

ABARUUMI 8:31

Katonda ye Katonda omunene; Tewali kitasoboka w'ali, era ali kuluuyi lwaffe. Tetulina kye tulina kutya okuva eri abalabe baffe kubanga tewali mu bo era w'amaanyi nga Katonda waffe.

Katonda ali ku lwaffe, ali ku luuyi lwaffe, sitaani alina ekifo kimu – atuwakanya. Naye Katonda waffe ali ku ffe, wansi waffe, mu ffe, era atwetoolodde.

Bayibuli egamba, **Abeesiga Mukama bali nga olusozi Sayuuni olutajjulukuka, naye lunywerera emirembe gyonna. Ensozi nga bwe zeetooloola Yerusaalemi, ne Mukama bw'atyo bwe yeetooloola abantu be. Okuva leero n'okutuusa emirembe gyonna (Zabbuli 125:1,2).**

N'olwekyo nga olusozi Sayuuni tetuteekeddwa kujjulukuka kubanga Katonda atwetooloodde. Okuva ku ekyo, ali mufte, era yagamba tagenda kutwabulira newankubade okutulekerera.

Sitaani bw'aba nga atuwakanya, naye nga Katonda ali naffe, ku ffe, wansi wa ffe, atwetooloodde era ali mu ffe, nyinza okugamba nti tuli mu mbeera nnungi nnyo. Ani olwo gwe tunnaatya?

TYA MUKAMA SO SI MUNTU

Abo abamutya Mukama boogera kaakano.

Nti okusaasira kwe kubeerera emirembe gyonna.

*Bwe nnali mu nnaku ne nkaabira Mukama
Mukama nanyanukula, n'anteeka mu kifo ekigazi.
Mukama ali ku luuyi lwange siritya.
Abantu bayinza kunkola ki?*

ZABBULI 118:4-6

Mu lunyiriri olusooka, omutontomi wa Zabbuli bw'agamba, “nja kutya era nja kuzinza Katonda, nga ngamba nti okusaasira kwe n'okwagala kwe okutajjulukuka kubeerera emirembe gyonna,” akola ki?

Asinza Katonda olw'emirimu gye eminene nga bwe tusomye. Atendereza Katonda olw'okusasira kwe n'okwagala kwe okutajjulukuka.

Kizimba okukkiriza mu ffe bwe tutuula ne tutandika okwogera ku mirimu gya Katonda eminene.

Olunyiriri oluddako agamba nti bwe yali mu nnaku yakoowoola Mukama. Naye weetegereze ekyo teyakikola okuggyako nga amaze kusinza Mukama olw'emirimu gye yali amuyitira alage mu mbeera ye ey'ennaku.

Eky'enkomerero, mu lunyiriri olwokusatu, omutontomi wa Zabbuli ayasanguza, **Mukama ali ku luuyi lwange; siritya.** Lwaki tutya? Bw'aba nga Katonda ow'amaanyi ali ku lwange, ate nga ali, kati omuntu obuntu ayinza kunkola ki? Tulina okumanyira ddala obunene bwa Katonda waffe era n'obutono bwa balabe baffe bwe tubageraageranya ku ye.

Oyinza okweraliikirira omuntu ky'agenda okukola, oyinza okweraliikirira nti omuntu agenda kutwala omulimu gwo, nti omuntu tagenda kukuwa buli kye weetaaga. Omuntu ayinza okukuyisa mu ngeri etali ya bwenkanya, oyinza okweraliikirira ki omuntu ky'agenda okukulowoozako oba okukwogerako.

N'olwekyo tulina okumanya nti kisoomooza nnyo Katonda waffe bwe tulowooza ennyo ku bantu okusinga ye.

Bayibuli etugamba nti tetuteekeddwa kutya muntu, naye tuteekeddwa okutya Katonda, bwe tugaana okutya omuntu naye ne tutya Katonda mu ngeri y'okumusinza, olwo Katonda atambula ku lwaffe

olwo ne wataba kintu kyonna omuntu ky'ayinza okukola ne kibeera nga kitukosa. Bajja kujjira mu kkubo limu naye bajja kuddukira mu makkubo musanvu. (Ekyamateeka olw'okubiri 28:7)

Okumala akabanga kiyinza okulabika nti omuntu atwefunira naye bwe tuteeka amaaso gaffe ku Katonda waffe ne twongera okumusinja, nga tukuuma embooji yaffe mu kigambo kye, ku nkomerero Katonda ajja kutuwa empeera era ajja kuleeta obwenkanya kubanga ye Katonda ow'obwenkanya. Ayagala nnyo obwenkanya ate n'akyawa okukola obubi.

Twongera mu maaso emitawaana bwe tukaka abantu okutuwa ekitugwanira. Tetuteekeddwa kukola ekyo, wabula tulina kulindirira Mukama era tumuleke atuleetere ekyo kye tuteekeddwa okufuna. Katonda y'atwejeereza. Tetusobola kwejeerera era tuzibuwaza ebintu singa tugezaako.

Kirabika tweraliikirira nnyo nti omuntu agenda kutukozesa. Katonda alina enkola nga lukumi engeri gy'ayinza okututuusako emikisa gyaffe. Oluggi olumu bwe lweggala olulala lweggula. Bwe waba nga tewali nzigi akolayo lumu. Ye nsonga lwaki ekifo kyaffe kiteekeddwa okuba, "Katonda bw'aba ku lwange, omulabe wange y'ani?"

OMUNTU AYINZA KUKOLA KI?

Ekigambo kya Katonda kijjudde ebisuubizo ebitukakasa nti Katonda ajja kutulabirira. Ekisuubizo ekimu kubyo kiwandiikiddwa bulungi nnyo nti siraba ngeri gye tuyinza *kukisoma ne tusigala nga tutya.*

Mubeerenga n'empisa ey'obutaagala bintu, bye mulina bibamalenga kubanga ye yennyini yagamba nti sirikuleka n'akatono so sirikwabulira n'akatono.

N'okwanKK'anga ne twanKK'anga okwogera nti,

Mukama ye mubeezi wange; siritya. Omuntu ayinza kunkola ki?

Ebyawandiikibwa bino bingumya nnyo. Bigamba emirundi esatu nti Katonda tayinza kutuleka awo ttayo.

Katonda kasita ayogera ekigambo omulundi gumu, tulina okukkiriza nti akitegeeza. Naye bw'akiddamu emirundi esatu kiraga akisimbyeko essira nga atukakasa nti tasobola kutuleka nga tetulina buyambi. Nkuzzaamu amaanyi okufumiitiriza ku byawandiikibwa bino buli kutya ebiseera eby'omumaaso lwe kujja oba omuntu ky'ayinza okukukola. Ekigambo kya Katonda kirina amaanyi, era okukifumiitiriza obufumiitiriza kikuleetera okuwulira obulungi. Okukkiriza kujja na kuwuliriza kigambo kya Katonda. Sitaani buli lwa leeta okutya, ddukira mu kigambo kya Katonda. Okutya omuntu kituleetera okufiirwa ekiruubirirwa kyaffe.

Mu ndagaano enkadde Sawulo yatya abantu okusinga Katonda era kyamuviramu okufiirwa obwakabaka, (1Samwiri 13:8-14) Sawulo teyatukiriza kiruubirirwa kye olw'okutya.

Sawulo yali yateekebwatekebwa okufugira wamu ne Katonda, era nga ffe bwe tuli. Endagaano empya etuyigiriza nti ffenna tuli bakabaka era bakabona eri Katonda waffe. Katonda alina omukisa gwaterokedde buli omu ku ffe. Ayagala tufuge, so sikufugibwa kutya n'akutiisibwatiisibwa. Naye, nga Sawulo, tuyinza okufiirwa obwakabaka, ekifo kyaffe ekituufu eky'okufuga bwe tunaatya abantu okusinga Katonda.

OKUTYA KATONDA

Naye ku lwange mu bungi bw'ekisa kyo nnaayingiranga mu nnyumba yo. Mu kukutya nnaasinzanga nga njolekera yeekaalu yo entukuvu.

ZABBULI 5:7

Twogera kukutya okungi okutuleetera okuvunna n'okweyala mu maaso ge ne tugamba “Katonda wange, tewali alinga ggwe. Ani gwe n'atya? Bw'oba nga oli ku lwange, omuntu ayinza kunkola ki?”

Omutume Pawulo yagamba mu Baggalatiya 1:10, **Kubanga kaakano mpebera bantu nantiki Katonda? Nantiki nsaba amagezi okusiimibwa abantu? Singa nnali nga nkyasiimibwa abantu, ssandibadde muddu wa Kristo.**

Ekyawandiikibwa kino kikwata omutima gwange kubanga mmanyi okugaanibwa abantu bwe kugezezzaako okunziyiza okugenda mu maaso newankubadde nga nnina obuyite bwa Katonda ku bulamu bwange.

Wali okubiddwako okugaanibwa? oyinza okuba, ffenna kitutuuseko. Ye nkola ya sitaani okutuziyiza okugenda mu maaso. Amanyi nti tujja kuwebwa omukisa bwe tuba tuli mu kwagala kwa Katonda kati akozesa okutya okugaanibwa abantu kutukuumire emabega.

Bwe nnajjuzibwa Omwoyo Omutukuvu mu 1976, nnafirwa mikwano gyange egisinga obungi nasabibwa okuva mu kkanisa yange era n'aboolebwa ab'enganda zange abaalowooza nti tulimbibwa. Kyayitirira bwe nnayitibwa okutandika okubuulira ekigambo kya Katonda. Buli gye nnakyukiranga nnagaanibwanga omuntu gwe nnali njagala era gwe nnali nfaako.

Kyamberera kizibu nnyo okugenda mu maaso. Oluusi nayagalanga okubivaako nkole nsalewo ekinaasanyusa abantu.

Ntunula emabega ne ntya ne ndowooza kye nandifiiriddwa singa natya ne nkola okusanyusa abantu.

Waliwo ebiseera ebikulu ennyo mu bulamu bwange ne mu buweereza bwange sitaani bwe yannumba nga akozesa okugaanibwa, era kwajjanga buli mulundi Katonda bwe yabanga antwala ku ddaala eddala.

Buli muntu agenda okukola okwagala kwa Katonda alina okubeeranga atya Katonda okusinga abantu. Nnali njagala okukkirizibwa naye nga saagala kuva mu kwagala kwa Katonda era nnali mmanyi nti nja kuvaamu singa nakola mikwano gyange bye baali baagala nkole. Neebaza Katonda eyampa ekisa ekyampanirira ne kimpa amaanyi mu biro ebizibu eby'okugezesebwa.

Buli muntu agenda akola okwagala kwa Katonda alina okujjukira Yesu kye yagamba abayigirizwa be: “omuddu tasinga mukama we, oba nga banjiganya nze, nnammwe banaabayigganya.” (Yokaana 13:16 ne 15:20)

Era yagamba, “bwe babagaana baba bagaanye nze.” Kwe kugamba Mukama waffe akitwala nga kimukwatako abantu bwe bakugaana kubanga akola ekintu ekituufu era ye ye muwolereza wo. Empeera yo eva gy’ali.

Katonda ayagala ggwe nange tusemululwe okuva mu kikoligo ky’okutya abantu n’okutya okugaanibwa. Akimanyi nti tetusobola kufuuka ekyo ky’ayagala tubeere singa tusigala nga tutya abantu n’okugaanibwa. Tulina okufaayo ennyo ku ki ky’alwoowa okusinga ki abantu kye balwoowa – kubanga ye mugabirizi waffe si muntu.

Essuula

14

Katonda Ajja Kukugabirira

Mumutendereze Mukama

Nneebazanga Mukama n'omutima gwange gwonna

Mu kibiina eky'abatuukirivu abateesa ne mu kuKK'aaniro.

*Emirimu gya Mukama mikulu, ginoonyezebwa abo bonna
abagisanyukira.*

*Omulumu gwe gwa kitiibwa nnyo, n'obutuukirivu bwe bwa
mirembe gyonna.*

*Ajjukizizza emirimu gye egy'ekitalo; Mukama wa kisa, ajjudde
okusaasira*

*Awa emmere n'obugabirizi abo abamutya; Anajjukiranga
endagaano ye emirembe gyonna.*

ZABBULI 111:1-5

Mu bulamu bwo kati olowooza mu bugabirizi ki? Oli mu bwetaavu bw'obugabirizi mu bulamu bwo, era tomanyidde ddala wa we bunaava?

Okunoonyereza kwe nkoze mu nkungaana zange nkizudde nti abantu ataano ku buli kikumi babeera mu kutya obugabirizi bwabwe gye bunaava.

Wetegerize omutontomi wa Zabbuli mu lunyiriri olusembayo asinza era atendereza Katonda olw'emirimu gye kulwa bantu be: **Awa emmere n'obugabirizi abo abamutya: anajjukiranga endagaano ye emirembe gyonna, (Olunyiriri 5).**

Kino kitegeeza nti kasita tusinza Katonda, tugenda kufuna obugabirizi bwe. Tweyongerera okulaba omulamwa guno mu kigambo kya Katonda – okusinza kuwangula entalo.

Weetegereze olunyiriri olwo mu Bayibuli yo, lufumiitirizeko era olujjukirenga kubanga lulina ekisumuluzo ky’okusisinkana ebyetaago byo byonna. Mu ngeri eyo obwetaavu bwe bunajja mu bulamu bwo, oja kuba okwese ekigambo kya Katonda mu mutima gwo, era kijja kukuzzaamu amaanyi era kijja kukuyamba okusigala nga okkiriza okusinga okutya.

Katugambe bakugambye ogenda kufiirwa omulimu gwo oba ennyumba yo, tugambe oli mukadde nga obeera wo ku kasiimo, kati nga ogamba nnaabeerawo ntya mu biseera eby’omumaaso? Emiwendo gy’ebintu girinnya buli kaseera, olwo sitaani akukuba akaama, “Togenda kubeera na bikumala,” ennyingiza yo tekumala, ate nga ofuba okukola buli ky’oteekeddwa okukola.

Keebe nsonga ki ekwatagana n’obugabirizi bwo, twala olunyiriri olwo olukozese. Yeremiya yagamba, “Ebigambo byo byalabika ne mbirya, n’ebigambo byo byali gye ndi ssanyu n’okusanyuka kw’omutima gwange,” (Yeremiya 15:16). Tuteekwa, okugaaya ekigambo kya Katonda. Mu kuwandiika kw’omutontomi wa Zabbuli akozesa ekigambo *Selab* ekitegeeza, yimiramu, okirowoozeeko mpola, okujjukiza omusomi nti lya mpola ekyogeddwa. Soma mu ngeri ekkiriza ekigambo kya Katonda okukkiriza mu muntu wo ow’omunda era kikuliise. Ekigambo kigamba nti Katonda awa emmere n’obugabirizi eri bonna abamutya era abamusinza. Ekyo kitegeeza nti si kikulu mbeera ki mw’oli, Katonda aja kugabirira kasita onaamusinza n’okumugulumiza.

Okusinza kinyuma era kizzaamu amaanyi, okweraliikirira kuzitowereza omutima gwaffe n’okufiirwa essanyu. Sinza, teweerarikirira. Olutalo lwa mukama.

OKUSINZA MAGEZI

Mu kutya mukama amagezi mwe gasookera; ...

ZABBULI 111:10

Singa onosoma ekitabo ky'engero n'otunuulira ebisuubizo ebirungi ebiweebwa omuntu atambulira mu magezi, era tukizuula nti okwetoowaza n'okusinza y'entandikwa y'amagezi, ojja kulaba mangu nti okwetoowaza n'okusinza bikulu nnyo.

Bayibuli egamba nti abatambulira mu magezi bajja kuba bagagga – bajja kuwangaala. Bajja kuba basanyufu nnyo, bajja kuweebwa omukisa, nnyo nti abalala bajja kubakwatibwa obuggya (Engero 3:1-18).

Naye tewali kintu kiringa kuba n'amagezi awatali kusinza. Abantu bangi leero banoonya okumanya era okumanya kulungi, naye amagezi ge gasinga. Amagezi y'enkozesa entuufu ey'okumanya. Okumanya okutaliko magezi kuleetera omuntu okwegulumiza oba okujjula amalala; era ekinaazikiriza obulamu bwe. Omuntu omugezi lubeerera ajja kuba mumanyi, naye si bonna abamanyi nti balina amagezi.

Nkimanyi mu bitundu byaffe leero, tukulembeza nnyo okumanya okusinga bwe tuteekeddwa, okusoma kye kintu ekisinga obukulu mu bulamu bwa bantu ennaku zino naye ensi yaffe evundira ku misinde egya yiriyiri. Okusoma kulungi naye tekusinga magezi. Ekigambo kya Katonda kitugamba okukaabirira amagezi, tuganoonye nga abanoonya zaabu oba feeza, kifuule ekyetaago ekinene mu bulamu bwaffe.

Tewali kisinga magezi era entandikwa yago kwetoowaza n'okusinza. Asinza ajja kuyigirizibwa Katonda.

TEWALI KUBULWA MU KUSINZA

Malayika wa Mukama asiisira okwetooloola abo abamutya, n'abalokola.

Mulege era mutegeere Mukama nti mulungi. Aweereddwa omukisa oyo amwesiga.

Mutyenga Mukama, mmwe abatukuvu be kubanga tebabulwa kintu abamutya.

Oyagala bamalayika bo okutandika okukola mu bulamu bwo? Tandika okusinza Katonda kubanga Bayibuli egamba malayika we yeetooloola abo abamutya era n'abamusinza, abalabirira era n'abalokola. Kyewunyisa ebisuubizo bimeka ebikolebwa eri abasinza.

Oyagala kukakasibwa nti ebyetaago byo byonna onoobifuna? Tandika okusinza Mukama kubanga Bayibuli egamba tebabulwa abasinza Mukama, tebjula, eri abatya era abasinza Katonda mu mazima. Oyinza okubuuza, oba bwe kityo bw'ekiri, lwaki Katonda tatambula mu bulamu bwange?

Nkimanyi Katonda atambula mu bulamu bwo, nkimanyi alina eby'amaanyi by'akola mu bulamu bwo. Akola ebikulu mu bulamu bwaffe; singa tunaabiraba. Emirundi mingi tumala ebiseera nga tubala bye tatalina okusinga okubala bye tulina. Tulwooza nnyo ku bye tufiiriddwa okusinga bye tukyalinawo. Kino kituziyiza okulaba engeri gye tuweereddwamu omukisa.

Okubeera n'omutima ogusiima kitundu kya kusinza era y'endowooza "y'asinza." Katonda akola bingi n'ekintu kitono, ate akola okusingawo awatali kintu kyonna. Yatonda ensi gye tulaba awataali kantu. Akozesezza abanyoomebwa n'ebyo ebiringa ebitaaliwo okukola ebibye okuyitamu, okusiinziira ku 1Abakkolinso essuula 1. Era singa tuba tetulina kintu kyonna, twandiwadde kye tatalina Katonda, yandibaddemu ky'akolamu. Katonda talina buzibu kutuwa buli kye twetaaga mu bulamu bwaffe. Singa tumusinza, tusindiikiriza okweraliikirira kwaffe gy'ali, ne tugondera ebiragiro bye, bye tweetaaga bijja kugabirirwa mu ngeri ennene.

Nfiiriddwa bingi mu bulamu bwange, nnakozesebwa mu buto bwange, n'olwekyo saafuna kakisa kubeera mwana muto. Okumala ebbanga ddene nnagaananga ekyo kye nnafiirwa, nnagaananga emyaka gye nnali sisobola kukomyawo. Nnagaananga obutatandika bulamu mu ngeri ennungi kubanga nnamanya nti ebizibu byange mu bukulu byava mu kutandika bulamu mu ngeri embi.

Eky'enkomerero nnalaba nnali sirina kye nyinza kukolawo ku ebyo bye nafiirwa; ne ntandika okulaba bye nsigazizzaawo. Olw'ekintu kimu,

nalina obulamu bwange, naawe bw'oty. Newankubadde, emyaka gy'omaze ku nsi si mirungi, okyalina ebiseera byo eby'omumaaso.

Natandika okusinza Katonda olw'okubeera we nnali, ne mwesiga okubeera owa mazima eri ekigambo kye, nnamuwa bye nnali nsigazizzaawo, nnagamba Mukama nzuuno, si nze ngasa ennyo naye singa osobola okunkozesa, ndi wuwo.

Nkuzzaamu amaanyi okutandika okusinza Katonda awo w'oli werabire by'otalina, tewali kwetaaga oba kubulwa mu kusinza. Nga bwe tusinza, Katonda ayanukula ebyetaago byaffe.

OKUTENDEREZA KULOKOLA

Nkwagala ggwe ayi Mukama, amaanyi gange.

Mukama lwe lwazi lwange, era kye kigo kyange, era ye andokola; Katonda wange, olwazi lwange olunywevu, oyo gwe KK'enda okwesiganga;

Engabo yange, n'ejjembe ery'obulokozi bwange, ekigo kyange ekigulumivu.

Nnaakowoolanga Mukama , asaanira okutenderezebwa;

Bwe nnaalokolebwanga bwe ntyo okuva mu balabe bange.

ZABBULI 18:1-3

Omutontomi wa Zabbuli agamba ayinza kukola ki okulokolebwa okuva eri abalabe be? **Nnaakoowoolanga Mukama, asaanira okutenderezebwa.**

Singa ggwe nange tuyitira mu miryango egy'okusinza ne tuyingira mu kubeerawo kwa Katonda ne tutandika okumusinja abalabe baffe bajja kutabulwatabulwa batandike okulumbagana. Ekyo kyatuukawo mu maggye ga Yekosafaati ne Gidiyooni.

Sitaani bw'agezaako okutweraliikiriza, ne twanukula n'okusinza Katonda, kimutabulatabula ye ne mizimu gye nti gitandika okwerumbagana ekiva mu ekyo, tuzuula eddaala eppya ery'essanyu.

Nga bwe tulabye, waliwo, okutya kungi mu bulamu bwa bantu ba Katonda, naye Mukama ayogera gye tuli, **temutya, kubanga ndi nammwe.**

Mu ndagaano enkadde, Katonda mwenkanya eri abantu be – era laba obuwanguzi obw’ekyewuunyo bwe baaweebwa. Naye tuyinza okugenda ewala okusukka awo kubanga Katonda eyakulembera Abayisirayiri mu buwanguzi ku buwanguzi ku balabe baabwe takoma ku kubeera bubeezi *naffe*, naye ali ne *mu* abo ku ffe abalokole.

Njagala okukirowooza nti ali kumpi nange nga omukka gwe nzisa, era mmwetaaga nga bwe netaaga omukka gwe nzisa okuba omulamu. Katonda bwe bulamu bwaffe. Nga Pawulo bwe yagamba, **kubanga mu oyo tuba balamu, tutambula, tubeerawo.....** (Ebikolwa by’abatume 17:28). Katonda ye byonna mu byonna, era asaanidde okutenderezebwa n’okusinzibwa kwaffe.

Essuula

15

Katonda Ali Ku Luuuyi Lwange

*Mmwe muli ba Katonda, abaana abato, era mwabawangula;
kubanga ali mu mmwe asinga obukulu ali mu nsi.*

1 YOKAANA 4:4

Abantu balina okutya okw'enjawulo kungi nti tusobola okumala olunaku lwonna nga tukumenya, era mpozzi ne tutasobola kumalayo ebintu abantu bye batya.

Abakkiriza bangi balina okutya kwe kumu nga omulala yenna kw'alina. Y'ensonga lwaki ebyawandiikibwa nga 1 Yokaana 4:4 kyatuweebwa – okutukakasa nti olw'okubeerawo kwa Katonda asinga amaanyi ali mu ffe n'amaanyi ge, tetulina kye tutya.

Bw'otandika okutya wandibikudde Bayibuli yo n'osoma olunyiriri olwo mu lwatu nga ogamba “sitaani sirina kukutya kubanga ekigambo kya Katonda kingamba nti nnakuwangula dda, sitaani Katonda gw'osinga okutya ate ali ku ludda lwange!”

Omanyi Bayibuli etegeeza ki bw'egamba nti tuli bawanguzi n'okukirawo okuyita mu Yesu Kristo? Nkimanyi ddala kitegeeza nti tetulina kubeera mu kutya. Olutalo nga terunnatandika twagambiddwa dda nti tujja kuluwangula, tumanyi ebigenda okuvaamu, tumanyi tugenda kuvaamu nga tuli bawanguzi.

Tuyinza obutayagala kugenda mu lutalo, okuziyiza okutya si kyangu naye tusobola okuzzibwamu amaanyi, nti buli sitaani ky'akola okutukosa Katonda akikyusa ne kikola ku lw'obulungi bwaffe.

Katonda bw'aba kuluuyi lwaffe naffe nga tuli ku ludda lwe, kunkomerero ebintu byonna bigenda kukola lwa bulungi bwaffe

kubanga buli ali ne Mukama agenda kuwangula. Ago mazima agali mu byawandiikibwa, oludda lwa Katonda lwe luuyi oluwangula.

NAYE KATONDA

Naye Katonda atenderezesa okwagala kwe gye tuli, kubanga bwe twali nga tukyalina ebibi Kristo n'atufirira.

ABARUUMI 5:8

Waliwo olunyiriri lutono mu Bayibuli olunsanyusa buli kiseera bwe ndusoma, bigambo bibiri byokka naye bisangibwa mu Bayibuli emirundi mingi era by'amaanyi nnyo. Bigamba: naye Katonda...

Nga bwe tusoma Bayibuli tulaba ebintu bingi nnyo sitaani bye yali ategekedde abantu ba Katonda, naye Katonda... ekintu kye tuddako okusoma buwanguzi.

Mu kyawandiikibwa waggulu, amazima googeddwa nti ffenna tuli boonoonyi, embeera esaana ekibonerezo n'okufa. Ekigambo "Naye Katonda" ...kiziyiza ekigenda mu maaso. Okwagala kwa Katonda kujja mu mbeera ne kukyusa ebintu byonna.

Bwe twali nga tukyali boonoonyi, Kristo yatufirira, era okukola ekyo, kyalaga okwagala kwe gye tuli. Yalaga nti okwagala kwe kuyingirira okuzikiriza kw'ekibi.

Eky'okulabirako ekirala ekiraga engeri Katonda gy'ayingirira entegeka za sitaani z'atutegekedde.

Bajjajja abakulu bwe baakwatirwa Yusufu obugya, ne bamutunda mu Misiri, Katonda n'abeeranga naye, n'amulokola mu nnaku ze zonna, n'amuwa okuganja n'amagezi mu maaso ga Falaawo, kabaka w'emisiri, n'amufuula omufuzi mu Misiri ne mu nnyumba ye yonna.

EBIKOLWA BY'ABATUME 7:9-10

Sitaani yali ategese okuzikiriza Yusufu nga ajjuza obugya mu mitima gy'abaganda be, b'amutunda mu buddu, nga balowooza Yusufu bamwejjeko awedde, naye Katonda yalina entegeka endala; Katonda yayingirira entegeka za sitaani n'aleeta omukisa omunene mu bulamu bwa Yusufu.

Ekyo bwe kiteekeddwa okuba mu bulamu bwaffe obwa bulijjo. Eky'okugeza olumu ku ngero ezo luyinza okugenda luti;

Walina omulimu okumala emyaka kkumi n'olowooza nti ogenda kukola ogwo obulamu bwo bwonna, naye kampuni n'eggawo. Ne kirabika nti obulamu bukomye. Naye Katonda asobola okukuteekamu omulimu omulungi ennyo okusinga gw'obadde okaabira. Katonda ayinza okukuteekako okuganja n'ofuna omulimu gw'otaasomerera mu ssomero n'akuwa ekisa okugukola obulungi ennyo. Ayinza okukuyinzisa okukola ekintu buli muntu mu nsi ky'atakusuubira kukola oluusi nga naawe tewesuubira kukikola.

Ekintu ekifaananako bwe kityo kyali kibaddewo mu bulamu bwange.

Mu myaka gye nsavu, nalina omulimu mu kibuga kye St. Louis Missouri, ekibuga ky'eka. Omwami wange Dave naye yali mwakola, ekitegeeza ffembi twasobolanga okugenda okukola nga tukozeza emmotoka emu gye twalina. Omulimu gwali mulungi n'ebigenderako, era nawulira nga mpeereddwa omukisa okugufuna. Ekigezo ne kijja.

Mukama wange ataali Mukristaayo yali ayagala mmuyambe okubba ssente nga neenyigira mu bulimba. Kasitoma yalina ssente ku kaadi ye kubanga yali asasudde emirundi ebiri. Kino kitegeeza nti twalina okubawa ssente zaabwe, mukama wange yali tayagala bamanye nti balinayo ssente kubanga yali tayagala kuzibaddiza. Yangamba ssente ezo nzijje ku kaadi eyo mbaweereze kaadi omwezi ogwo nga eraga tebalina ssente ze babanja.

Naddayo eka ne ndowooza ku mbeera eyo. Nawuliranga nti ekyo kikyamu okukola naye nga ntya okufiirwa omulimu gwange. Kubanga twalina obuzibu mu by'enfuna nga kineetaagisa okukola.

Nnasalawo KK'ambe mukama wange nti sijja kusobola kukola bye yali angambye okukola. Era okusalawo kwe nnakola kwanteeka mu kifo eky'okusinza Katonda. Nyinza okuba nga saayimusa mikono gyange waggulu oba okuvunnama newankubadde okusaba essaala ey'okutendereza oba okusinza, naye ebikolwa byange byali bimusinza. Nnali nteeka Katonda n'ennono ze mu kifo ekisooka, newankubadde kyali kitegeeza kufiirwa mulimu gwange.

Bwe nnayogerako ne mukama wange, yanyiiga n'angamba ddayo ku mulimu. Nnali mmugambye bugambi nti ndi mukristaayo, newankubadde nnalaba nga tetukkiriziganya mu nzikiriza, nnali sisobola kwekiriranya kukkiriza kulimba kasitoma. Namugamba nti nnali saagala kufiirwa mulimu gwange naye nalina okukola kye ndowooza nti kye kituufu.

Nnali ndowooza nti olunaku lwonna ajja kujja mu offiisi yange angambe nti nkugobye, naye yajja n'angamba mpeereze kasitoma kyeke (cheque), teyaddamu kwogera kunsonga eyo era nange saddamu. Naye Katonda yakakasa nti nkuzibwa okutuuka bwe natuuka okubeera omuntu ow'okubiri asinga obukulu mu kampuni. Embeera yange yalinga eya Yusufu. Nze nnali nfuga buli kintu nga mukama wange taliwo, ekya beerangawo emirundi emingi, saalina buyigirize kukola mulimu ogwo, saalina bisaanizo nga ensi bw'etegeera ebisaanizo, naye nnafunu ebisaanizo eby'obwakatonda bwe yanziggulirawo oluggi n'ampa ekisa okukola omulimu.

Ekyalabikanga ekizibu ekinene ennyo kyafuukamu omukisa omunene kubanga Katonda yayingirira entegeka za sitaani ez'okunzikiriza.

Tulina okuyiga okukola ebintu okuyita mu maaso ag'okukkiriza okusinga mu g'abulijjo. Ekibaawo mu mbeera eya bulijjo kisobola okukyuka singa Katonda alabikako mu mbeera.

Katonda bwe yampita mu buweereza, abantu bangamba; nga ekibinja tubadde twogera naye tulaba tewali ngeri yonna gy'ogenda kukolamu ebyo by'ogamba Katonda by'akugambye okukola, tetulowooza nti embala yo esaanira okukola omulimu ogwo.

Nzujukira bwe nnawulira nga bangambye ebigambo ebyo kyannuma era ne nzigwaamu amaanyi..... Naye Katonda yali yampita, era n'ampa ebisaanizo, abalala bye baali balowooza byali tebigasa, Katonda yali alaba omugaso mu nze, yanyamba, era ajja kukola ky'ekimu naawe.

NEBAVUNNAMA AMAASO GAABWE:

Awo ekibiina kyonna ne bayimusa eddoboosi lyabwe, ne balira; abantu nebakaaba amaziga ekiro ekyo. Abaana ba Yisirayiri bonna ne beemulugunyiza Musa ne Alooni. Ekibiina kyonna ne babagamba nti singa twafiira mu nsi y'emisiri! Oba singa twafiira mu ddungu muno!

Era mukama atuleetera ki mu nsi muno, okugwa n'ekitala? Bakazi baffe n'abaana baffe abato baliba munyago: si kye kisinga obulungi gye tuli okuddayo mu Misiri?

Ne bagambagana nti twetekerewo omugabe, tuddeyo mu Misiri.

Awo Musa ne Alooni ne bavunnama amaaso gaabwe mu maaso g'ekibiina kyonna eky'abaana ba Yisirayiri.

OKUBALA 14:1-5

Weetegerere Musa ne Alooni engeri gye baayanukula engeri abaana ba Yisirayiri gye beemulugunyaamu- ne bavunnama amaaso gaabwe.

Ekikolwa kino eky'okuvunnama amaaso gaabwe kikolebwa mu Bayibuli yonna. Singa aba Yisirayiri bonna baagwa ku maaso gaabwe, baandirabye eby'amagero. Naye baamala ebiseera binene nga beesasira, nga balaba ensobi ku Katonda ne Musa, nga boogera bubu, nga baagala kuddayo e Misiri.

Naye Mukama yeebazibwe olwa Musa ne Alooni, bavunnama amaaso gaabwe ne batandika okusinza Katonda. Ekikolwa kyabwe kyalaga okukankanira Katonda, ekikolwa kino baakitwala mu maaso g'ekibiina nkakasa okulaga abalala kye bandibadde bakola.

Tulaba eky'okulabirako ekirala mu lubereberye 17 ekikwata ku Ibulaamu.

Bwe yali ng'alina emyaka kyenda mu mwenda, bwe yamulabikira n'amugamba, Nze Katonda ayinza ebintu byonna, tambuliranga mu maaso gange, obeerenga mutuukirivu.

Ibulaamu yayanukula nga avunnama amaaso ge, njagala eky'okulabirako kino, nga ffe, Ibulaamu yali amanyi nti yali tasobola kutambulira mu maaso ga Katonda nga atuukiridde okujjako nga Katonda akikoze okuyita mu ye.

Kye yali tasobola kukola ku lulwe yali asobola okukikola mu Katonda. Yasinza. Ekyo kye yakola, kyali kimala kubanga Katonda yakola ebyasigalira.

Bwe tuba nga twolekeddwa embeera ezitasoboka, tetuteekwa kuwanika, tulina okusinza ne tulyoka tulaba Katonda nga akola ku lwaffe. Jjukira byonna biyinzika eri abakkiriza.

MUKAMA ALI NAFFE:

*Yoswa mutabani wa Nuuni ne Kalebu mutabani wa Yefune,
abaali ku muwendo gw'abo abaaketta ensi ne bayuza engoye
zaabwe.*

*Ne babuulira ekibiina kyonna eky'abaana ba Yisirayiri nga
boogera nti ensi gye twayitamu okugiketta nsi nnungi nnyo,*

*Mukama oba ng'atusanyukira, kale alituyingiza mu nsi omwo,
n'agituwa; ensi ekulukuta n'amata n'omubisi gw'enjuki.*

*Kyokka temujeemera Mukama, so temutya bantu ba mu nsi,
kubanga kya kulya gye tuli; ekisiikirize kyabwe kiggiddwa
wagulu ku bo, era Mukama ali wamu naffe. Temubatya.*

OKUBALA 14:6-9

Yoswa ne Kalebu baali basajja babiri ab'akatonda, ab'esanga nga bali mu kibinja ky'abantu abaali bajjudde obutakkiriza. Yoswa ne Kalebu

tebaaganya bantu batakkiriza ku balemesa, baasigala n’okukkiriza nti bajja kusobola okuwangula abalabe baabwe. Naffe kitugwanira obutakkiriza bantu ng’abo obutabba ssanyu lyaffe nga bajjawo endowooza yaffe ennungi. Tobaganya kukubbako buvumu bwo n’okukkiriza kwo nti Katonda mulungi era alina entegeka ennungi eri obulamu bwo.

Sitaani akozesa abantu bwe batyo okutumalamu essuubi. Ennaku yabwe n’endowooza yabwe nti tebisoboka tetubigganya kulwaza oba kusaanyawo ssanyu lyaffe.

Mu bulamu mubaamu ebiseera embeera bwe ziba nga tezisanyusa. Tutunula ne tulaba ebizibu ebirabika nga binnaggwano eby’amaanyi gye tuli; naye tulina okumanya nti Katonda asinga bannaggwano.

Yoswa ne Kalebu b’esanga mu mbeera bw’etyo. Musa yali abatumye n’abasajja abalala kkumi okugenda okuketta ensi ensuubize bakomewo bamubuulire nga bw’efaanana, kkumi ku basajja abo baakomawo ne bagamba; ensi ejjude ebibala ebirungi, naye ejjude bannaggwano era tetuyinza kubawangula.

Naye Yoswa ne Kalebu baalina endowooza endala. Nabo baalaba bannaggwano naye ne basalawo okusigaza amaaso gaabwe ku Katonda, gwe bakkiriza nti asinga bannaggwano. Lipoota yabwe yali egamba, “tugenderewo mangu tubawangule kubanga tusobolera ddala”. Abaalina endowooza embi baagamba “tetusobola.”

Lubeerera mu bulamu ebintu bwe bitera okubeera, wabeerawo abantu abagamba nti biyinzika, era bagezaako okugenda mu maaso, olwo ne wabaawo abagamba nti tebisoboka, abagezaako okutabulatabula ebintu ebirungi n’endowooza yaabwe embi. Kkumi ku bakessi baali bagamba tetusobola, ababiri nti tusobola. Okusinziira ku lipoota eno kirabika kinaana ku kikumi abantu baali bagamba tebasobola kuwangula bannaggwano, olwo nno abiri ku kikumi baali bakkiriza Katonda yali asinga nnyo ekizibu. Emiwendo egyo mituufu ne leero. Singa omuwendo gw’abantu omunene gukkiririza mu maanyi ga Katonda, twandirabye abantu bangi nga bawangula okusinga be tulaba.

Kikwasa ennaku, naye emirundi mingi tuteeka amaaso gaffe ku bannaggwano okusinga ku Katonda. Ekizibu kituzingiza n'amaaso ne tugajja ku Katonda, n'ekyo ky'atuyitidde okukola. Nzikiriza nti ekiseera ekinene kye tumala nga tusinza oba nga tutendereza Katonda kyandituyambye okusigala nga tulaba gye tulaga, era n'okugenda mu maaso n'endowooza ennungi; nga tukkiriza nti tuyinza okukola buli kintu ky'atugambye okukola.

Yoswa ne Kalebu bajjukiza abalala nti Katonda yali abasuubiza okubawa ensi, baabakubiriza obutajeemera Katonda era n'obutatya bantu. Baagamba nti, "Mukama ali naffe."

Katonda tali na mulabe, ali naffe, ate Katonda bw'abeera ku lwaffe, omulabe waffe y'ani? Nkukubiriza okugezaako okukuuma endowooza ennungi. Beera mumativu weebazenga. Laba Katonda ky'akola, so si ky'olowooza ky'atakukolera. Weegendereze okwemulugunya. Mu kifo ky'okwemulugunya, sinza Katonda genda mu maaso n'okumusinzira okutuusa nga ky'oyagala okirabyeko. Okubeera n'endowooza ennungi kijja kwanguyaako ky'oyagala okusinga bw'obeera n'endowooza embi. Si nsonga tulindiridde kumala bbanga ki, tuyinza n'okusanyuka nga bwe tulindirira. Kiyitibwa, "okunyumirwa awo w'oli ng'oli ku lugendo lwo olukutwala gy'olaga".

Pawulo yayiga okumatira oba alina bingi, oba nga talina, naffe tuyinza okukola ekintu kye kimu.

Si kubanga njogera olw'okwetaaga; kubanga nnayiga, embeera gye mbaamu yonna, obutabaako kye neetaaga.

ABAFIRIPI 4:11

Pawulo yayiga okuyita mu bumanyirivu ekikola n'ekitakola. Nange njize era nkyayiga nti obutammatira si kusinza. Ngezaako okukisa mu bulamu bwange nti tekulina kalungi konna. Ngezaako okusanyuka mu bulamu bwange keebe mbeera ki. Saagala kumala budde na biseera butamatira. Bwe tunalinda ffenna tulekere awo okubeera n'ebizibu tulyoke tusanyuke, tuyinza obutafuna kakisa ako, kale katusanyuke.

Nga Pawulo si nsonga embeera yaffe gye tulimu bweri, tumanyi nti Katonda ali naffe; gano mazima atuli mu maaso. Ye amanyidde ddala ekigenda okuva mw'ekyo ky'olaba era entegeka ye ya bulungi bwaffe; si lwa kulemererwa kwaffe.

TOTYA- KATONDA AKUKULEMBEDDE:

Beera n'amaanyi, guma omwoyo, totya so tobatekemukira; kubanga Mukama Katonda wo yewuuyo agenda naawe; taakulekenga so taakwabulirenga.

Awo Musa n'ayita Yoswa n'amugamba mu maaso ga Yisirayiri yonna nti beera n'amaanyi, guma omwoyo kubanga oligenda n'abantu bano mu nsi Mukama gye yalayirira bajajja baabwe okubawa; era oligibasisa.

Era Mukama ye wuuyo abakulembera; anaabeeranga naawe, taakulekenga so taakwabulirenga totya so totekemuka.

EKY'AMATEEKA 31:6-8

Mu ssuula eno Musa yagamba abaana ba Yisirayiri okuba n'amaanyi, okuguma omwoyo era n'okunywera. Omanyi kye kitegeeza okunywera? Kitegeeza okugumira ku ky'omanyi nti kituufu n'otaganya muntu yenna kukikujjako.

Musa yagamba Yoswa nti yalina okuba n'amaanyi, okuguma omwoyo n'okunywera kubanga yalina okutwala abaana ba Yisirayiri mu nsi ensuubize Katonda gye yali yabawa.

Yamukakasa nti Katonda yali tagenda kumulekerera, oba okumwabulira naye nti yali ajja kumukulembera amuwe obuwanguzi nga bwe tulabye, ekisuubizo ekyo kiri eri ggwe nange.

Kizzaamu amaanyi okulowooza nti buli gye tugenda katonda y'atusookayo, nga atekateeka ekkubo.

Nga tetunnaba kugenda mu nkungaana zange ezibeeraawo kumpi mu nsi yonna, omuntu atusookayo nategeka ekkubo. Bakakasa nti buli

kintu kyonna bakitegese bulungi nnyo nga nze ne Dave tetunajja. Eky'okulabirako, jjo lya balamu wano twalina olukungaana olwategekebwa mu nsi endala, omukozi waffe yalaba nti ekifo kye twali tutegeese kyali mu kitundu ky'ekibuga ekyanditubeeredde ekizibu ennyo okufuna entambula amagenda n'amadda. Akalippagano k'ebidduka kabeera kanene nnyo nga tetunnaba kugenda ku lukungaana era ne bwe tuba nga tuvaayo. Waliwo oluguudo lumu oluyingira era ate nga lwe lufuluma. Kati olwo nga kitegeza tujja kwetaaga okumala essaawa nga nnya nga tetunnatuuka gye tulaga.

Twali twamutuma emyezi mu maaso, era gyali mirungi nnyo. Yasobola okukyusa ekifo olukungaana we twali tulutadde, era n'alokola obudde bungu. Lubeerera tutuma ekibinja ky'abantu nga ennaku bbiri nga tetunnatuuka. Bakakasa nti bamanyi amakubo gonna aganaatutuusa buli we twagala okugenda, bakebera wooteeri entegeka zonna bazikola, olwo ffe bwe tujja tusobole okussa essira ku kuweereza eri abantu, okusinga okwenyigira mu bintu ate ebirala. Kino kireetera obuweereza bwaffe okubala ebibala ebingi.

Okumanya kuno kumpa amaanyi, kumpa obuvumu, bwe mmanyi nti katonda ankulembedde mu buli mbeera mu bulamu bwange, kimpa obuvumu bungu era ndi wa ddembe okubeerawo nga sitya.

Eky'okulabirako, singa olina omusango mu kkooti, olina okumanya nti Katonda yagenze dda mu maaso go, n'akusookayo mu kkooti, nga tonnatuuka. Oba olina okwogera ne mukama wo ku nsonga yonna ey'omulimu, kkiriza ekigambo kye kigamba, kkiriza nti Katonda ajja kukukulembera ateketeeke ekkubo, akuwe okuganja n'ebigambo ebituufu eby'okwogera ekiseera bwe kinaatuuka.

Era nkuzzaamu amaanyi okwegendereza ebirowoozo byo nga oli mu mbeera nga zino. Lubeerera tusaba Katonda ne tumugamba atuyambe, tusaba bya magero, naye mu birowoozo byaffe tulaba butyabaga n'okulemererwa. Menya endowooza enkyamu na buli kintu ekitakkiriziganya na kigambo kya Katonda.

Omutontomi wa Zabbuli Dawudi yagamba, **ebigambo eby'omukamwa kange n'okulowooza okw'omutima gwange bisiimibwe**

mu maaso go ayi Mukama... (Zabbuli 19:14). Katonda asanyusibwa ebirowoozo n'ebigambo byaffe bwe bikkiriziganya n'ekigambo kye.

Bwe tuba nga twetaaga amaanyi ga Katonda mu mbeera zaffe, tetusobola kusaba kintu kirungi ate ne twogera bubi. Tulina okusaba kye twetaaga olwo ate ne tukuumira ebirowoozo n'ebigambo byaffe nga bikwatagana n'ekigambo kya Katonda.

Kkiriza onoolaba ekitiibwa kya Katonda!

Essuula

16

Sigala Mu Kifo

Temulyetaaga kulwana mu lutalo luno; mwesimbe muyimirire buyimirizi mulabe obulokozi bwa mukama obuli nammwe, ggwe Yuda ne Yerusalemi temutya so temukengentererwa; enkya mubatabaale; kubanga Mukama ali nammwe.

2 EBY'OMUMIREMBE 20:17

Mu Abaefeso 6, essuula ekwatagana n'olutalo lw'omwoyo, Mtugambe nga tumaze okukola byonna eby'okusoomoozebwa tulina kuyimirira. Mu 2 Eby'omumirembe 20 tugambibwa nti tekijja kutwetaagisa kulwana ntalo zaffe, kubanga za Mukama, so si ffe. Ekitugambibwa kwe kuyimirira mu bifo byaffe tusigale omwo okutuusa bwe tunaalaba obuwanguzi.

Ekifo kyaffe kye kiri wa? Nzikiriza nti kwe kusinza Mukama.

Nga abalabe ba Yuda ne Yisirayiri, sitaani alina entegeka ya kulumba n'okutuzikiriza; era akola entegeka ye. Naye Katonda..... alina ekinaamwewuunyisa.

Mukwano gwange omu nga muyizi mu Buyonaani yampeereza Yokaana 10:10 ennogoseemu, njagala okugigabanako naawe, eraga engeri sitaani gy'ali omumalirivu okutta, okubba, n'okuzikiriza, naye Yesu alina entegeka endala.

Omubbi, kkondo mu mwoyo ayagala okutuusa engalo ze mu buli kintu mu bulamu bwo ekirungi, omusazi w'ensawo ono anoonya akakisa konna okuyingira mu bikukwatako munda ddala alyoke akunnumbe na buli kintu ky'otwala nga eky'omuwendo mu bulamu bwo. Ekyyo si kye kyokka! Bw'anaamala okubba ebyamaguzi byo n'ebiby byennyini,

ajja kutwala entegeka ye ku ddaala eriddako, nga atondawo embeera embi ennyo nga tolaba na ngeri gy'ogenda kuzivaamu; ajja kukunyigiriza nnyo otuuke n'okuwulira nga oyagala kuwanika oweeyo n'ebintu by'abadde tannaba kukubbako. Ekiruubirirwa ky'omubbi ono kwe kwonoonera ddala obulamu bwo. Singa tewali kimuziyiza ajja kukuleka nga omenyesemenyese, nga tolina k'osigazizza mu bulamu bwo, ojja kusembayo nga owulira omaliddawo era nga tokyalina kya kukola. Tokola nsobi, ekiruubirirwa kye kuzikiriza.

“Naye nzize babeere, bakuume, n'olubeerera okusigaza embavu, amaanyi n'ekiruyi eky'okubeera abalamu ekyo ekiva munda wansi, obulamu obutayuugayuga era obutanyeenyezeka ebyo ebibeerawo ebweru wabwo – najja balyoke batwale obulamu buno obutenkanika, obutaliko kibuvuganya, obutalina ky'obugeraageranyako obujjudde eby'obuggagga ebikulukuta mu bujjuvu.”

Nsanyukira nnyo ebigambo ebyo, “naye nzize,” ebyayogerwa Yesu yennyini era tulaba nga Yesu alinnye mu ntegeka za sitaani.

ERIYA YALAGULA ENKUBA MU KYEYA:

Awo Eriya n'agamba Akabu nti golokoka olye onywe, kubanga waliwo okuwuuma kwe nkuba nnyingi.

1 BASSEKABAKA 18:41

Nga bwe nnayogedde emabega mu kitabo kino, waali wabaddewo enjala kakuuse okumala emyaka esatu, era Katonda yali yagambye dda Eriya agambe Kabaka Akabu nti enkuba egenda kutonnya. Naye waali tewannabaawo kabonero ka nkuba.

Mu buwulize Eriya yagamba Akabu okwetegeka kubanga awulidde okuwuuma kw'enkuba ennyingi.

Newankubadde nagabanyeko ku bulamu bwa Eriya mu kitabo kino, waliwo ensonga endala ze njagala okugabana naawe mu ssuula eno kubikwatagana n'Eriya tulabe engeri gye yasigala mu kifo. Okusooka njagala omanyere nti ekyeya kyali kimaze emyaka essatu, tulina ebigezo

mu bulamu bwaffe ebimala ebbanga eddene okusinga ebirala, twagala byonna bimale akaseera katono naye si bwe kiba lubeerera.

Mu biseera eby'okugezesebwa okuwanvu tuggwamu amaanyi, tuwulira nti twandifunyeeyo akabonero okuva eri Katonda, waakiri akatono akatulaga nti akola ku mbeera yaffe era nti tuli kumpi okuwaguza.

Tulina kukola ki mu biseera bino? Tulina kugamba ki kye twagala so si kye tulina.

Nga Eriya, tulina kugamba, “enkuba etandika okutonnya.” Mu ngeri endala, buli mukisa gwe twagala Katonda atonnyese mu bulamu bwaffe, twogera nga ogwatandise dda okutonnya. Tuba tetulimba kubanga mu nsi ey'omwoyo, kiba kyatandise dda okubaawo; tuba tulindirira bulindirizi okulabikako kungulu we tuyinza okukiraba n'amaaso.

Mu biseera eby'okwetaaga, tugambe, “ndi wa mukisa. Ebyetaago byange byonna bisisinkanibwa. Nnina okuganja buli gye ngenda, ndi wa mukisa nga nyingira, ndi wa mukisa nga nfuluma. Emikisa gya Katonda gingoba era gimpisa. Ndi wa mukisa, ndi wa mukisa, ndi wa mukisa.”

Bwe twogera tutyo, neewunya sitaani bw'aba awulira. Alowooza nti tutabuddwa, nti tetulaba ky'akola, nkakasa kimunyiiza okulaba nga tetwerariikiridde.

Kasita tunyweza okwatula kwaffe okusinziira ku kigambo kya Katonda, waliwo ekikoomi ky'omuliro lw'akikuma emirundi musanvu; nga bwe yakola mu bulamu bwa Saddulaaki, Mesaki ne Abeduneego bwe baagaana okuvunnamira Kabaka. Baakola embeera kye yali ebeetaaza ne bayimirira. Oluvannyuma ng'okugezesebwa kuwedde baava mu kikoomi ky'omuliro nga emibiri gyabwe tegisiridde, - nga tebawunya na mukka. Kwe kugamba, tewaali kiraga nti baabadde mu muliro. Okununulibwa Katonda kwali kuwedde! (Danyeri 3)

Eriya alina kye yawulira mu mwoyo. Oyinza okuba nga tonnalaba kintu kyonna naye oyinza okubaako ky'owulira mu mwoyo? Mu kukkiriza oyinza okukkiriza nti omukisa gwo guli mu kkubo gujja?

Sitaani ayinza okukwata omukisa gwo, naye omwoyo omutukuvu ali mu kunyigiriza muziziko ogwo era guli kumpi okwabika. Nga Eriya olina kwogera, “wandidduse, sitaani, kubanga enkuba etandika okutonnya era omukisa gwange gujja.”

ERIYA YAKUUMA EKIFO KYE

Awo Akabu n'agolokoka okulya n'okunywa. Eriya n'alinnya ku ntikko ya Kalumeeri, n'avunnama ku ttaka, n'ateeka amaaso ge wakati w'amaviivi ge

N'agamba omuddu we nti, yambuka nno olengere awali ennyanja. N'alinnya n'alengera n'ayogera nti tewali kintu; nayogera nti genda nate emirundi musanvu.

1 BASSEKABAKA 18:42,43

Eriya yalinnya ku ntikko y'olusozi Kalumeeri n'ayimirira mu kifo kye.

Yavunnama mu kusinza, n'ateeka omutwe gwe mu maviivi n'agamba omuddu we, “genda olengere awali ennyanja era jjangu ombuulire ky'olaba.”

Omuddu yagenda n'alaba, naakomawo n'agamba Eriya, “tewali kintu.” Eriya n'agamba, “genda oddemu otunule.” Emirundi musanvu, naye Eriya teyava mu kifo kye.

Katonda ky'ayagaza ggwe nange kwe kufuna ebifo byaffe si nsonga ebintu birabika bitya okumala akaseera naye kuuma ekifo kyo.

Obuzibu bwaffe bwe bunu, tuyimirira mu kifo, naye embeera yaffe bw'erabika nga tekyuka mangu nga bwe twagala, tukyusa ekifo. Tutandika okukowoola buli gwe tumanyi, nga tubabuza ki kye baakola bwe baali mu mbeera bw'etyo oba bayinza kukola ki singa beesanga mu mbeera ng'eyo. Tutandika okuyiia ki kye tuyinza okukola okuva mu mbeera eyo. Tulina okujjukira nti abeesiga omuntu bajja kuwanguwa, naye abo abateeka obwesige bwabwe mu Mukama tebaliswazibwa wadde okuyiibwa.

Kye tulina okukola kufuna kifo kyaffe ne tuyimirira. Katonda agambye enkuba egenda kutonnya, era ejja kutonnya, mu kifo ky'okukyusa ebifo, tulina okutunula omulundi ogw'okubiri, tujja kulaba omukono gwa Katonda nga gutambula.

Ggwe tokiraba? Eriya avunnamye, omuddu we agenze kukola ky'amugambye okukola. Nga bw'agenda okulaba enkuba ku nnyanja agamba, Eriya ku luno alimbye, tewali kigenda kubaawo. Tugenda kumala wano bbanga ki nga tukola bino omutali magezi?

Akomawo n'agamba Eriya, Eriya amugamba, **ddayo era**. Eriya yali amaze okusalawo nti tagenda kulemererwa. Ekigambo kya Katonda kitugamba okukuuma endowooza zaffe mu kifo kimu, era kitulabula obutabeera na ndowooza za mirundi ebiri; kigamba nti omuntu bw'ati talifuna kintu kyonna okuva eri Mukama.

Ndowooza omuddu yagamba Eriya, “tewali nkuba Eriya. Tewali na bire ku ggulu era n'omusana gwaka nnyo. Eriya nkooye okudduka eno n'eri sirowooza nti kirina kye kikola. Ndowooza wandifunyeyo ekigambo ekirala okuva eri Katonda. Kino kirabika tekikola.”

Naye Eriya teyava mu kifo kye. Yagenda mu maaso okusinza Katonda. Teyayimuka wadde okutunuulira embeera eyali tesuubiza, yagamba bugambi, **genda nate**.

Buli mulundi omuddu we bwe yajja okumugamba nti tewali nkuba, Eriya teyawanika olw'okuba yafuna lipoota embi. Yagenda mu maaso mu kukkiriza nga akkiriza nti Katonda yali asobola okutonnyesa enkuba era nga akimanyi mu mutima gwe kubanga yali agambye ajja kugitonnyesa.

ERIYA YALEEBEESA ABALABE BE:

Awo olw'atuuka omulundi ogw'omusanvu n'ayogera nti laba, ekire kirinnya nga kiva mu nnyanja ekiri ng'omukono gw'omuntu obutono. N'ayogera nti yambuka ogambe Akabu nti teekateeka eggaali lyo oserengete, enkuba ereme okukuziyiza.

Awo olw'atuuka ekiseera kitono bwe kyayitawo, eggulu ne libindabinda ebire n'embuyaga, ne waba enkuba nnyingi. Akabu n'alinyanya mu ggaali n'agenda e Yezuleeri.

Omukono gwa Mukama ne guba ku Eriya, ne yeesiba ekimyu naddukira mu maaso ga Akabu okutuusa awayingirirwa e Yezuleeri.

1 BASSEKABAKA 18:44-46

Eky'enkomerero omulundi ogw'omusanvu, omuddu w'Eriya yakomawo n'amugamba nti ndabye ekire nga kiva mu nnyanja ekiri ng'omukono gw'omuntu obutono.

Singa ggwe nange tutunuulira embeera zaffe, nkakasa twandirabye ekire eky'essuubi nga wakiri kiringa omukono gw'omuntu. Si nsonga ebintu birabika bitya kati, nkakasa nti waliwo essuubi ettono lye tuyinza okwenywerezaako.

Ekire omuddu w'Eriya kye yalaba kyalina okulabika nga kitono nnyo mu bbanga, naye era kyali kimala okusanyusa Eriya. Kitwetaagisa okusanyukira kye tulaba si nsonga kitono kitya. Okusinga okwennyika olw'ekyo kye tatalaba.

Amangu ddala nga Eriya afunye amawulire okuva eri omuddu we, yalina obuvumu obugamba omuddu we agambe Akabu nti kyandibadde kirungi agende eka kubanga enkuba yali eija. Mu bbanga ttono nnyo eggulu lyali liddugadde ebire era enkuba ey'amaanyi n'etandika okutonya. Bayibuli egamba nti Eriya yeesiba ekimyu n'adduka nnyo, nti yaddukira mu maaso ga Akabu n'amagaali ge okutuusa Yezuleeri nga mailo abiri.

Oyinya okuteebereza obwenyi bwa Akabu bwe bufaanana ng'alabye Eriya adduka okumuyisa, ndowooza yamugamba "weeraba, nnakugambye; tunaalabagana e Yezuleeri."

Eriya yali aleebeesezza abalabe be. Yali agumiikiriza ekiseera eky'okugezesebwa, era bwe kyaggwako yali akyayimiridde mu kifo kye. Yali asinzizza Katonda mu kugezesebwa kwonna, naffe tulina kukola bwe tutyo.

Omwoyo wa Katonda bwe yajja ku Eriya, yasobola okudduka n'okusinga omulabe, Kabaka Akabu. Mu ngeri y'emu omwoyo wa Mukama bw'ajja ku ggwe nange, tujja kusobola okudduka okusinga omulabe waffe sitaani. Omwoyo wa Katonda atukkako nga bwe tusinza, atufukako amafuta okuwangula n'okulebeesa omulabe waffe.

Essuula

17

Katonda Yali Naye

Yusufu ne bamuserengesa mu Misiri, Potifali, omwami wa Falaawo, omukulu w'abambowa, omumisiri, n'amugula mu mukono gw'Abayisimaeri abaamuserengesa eyo.

OLUBEREBERYE 39:1

Osobola okujjukira Yusufu bwe yajja okuba mu Misiri? Lw'akuba buggya, baganda be baali bamutunze mu buddu eri Abaisimaeri abasuubuzi abaamuserengesa eyo.

Yusufu bw'atuuka mu Misiri, yagulibwa omukungu omumisiri. Newankubadde Yusufu yali muddu mu nnyumba ya Potifali, Katonda yamuwa omukisa n'amukulaakulanyizayo kubanga yali naye buli we yagendanga.

Ne bwe tuba nga tuyita mu biseera byaffe ebizibu, Katonda ajja kutuweeramu omukisa, si nga biwedde lwokka. Ffe ekikulu kye tulina okukola, kukuuma ndowooza nnungi eziyingiramu okwebaza Katonda olw'ebyo bye tulina, n'okusinza, n'okutendereza Katonda olw'ekyo kyali.

MU NNYUMBA YA POTIFALI

Mukama n'aba wamu ne Yusufu, n'aba n'omukisa, n'abeera mu nnyumba ya mukama we omumisiri.

Mukama we n'alaba nga Mukama ali naye, era nga Mukama amuwa buli kye yakola okuba n'omukisa mu mukono gwe.

OLUBEREBERYE 39:2,3

Bwe kityo bwe kirina okubeera mu bulamu bwo. Newankubadde mukama wo talaba mugaso gwo era nga takuganya kubaako kye wekolera okujjako okwera, Katonda bw'aba naawe, asobola okukukulaakulanya era n'olaba omukisa mu ngeri endala nnyingi.

Katonda asobola okukuyimusa mu biro bye kubanga okukulaakulana okutuufu kuva eri Mukama. (Zabbuli 75:6-7). Totunuulira kintu kyonna mu nsi nga obugabirizi bwo, Katonda y'akugabirira.

Ensi ejja kutegeera nti Katonda ali naffe. Abamu ku bantu abaatugoba edda bajja kulaba ekitiibwa kye nga kirabika mu bulamu bwaffe. Singa tunaayimirira mu kifo kyaffe era ne tubeera beesigwa mu kyo nga bwe tumulindirira, mu kiseera kye ekigere Katonda ajja kutuyimusa. Kijja kulabika eri bonna abatulaba nti omukono gwa Katonda guli ku ffe olw'obulungi.

Nkirabyeko mu bulamu bwange; mmanyi n'abantu abalala bangi be kituuseko mu bulamu bwabwe.

Abantu abo abatugaana era abatusekerera, abo abatwogerako ebyatuluma era nga baali tebetaaga kuwulira kintu kyonna ekitukwatako, kubanga tetwabaganya kutufuga, bajja kumaliriza nga boogera ebintu birala nnyo.

Mu mazima ndabye abangoba ne bannegaana kati ate nga bafuba nnyo okubeera mikwano gyange oluvannyuma lw'okulaba okuganja kwa Katonda ku bulamu bwange. Saagala mikwano bwe gityo egyagala okubeera naffe nga tuli ku luguudo olwambuka.

Singa tunaakuuma ebifo byaffe, ne tukola byonna eby'etaagisa mu biseera ebyakatyabaga, ne tuyimirira nga tunywedde mu bifo byaffe mu kukkiriza, nga twatula bulungi era nga tusinza, tujja kulaba nti buli we tulaga, buli kye tukola, Katonda nga bwe yali ne Yusufu, naffe bw'anaabeera naffe.

MU KKOMERA

Mukama wa Yusufu, n'anutwala n'amussa mu kkomera, ekifo abasibe ba Kabaka mwe baasibirwa n'abeera omwo mu kkomera.

Naye Mukama n'aba wamu ne Yusufu, n'amulaga ebirungi, n'amuwa ekisa mu maaso g'omukuumi w'ekkomera.

Omukuumi w'ekkomera n'ateresa Yusufu mu mukono gw'abasibe bonna abaali mu kkomera; ne byonna bye baakola eyo, oyo ye yabirinako obuvunaanyizibwa.

Omukuumi w'ekkomera teyatunuulira kintu ekyali wansi w'omukono gwe, kubanga Mukama yali wamu naye; n'ebyo bye yakola, Mukama n'abiwa omukisa.

OLUBEREBERYE 39:20-23

Tewali kitweraliikiriza oba kitwewanisa mitima, si nsonga olaze wa, oba okola ki, omaliriza oli ku ntikko nga Yusufu.

Nzikiriza bwe tutyo bwe twandisanye okubeera. Buli gye tugenda oba kye tukola, tulina okulaba obulungi n'ekitiibwa kya Katonda nga kirabisibwa mu bulamu bwaffe.

Tuteekwa okubeera n'ebifo ebisinga, okuganja okw'amaanyi, si kubanga bitugwanira olw'obulungi bwaffe, naye lwa kuba Katonda mulungi ate nga ayagala okwolesa obulungi bwe n'okuganja kwe mu bulamu bw'abaana be. Tujja kuyita mu kugezesebwa, tekujja kubeerawo lubeerera, era nga kuwedde, tujja kuba nga tuyimiridde tunywedde mu kukkiriza kwaffe.

Nzikiriza kino tekibadde bwe kityo mu bulamu bwaffe kubanga tubadde tetuyimirira mu bifo byaffe. Tubadde tukola Abayisirayiri kye baakola. Tunyooma embeera yaffe, twemulugunya, twelumaluma, twogera ebigambo bingi ebitazimba, tunenya Katonda, tunenya abantu abalala mu bulamu bwaffe, nga tetulaga bibala birungi eby'omwoyo, tulina obusungu, obujja nga tetwagaliza balala be tulaba nga embeera zabwe nnungi okutusinga.

Amazima gokka ge gajja okutufuula ab'eddembe. Tulina okwaKK'anga amazima agakwatagana n'awo we tuli, tulyoke tugende oba tutuuke awo we twagala okutuuka.

OkwaKK'anga ebintu bino ebikwatako si kyangu, naye bwe tutabyaKK'anga tugenda mu maaso nga twerimba era tujja kusigala mu busibe emirembe n'emirembe.

Natuuka mu bulamu bwange bwe nnalina okukkiriza nti nnina endowooza embi.

Ebizibu byange abalala byali tebibakwatako, zaali nsobi zange, kubanga nnali sikola Katonda bye yali angamba okukola. By'atusaba oba by'atugamba si bizibu nnyo. Okuyita mu maanyi ag'omwoyo omutukuvu, ajja kutuyinzisa okubeera n'endowooza ennungi wadde nga embeera mbi, singa tukkiriza okukola ebintu mu ngeri ye; nga twesiga ebiseera bye ebigere mu bulamu bwaffe.

Tetusobola na kubeera na ndowooza mbi ate ne twebuuza lwaki tetuweebwa mukisa.

Waliwo embeera ennungi gye tuyinza okubeeramu.

Essuula

18

Sitaani Ategeeza Bubi, Naye Katonda Ategeeza Bulungi

Mmwewe, mwali mwagala okuntuusako obubi, naye Katonda n'akifuula ekirungi, olw'okuwonya abantu bangi baleme okufa nga era bwe kibadde.

OLUBEREBERYE 50:20

Oluvannyuma nga Yusufu agolokose okubeera addirira falaawo mu Misiri era nga ali wansi we, baganda be abamatunda mu Misiri baja okugula emmere olw'enjala gye yali alagudde nti eribaawo. Oluvannyuma Yusufu yategekera kitaawe ne baganda be n'abantu baabwe bonna, okugenda okubeera mu Misiri okuva mu njala okubeera mu bugagga n'emirembe.

Kitaabwe Yakobo bw'afa, baganda ba Yusufu ne batya ne balwooza ayinza okuwoolera eggwanga olw'ekyo kye baakola ng'akyali muto. Mu lunyiriri luno tulaba Yusufu abakakasa nti yabasonyiwa bye b'amukola. Tulabe endowooza ye ennungi nga eyolesebwa. Laba bw'abagamba; “nammwe mwali mwagala okuntuusako obubi, naye Katonda n'akifuula ekirungi, okulokola abantu bangi mu kufa enjala.”

Kyewuunyisa emirundi emeka sitaani bw'atutega obutego, nga alubirira okututta oba okutukola obubi. Naye Katonda bw'abyenyigiramu, atwala ekintu ekyo sitaani kye yali ayagala okutukoza obubi n'akikozesa olw'obulungi bwaffe.

Teri muntu mulala asobola kukyusa bintu kubaawo bwe bityo, naye Katonda asobola. Asobola okutwala embeera yaffe etasuubiza okuyita mu maanyi ge agakola eby'amagero n'atufuula ab'amaanyi era ab'obulabe bungi nnyo eri omulabe waffe okusinga bwe twandibadde nga teriwo.

Embeera yange ekiraga bulungi. Nakwatibwa, ne ntulugunyizibwa mu birowoozo ne mu mubiri okumala emyaka mingi mu buto bwange. Kino kyali kibi nnyo okutuuka ku mwana era gwali mulimu gwa sitaani, naye Katonda akifudde olw'obulungi.

Obuzibu bwange kati bwe bubaka bwange, ennaku yange kati bwe buweereza bwange. Kati nkozesa obumanyirivu bwe nafuna okuyita mu bulumi okuyamba abantu bangi abalumwa. Nkukubiriza obutayonoona bulumi bwo. Katonda ajja kubukozesa singa onaabumuwa. Ampadde ebirungi mu kifo ky'evvu nga bwe yasuubiza mu Isaaya 61:3 naye nalina okuta evvu. Nnalina okuyiga okubeera n'endowooza ennungi nga Yusufu gye yalina. Nnalina okuta obukaawu, okugaana abantu, obutasonyiwa bwe nnalina eri abantu abankola obubi.

Oba nga sitaani yakulumya, tokkiriza bulumi kugenda mu maaso nga obeera n'endowooza embi. Bwe tukyawa abantu, twelumya ffekka. Oluusi abantu be twanyiigira beeyagala tebamanyi nti baatunyiiza era tebafaayo na ngeri gye tuwulira gye bali. Jjukira Katonda ye muwolereza wo, era obudde bwe bunaatuuka, ajja kusala omusango ogw'ensonga. Mu nkomerero abagonvu balya ensi nga abalabe ba Katonda bazikirira. (Zabbuli 37)

Ka tulabe Eseza n'abantu be nga eky'okulabirako ekirala Katonda bw'akyusa obubi bwaffe okubufuula obulungi.

ENTEGEKA YA SITAANI KU LW'OBUBI

Awo Kamani bwe yalaba Moluddekaayi teyakutama so teyamuvunnamira, kale Kamani n'ajjula obusungu.

Naye n'alaba nga tekugasa okukwata Moluddekaayi yekka; kubanga baali bamutegeezezza abantu ba Moluddekaayi bwe baali. Kamani kye yava asala amagezi okuzikiriza abayudaaya bonna abaali mu bwakabaka bwonna obwa Akaswero, abantu ba Moluddekaayi.

ESEZA 3:5-6

Bw'oba nga omanyi olugero luno, ojja kujjukira nti Eseza kizibwe era omuwala omwole ow'omuyudaaya eyayitibwa Moluddekaayi, yali alondebwa Kabaka Akaswero okufuulibwa kaddulubaale mu bwakabaka bwe. Yali yatwalibwa okubeera n'abakyala ba Kabaka nga omuzaana nga akyali muto. Sirowooza nti entegeka eno gye yalina eri obulamu bwe, nzikiriza embeera eno yamutiisa era nga alaba nga mbi eri obulamu bwe.

Yabeera yo okumala akaseera nga ateekebwaterkebwa okuyingira ewa Kabaka, ekiseera bwe kyatuuka, Katonda n'amuteekako okuganja mu maaso ge. Era n'alondebwa okuba kaddulubaale. Teyakitegeera nti Katonda yali amuteeka mu kifo kino okulokola eggwanga.

Lubeerera tubeera n'entegeka eri obulamu bwaffe, naye ekintu ne kibaawo ne kigootanya entegeka zaffe, tukiwakanya era tetusanyukira nkyukakyuka eyo, naye si nsonga ki kye tukola, ekipya kirabika okuba okwagala kwa Katonda eri obulamu bwaffe.

Tuba tetulowooza engeri gye kinaakolamu olw'obulungi naye Katonda alina entegeka esinga eyaffe.

Mu mbeera eno Eseza yatya nnyo bayibuli etugamba, era yali tayagala kuteekebwa mu kifo mwe yali. Wabula Moluddekaayi yamugamba nti yali yayitibwa mu bwakabaka mu kiseera nga kino, mu ngeri endala guno gwe gwali omulimu gwe.

Yamugamba nti oba nga tayagala kukola Katonda ky'ayagala akole yali agenda kuzikirira n'abantu abalala bonna. Yakkiriza okukola kyonna kye yali atekwa okukola.

Moluddekaayi eyakolanga mu lubiri lwa Kabaka, yalina omulabe ayitibwa Kamani, omukungu wa Kabaka asinga obukulu. Kubanga Moluddekaayi yali agaanyi okumuvunnamira, Kamani yanyiiga nnyo n'afumba olukwe si kuzikiriza Moluddekaayi yekka naye n'abayudaaya bonna- teyakitegeera nti kaddulubaale Eseza yali muyudaaya nga era kizibwe wa Moluddekaayi. (Eseza 2:5-23, 3:1-9)

Mu Bayibuli mulimu abantu abakiikirira, oba ebifaananyi by'abalabe ba Katonda.

Abamu kubo ye Kamani, akiikirira sitaani yennyini. Kamani yalina entegeka okuzikiriza abantu ba Katonda abayudaaya nga sitaani bw'alina entegeka okututta kubanga tuli bantu ba Katonda.

Moluddekaayi bwe yamanya entegeka za Kamani, yagamba kaddulubaale Eseza eyayita Kabaka ne Kamani ku kijulo ekirungi we yayagala okubikkula olukwe lwa Kamani eri Kabaka.

Mu Eseza 5:11-13 tusoma ekyabaawo Kamani bw'akomawo eka n'eri mikwano gye oluvannyuma lw'okukuzibwa Kabaka, n'aweewba obuyinza okuzikiriza Abayudaaya mu bwakabaka bwonna.

Awo Kamani n'ababuulira ekitiibwa ky'obugagga bwe, n'abaana be bwe benkana obungi, n'ebigambo byonna Kabaka mwe yamukuliza, era bwe yamukuza okusinga abakungu ba Kabaka n'abaddu be.

Era Kamani n'ayogera nti weewaawo, Eseza kaddulubaale taganya muntu yenna kuyingira wamu ne Kabaka eri embaga gye yali afumbye wabula nze era n'enkya ampise wamu ne Kabaka.

Naye ebyo byonna tebiriiko kye bingasa nga nkyalaba Moluddekaayi omuyudaaya ng'atuula ku mulyango gwa Kabaka.

ESEZA 5:11-13

Moluddekaayi yali musajja atya Katonda eyali awonyezza Kabaka olukwe okuttibwa babiri ku balaawe ba Kabaka, ekikolwa ekyali kyawandiikibwa mu kitabo ky'okujjukiza mu maaso ga Kabaka, naye Moluddekaayi teyaweebwa mpeera.

Moluddekaayi yali musajja eyafukibwako amafuta okukozesebwa okuleeta obulokozi eri abantu ba Katonda nga ggwe nange bwe tufukiddwako amafuta okuleetera abalala obulokozi n'okubayamba mu nnaku zaffe.

Nga bwe tulabye Kamani akiikirira sitaani, nga Kamani bwe yalina entegeka okutta Moluddekaayi n'abayudaaya, sitaani alina entegeka okututta.

Mu Eseza 5:14, tulaba entegeka Kamani gye yakola okutta Moluddekaayi.

Awo Zeresi mukazi we n'emikwano gye bonna ne bamugamba nti, "basimbe ekitindiro obuwanvu bwakyo emikono amakumi ataano, enkya oyogere ne Kabaka okuwanika Moluddekaayi okwo; kale olyoke oyingire ne Kabaka eri embaga ng'osanyuka." Ekigambo ekyo ne kisanyusa Kamani n'asimbya ekitindiro.

ESEZA 5:14

Ng'ojjeeko okutegeka okutta Moluddekaayi, nga Kabaka y'amuwadde olukusa, Kamani yali amaze okuyisa ekirango nti ku lunaku lumu abayudaaya bonna baali bakusalibwa mu bwakabaka bwonna n'ebintu byabwe bitwalibwe.

Kamani yali amaze okukola entegeka ey'okutta abantu ba Katonda bonna, erabikanga etajja kukyusibwa kubanga ne Kabaka yali amaze okugisemba.

Naye **Katonda** yalina entegeka endala era n'atandika okugissa mu nkola.

ENTEGEKA YA KATONDA KU LW'OBULUNGI

Awo mu kiro ekyo Kabaka n'atayinza kwebaka; n'alagira okuleeta ekitabo ekijjukiza eky'ebigambo ebya buli lunaku, ne babisomera mu maaso ga Kabaka.

Awo ne basanga nga kiwandiikiddwa nga Moluddekaayi yabuulira ebigambo bya Bigusani ne Teresi, babiri ku balaawe ba Kabaka ku abo abaakuumanga oluggi, abaagezaako okukwata Kabaka Akaswero.

Awo Kabaka n'ayogera nti kitiibwa ki na bukulu ki Moluddekaayi bye yaweebwa olw'ekyo? Awo abaddu ba Kabaka abaamuweerezanga ne boogera nti, tewali kintu ky'aweereddwa.

ESEZA 6:1-3

Njagala kugabana naawe amazima gano. Buli kintu ekirungi ggwe nange kye tukola, ne bwe kiba mu kyama, Katonda akiwandiika tagenda kukyerabira.

Olunaku lulituuka ebikolwa byaffe ebirungi bwe biritteekebwa mu musana.

Buli ssaala gye tusabye, buli bwe tugonedde abali mu buyinza newankubadde nga twalina eddembe okugaana oba okubajeemera, buli mulundi bwe twogedde ekigambo kya Katonda mu mbeera enzibu,-buli kikulwa eky'obwetowaze kiwandiikibwa era kijja kuweebwa empeera. Buli mulundi bwe tuyimiridde mu kukkiriza, okusinza, ne tutuuka okwatula okulungi, buli we tuwadde Mukama saddaaka ey'okusinza, Katonda ajjukira. Teyerabira bintu bye tukoze bulungi. Abiwandiise mu kitabo eky'okujjukira nga bwe tusoma mu Abebbulaniya 6:10: **Kubanga Katonda mwenkanya, tayinza kwerabira mulimu gwe mwakola, n'okwagala kwe mwamulaga mu buyambi bwe mwawa, era bwe muwa abantu be.**

Moluddekaayi yalina ebirungi bye yali akola, naye yali talina kirungi ky'afunamu.

Yali abikola mu kyama eri Mukama. Ekigambo kitugamba ebikwatagana n'ebikolwa ebirungi omukono ogwa kkono tegulina kumanya ogwa ddyo kye gukola. Ekyo kitegeeza ki? Kitegeeza okukola ebyo bye tuwulira nga Katonda atugamba okukola- kikole olw'ekitiibwa kye, kyerabire tugende mu maaso n'emirimu gyaffe. Tekitegeeza kugenda nga tubuulira buli omu kye tukoze; naye tumanye nti empeera yaffe ejja kuva eri Mukama ekiseera bwe kirituuka.

Kabaka n'abuuzza nti ani ali mu lujja? Mu kiseera ekyo Kamani yali yaakayingira mu lujja olw'ebweru olw'omu lubiri, ng'azze okusaba Kabaka amuwe Moluddekaayi awanikibwe ku kalaba ke yali amaze okukola.

ESEZA 6:4

Tulaba engeri sitaani ali mu kifaananyi kya Kamani, gy'akola entegeka ye era tulaba ne Katonda nga akola entegeka ye.

ENTEGEKA ZOMBI ZIKUBAGANA

Abaweereza ba Kabaka ne bamugamba nti Kamani y'ali mu lujja.

Kabaka n'agamba nti ayingire.

Awo Kamani n'ayingira era Kabaka n'amugamba nti kiki ekigwanidde okukolerwa omuntu Kabaka gw'ayagala okuwa ekitiibwa?

Kamani n'alowooza mu mutima gwe nti ani Kabaka gweyandiyagadde okuwa ekitiibwa okusinga nze?

ESEZA 6:5-6

Olw'okuba nga Kamani yali ajjudde amalala yali tasobola kukiteebereza nti kabaka yali ayagala okukuza n'okussamu ekitiibwa omuntu omulala yenna okujjako ye.

Yalowooza; “ndi kumpi okuweebwa omukisa, nnina okutegeka ekintu ekirungi ennyo.”

Awo Kamani n'agamba Kabaka nti, omuntu Kabaka gw'ayagala okuwa ekitiibwa, baleete ebyambalo bya Kabaka bye yali ayambaddemu, n'embalaasi Kabaka gye yali yeebagaddeko, era ettikiddwa ku mutwe engule ey'obwakabaka.

Ebyambalo ebyo n'embalaasi bikwasibwe omu ku bakungu ba Kabaka abasingira ddala ekitiibwa, amwambaze ebyambalo ebyo era amukulembere ng'amwebagazza embalaasi, amuyise mu kibuga wakati, agende ng'alangirira nti bw'atyo omuntu Kabaka gw'ayagala okuwa ekitiibwa bw'agwanidde okuyisibwa.

ESEZA 6:7-9

Kati laba entegeka ya sitaani n'eya Katonda bwe zikubagana.

Awo Kabaka n'agamba Kamani nti yanguwa oleete ebyambalo n'embalaasi, Moluddekaayi omuyudaaya omuwe ekitiibwa

ekyo. Buli kyonna ky'oyogedde ky'oba omukolera ddala obutalekayo n'ekimu. Ojja ku musanga ng'atudde ku mulyango gw'olubiri.

ESEZA 6:10

Kabaka akiikirira Mukama mu kitundu kino kye yali agamba Kamani kye kino; “buli mukisa gw'obadde weetegekedde, ogenda gukuteeka ku Moluddekaayi. Ogenda kulaba n'amaaso nga mmuwa omukisa.” Katonda bw'asalawo okuwa omuntu omukisa tewali muntu yenna ku nsi newankubadde sitaani asobola okumuziyiza.

Katonda bw'aba ku luuyi lwaffe omulabe waffe y'ani? Katonda bw'aba ku lwaffe, omuntu ayinza kutukola ki?

Nkusuubiza nti sitaani alina entegeka nvundu eri obulamumu bwa buli omu ku ffe.

Alina entegeka okutusaanyawo; nga Kamani bwe yakola Moluddekaayi n'abayudaaya. Naye Katonda alina entegeka eri buli omu era entegeka ya Katonda teziyizika.

ENTEGEKA YA KATONDA TEZIYIZIKA

Awo Kamani n'aleeta ebyambalo n'embalaasi n'ayambaza Moluddekaayi n'amwebagaza embalaasi, n'amukulembera okumuyisa mu kibuga wakati ng'agenda alangirira nti bw'atyo omuntu, Kabaka gw'ayagala okuwa ekitiibwa, bw'agwanidde okuyisibwa.

Ebyo bwe byaggwa, Moluddekaayi n'akomawo ku mulyango gwa Kabaka naye Kamani n'ayanguwa okuddayo ewuwe ng'anakuwadde era nga yeebisse omutwe gwe.

ESEZA 6:11-12

Naye eyo si y'enkomerero, Mukama teyavuunika ntegeka za Kamani zokka nti yalina okuwa Moluddekaayi ekitiibwa kye yali yeetegekedde; yakyusa entegeka embi Kamani gye yali ategekedde Moluddekaayi; n'emuddira.

Kamani bwe yagenda ku kijjulo kaddulubaale Eseza kye yali ategekedde Kabaka, naye yayasanguza entegeka gye yali akoze okumutta n'abantu be. Ekyava mw'ekyo, Kabaka yawanika Kamani ku kitindiro kye yali azimbidde Moluddekaayi. Eseza yali asinzizza Katonda bwe yakkiriza okubeera mu mbeera eyali tesanyusa. Yali yeetegese okuteeka wansi entegeka ze atwale entegeka za Katonda mu maaso; newankubadde nga yali takitegeera okumala akaseera. Buli kikulwa eky'okugonda kuba kusinza Katonda ky'atayisaako maaso.

Nga abalabe ba Yekosafaati ne Gidiyoni bwe baamaliriza nga besse bokka na bokka, bw'etyo entegeka ya Kamani yamuddira, yafuna kye yali ategekedde Moluddekaayi n'abayudaaya.

Ku lunaku olwo, Kabaka Akaswero, n'awa kaddulubaale Eseza ebintu byonna ebyali ebya Kamani, omulabe w'Abayudaaya. Eseza 8:1-2.

Eseza n'abuulira Kabaka nga Moluddekaayi bwe yamulinako oluganda, era okuva olwo, Moluddekaayi n'akkirizibwa okujjanga mu maaso ga Kabaka.

Kabaka n'anaanula empeta ye eriko akabonero, gye yagya ku Kamani, n'agiwa Moluddekaayi. Eseza n'akwasa Moluddekaayi obuvunaanyizibwa obw'okulabirira ebintu byonna ebyali ebya Kamani.

ESEZA 8:1,2

Moluddekaayi yamaliriza nga atutte ennyumba ya Kamani, eya weebwa Eseza Kabaka. Kabaka yagenda mu maaso n'awa Eseza ne Moluddekaayi obuyinza okulangirira era n'okutwala ebbaluwa mu linnya lye mu bwakabaka bwonna okukyusa ekiragiro Kamani kye yali ayisiza abayudaaya bonna battibwe n'ebintu byabwe biwambibwe.

Amaaso gaffe bwe tugakuumira ku Katonda, ne tuyimirira nga tunywedde mu kukkiriza ne tugenda mu maaso nga tusinza ne tunywerera ku kwatula obulungi tujja kulaba nga enteekateeka za sitaani z'atukolera zikola ku lw'obulungi bwaffe ate ye ne zimuzikiriza.

Mu bbaluwa ezo, Kabaka n'akkiriza Abayudaaya abaali mu buli kibuga okukuKK'aana, basobole okutaasa obulamu bwabwe, era basobole okutta, okuzikiriza n'okumalirawo ddala amagye gonna aga buli ggwanga oba ekitundu, agaba gabalumbye bo ne bakazi baabwe, era n'abaana baabwe abato. Bayinza n'okwetwalira ebibadde ebintu ebyabalabe baabwe.

Awo Abayudaaya ne baba bulungi ne basanyuka, ne bajaguza, era ne baba n'ekitiibwa.

Mu buli kibuga ne mu buli kitundu ekirangiro kya Kabaka gye kyasomebwanga, nga Abayudaaya baba n'olunaku olw'okuwummula, nga basanyuka era nga bajaguza. Abantu b'amawanga amalala bangi ne batuuka n'okufuuka Abayudaaya kubanga olwo Abayudaaya baali bafuuse abantu abatiisa.

ESEZA 8:11,16,17

Byonna bwe byagwa, Abayudaaya baawebwa ekitiibwa era ne bawebwa omukisa, kaddulubaale Eseza yayongerera okwegombewwa Kabaka era n'awebwa ekitiibwa. Ne Moluddekaayi yakuzibwa n'aba nga y'addirira Kabaka mu bukulu.

Weetegereze ngambye, byonna nga biwedde, buli kigenda mu maaso mu bulamu bwo kati, ekirabika nga ekizibu ennyo, kijja kuggwa – nakino kijja kuyitawo, nkukubiriza okubuusa amaaso otunuulire essanyu ery'okufuna engule.

Moluddekaayi omuyudaaya, ye yaddiriranga Kabaka Akaswero mu kitiibwa, era yali mukulu mu Bayudaaya. Bayudaaya banne baamwagalanga kubanga yakoleranga abantu be ebirungi, era ng'ayagaliza ab'eggwanga lye emirembe.

ESEZA 10:3

Nga bwe nzikiriza byonna bye nsomesezza, nzikiriza kino kigambo kya kiseera mu bulamu bwaffe kye twetaaga kati.

Kuuma ekifo kyo, towanika, yimirira, yingira mu kuwummula kwa Katonda, laba obulokozi bwa Mukama. Lekeraawo okweraliikirira n'okugezaako okumanya biki ebigenda mu maaso mu bulamu bwo. Okukembwa bwe kujja, twala ekifo kyo, onoolaba obulokozi bwa Mukama, bw'akutegekedde, olutalo si lulwo, *olutalo lwa Mukama*.

Okufundikira

Okufundikira

Nzikiriza luno lunaku lujja mu bulamu bwo era ogenda kutandika okwaKK'anga ebikugezesa mu ngeri endala oluvannyuma lw'okusoma ekitabo kino.

Kati osobola okunyumirwa obulamu bwo n'okunyumirwa olugendo lwo ne Mukama nga bwe kitabangawo.

Okuyitibwa okwa waggulu eri buli mukkiriza kwe kunyumirwa Katonda. Katonda yatutonda okutunyumirwa era n'okussa ekimu.

Bwe tweralikirira, tuba tetussa kimu. Nzijukira amakya gamu bwe nnatuula mu ntebe gye ntera okusabiramu ne ntandika okweralikirira embeera yange mwe nnali era naki kye nnali ngenda okukola.

Ne mpulira akaloboozi ako akatono, munda mu mwoyo gwange nga kangamba, "Joyce ogenda kussa kimu n'ekizibu kyo oba nange?" Katonda yali asobola okukola ku kizibu kyange singa nnali mwetegefu okukyerabira ne mmala ebiseera byange naye. Jjukira okusinza so si okweralikirira.

Ne bw'oba nga oluumbiddwa okukemebwa, ojja kuweebwa amaanyi okukuziyiza singa onaasinza Katonda.

Nkulagulirako nti ogenda kulaba okugenda mu maaso mangu nnyo naawe weewunye. Nzikiriza obulamu bwo bugenda kubeera bwangu okuva ne leero.

Sigamba nti togenda kusanga bizibu na bigezo, naye nga bw'osinza Katonda, ojja kusanga kye mpita obwangu obutuukirivu nga bulabika mu bulamu bwo. Abasinza basanga ebintu nga byangu. Ebizibu n'emigugu bisitulwa nga bwe tusinza; era ne tunyumirwa awo we tuli ku lugendo lwaffe olututwala gye tugenda.

Ooo sinza ogulumize Katonda wamu nange, kubanga Katonda bw'aba ku lwaffe, omulabe waffe y'ani?

Essaala eleeta enkolagana eya ssekinoomu ne mukama

Katonda ayagala ofune ekirabo kye eky'obuwa eky'obulokozi. Yesu ayagala okukulokola era akujjuze n'omwoyo omutukuvu okusinga byonna.

Bw'oba nga tokkirizanga Yesu, omulangira ow'emirembe, okubeera Mukama era omulokozi wo, nkusaba okole ekyo kati.

Saba essaala eddako, era bw'oba nga okitegeeza ojja kufuna obulamu obugya mu Kristo.

Taata,

Wayagala ensi nnyo, n'okuwaayo n'owaayo omwana wo omu yekka okutufiirira ebibi byaffe, abakkiriza tuleme okufa naye tubeere n'obulamu obutaggwawo.

Ekigambo kyo kigamba nti tulokoka olw'ekisa okuyita mu kukkiriza ekirabo ekiva gy'oli, tewali kye tuyinza kukola okufuna obulokozi.

Nzikiriza ne njatula n'akamwa kange nti Yesu mwana wo, omulokozi w'ensi, nzikiriza yanfiirira ku musaalaba era n'atwala ebibi byange, n'abisasulira omutango, nzikiriza mu mutima gwange wamuzuukiza mu bafu.

Nkusaba onsonyiwe ebibi byange, njatula Yesu nga Mukama wange okusinziira ku kigambo kyo, ndi mulokole era nja kubeera naawe emirembe n'emirembe. Weebale, Taata nsiimye nnyo mu linnya lya Yesu. Amiina.

Lababw'oba 3:16, Abaefeso 2:8-9, Abaruumi 10:9-10,
I Abakkolinso 15:3-4, I Yokaana 1:9, 4:14-16, 5:1, 12,13.

Ebifa ku muwandiisi



Joyce Meyer abulidde enjiri okuva mu 1976 era kati abadde mu bubuulizi okuva nga 1980. Ye muwandiisi omwatiikirivu, era yakawandiika ebitabo ebizzaamu amaanyi ebisukka mu 54, omuli *Ebyama Ebikuwa Obulamu Obuyitirivu, Essanyu Eriva mu Kukkiririza mu Kusaba n'Olutalo lw'Mwoyo*, era n'entambi eziwulirizibwa ezisukka mu 220 n'ezirabwa 90. Pulogulamu za Joyce eza *Obulamu mu Kigambo* ezibeera ku lediyo ne televizoni zirabibwa abantu mu nsi yonna, era atambula nnyo nga akuba enkunKK'aana okubuulira ku "Bulamu mu Kigambo". Joyce n'omwami we Dave balina abaana bana era babeera mu St. Louis, Missouri.